



THEOT Judges Cambridge Additional 1570

Ff.97r–105r

For the book of Judges, the following people were involved in creating first, second and third drafts of transcriptions: Michael Wechsler, Jeremy Brown; Draft 4, Transkribus; Drafts five, Steve Delamarter; Draft six, seven and eight, Abenezzer Hussen, Nardos Worku, Abinet Bedilu, Wondesen Eshetu, Hiwot Samuel; Draft 9, Ralph Lee

Nota Bene: Images may be viewed at the Cambridge University Library website at <https://cudl.lib.cam.ac.uk/view/MS-ADD-01570/197>

F.97r

(col. 1) አሪት፡ ዘመሰፍንት፡ምዕ፡ ፩አ(ን)ቀጽ፡ ቀዳማዊ፡ ክፍለ፡ ፩ወኮነ፡ እምድጎረ፡ ሞተኢያሱ፡
ወተስእሉ፡ ደቂቀ፡ እስሬኤል፡ ኀበ፡ እግዚአብሔር፡ እንዘ፡ ይብሉ፡ መኑ፡ የዓርግ፡ ለነ፡
ኀበ፡ከናኔዎን፡ መልአክ፡ ዘይትቃተሉ፡ ለነ፡ ወይቤሎሙ፡ እግዚአብሔር፡ ይሁዳ፡ ይዕርግ፡ ወናሁ፡
አግባእክዋ፡ ለምድር፡ ውስተ፡ እዴሁወይቤሎ፡ ይሁዳለስምዎን፡ እኑሁ፡ ዕርግ፡ ምስሌየ፡ በውስተ፡
መክፈልትየ፡ ወንትቃተሎሙ፡ ለከናኔዎን፡ ወአሐውር፡ አነኒ፡ ምስለክ፡ በውስተ፡ መክፈልተክ፡
ወሐረ፡ስምዎን፡ ምስሌሁ፡ ወዐርገ፡ ይሁዳ፡ ወአግብአሙ፡እግዚአብሔር፡ ለከናኔዎን፡ ወለፈርዜዎን፡
ውስተ፡ እደዊሆሙ፡ ወቀተልዎሙ፡ በቤዜቅ፡ እልፍ፡ብእሴ፡ ወረከብዎ፡ ለአድኖቤዜቅ፡ በቤዜቅ፡
ወተፃብእዎ፡ ወቀተልዎሙ፡ ለከናኔዎን፡ ወለፈርዜዎን፡ ወጐየ፡ አድኖቤዜር፡ ወዴገንዎ፡ ወተለውዎ፡
ወአኀዝዎ፡ ወመተርዎ፡ አርእስተ፡ እደዊሁ፡ ወእገሪሁ፡ ወይቤሎሙአድኖቤዜቅ፡ ፫ነገሥት፡
አርእስተ፡ እደዊሆሙ፡ ወእገሪሆሙ፡ ምቱራን፡ሀለዉ፡ ወያስተጋብኡ፡ ፍርፋራተ፡ በታሕተ፡
ማዕድየ፡ ወበከመ፡ ገበርኩከማሁ፡ፈደየኒ፡እግዚአብሔር፡ ወወሰድዎ፡ ኢየሩሳሌም፡ ወሞተ፡ በህየ፡
ክፍል፡ ፪፡ ወተቃተሉ፡ ደቂቀይሁዳ፡ ምስለ፡ ኢየሩሳሌም፡ ወአስተጋብእዎ፡ በአፈ፡ ሐፂን፡
ወአውዓዩ፡ ሀገራ፡ በእሳት፡ ወእምዝ፡ ወረዱ፡ ደቂቃ፡ ይሁዳ፡ ይትቃተልዎሙ፡ ለከናኔዎን፡ እለ፡
ይነብሩ፡ ውስተ፡ አድባር፡ ወውስተ፡ናጌብ፡ ወሰፈላ፡ ወሐረ፡ ይሁዳ፡ ውስተ፡ ከናኔዎን፡እለ፡
ይነብሩ፡ ውስተ፡ ኬብሮን፡ ወስማ፡ ለኬብሮን፡ትካት፡ ቀርዖት፡ አሬባዕ፡ ወቀተልዎሙ፡ ለሴሲ፡
ወለኢኪመም፡ ወለታሚ፡ ቅውልደ፡ ኤናቅ፡ ወሐሩ፡እምህየ፡ ኀበ፡ እለ፡ ይነብሩ፡ ዳቤር፡ ወስማ፡
ለዳቤር፡ ትካት፡ ሀገረ፡ መጽሐፍ፡ ወይቤ፡ ካሌብ፡ ዘአስተጋብአ፡ ለሀገረ፡ መጽሐፍ፡ እሁቦ፡
አስካሃ፡ ወለትየ፡ ትኩኖ፡ ብእሲቶ፡ ወአስተጋብአ፡ ኀቶንያል፡ወልደ፡ ቄኔዝ፡ እኑሁ፡ ለካሌብ፡
ዘይንእስ፡ ወወሀቦ፡ አስካሃ፡ ወለቶ፡ ትኩኖ፡ ብእሲተ፡ ወሶበ፡ ለሐዊር፡ እመከራ፡ ኀቶንያል፡
ተስእሎ፡ ለአቡሃ[ይ]ጸግዋ፡ ዐፀደ፡ ወፍር፡ ወአንጐርጐረት፡ በዲበ፡አድግ፡ ወትቤ፡ ውስተ፡ ብሔረ፡
አዜብ፡ ፈኖከኒ፡ወይቤላ፡ ካሌብ፡ ምንተ፡ ኮንኪ፡ ወትቤሎ፡ አስ

(col. 2) ከ፡ ሀበኒ፡ በረከተ፡ እስመ፡ ብሔረ፡ አዜብ፡ ፈኖከኒ፡ ወወሀባ፡ ቤዛ፡ ማይ፡ ወወሀባ፡
ካሌብ፡ በከመ፡ ትፈቱ፡ ልባ፡ ኀሎት፡ ላዕላይ፡ ወኀሎት፡ ታሕታይ፡ክፍል፡ ፫ወደቂቀ፡ ዮባብ፡
ቀኔያዊ፡ ሐሙሁ፡ ለሙሴ፡ ዓርጉ፡ እምነ፡ ሀገረ፡ ፈንቄን፡ ምለለ፡ ደቂቀ፡ይሁዳ፡ ውስተ፡ ሐቅለ፡
ይሁዳዘመንገለ፡ አዜብ፡ ውስተ፡ ሙራደ፡ አረድ፡ ወሐረ፡ ወነበረ፡ ምስለ፡ ሕዝብ፡ ወሐረ፡ ይሁዳ፡

ምስለ፡ ስምዖን፡ እኩሁ፡ ወቀተልዎሙ፡ ለከናኔዎን፡ እለ፡ ይነብሩ፡ ሴፍር፡ ወአሕረምዋ፡
 ወአጥፍእዎ፡ ወሰመያ፡ ለሀገርኅርምተ፡ ወተዋረሳ፡ ይሁዳ፡ ለጋዛ፡ ወለደወላ፡ ወለአስቃሎን፡
 ወለደወላ፡ ወአቃሎን፡ ወደወላ፡ ወአዛጦን፡ ወደወላ፡ ወጺኦታቲሃ። ወሀለወ፡ እግዚአብሔር፡ ምስለ፡
 ይሁዳ፡ ወተዋረሰ፡ ደብረ፡ ወስእነ፡ ተዋርሶቶሙ፡ ለእለ፡ ይነብሩ፡ ውስተ፡ ቈለቶ፡ እስመ፡ ሰረገላ፡
 ዘሐዲን፡ ሎሙ፡ ወወሀብ፡ ለካሌብ፡ ኬብሮን፡ በከመ፡ ይቤ፡ ሙሴ፡ ወሠረዎሙ፡ እምህየ፡
 ለሠለስቱ፡ ደቂቀ፡ ኤናቅ፡ ወለኢያቤሴዎን፡ እለ፡ ይነብሩ፡ ኢየሩሳሌም። ወኢያስሰሎሙ፡ ደቂቀ፡
 ብንያሚ፡ ወነበሩ፡ ኢያቡሴዎን፡ ምስለ፡ ደቂቀ፡ ብንያም፡ ውስተ፡ ኢየሩሳሌም፡ እስከ፡ ዓቲ፡
 ዕለት። ከፍል፡ ፬ወዓርጉ፡ ቤተ፡ ዮሴፍ፡ ውስተ፡ ቤቴል፡ ወእግዚአብሔር፡ ምስሌሆሙ።
 ወተወሰኩ፡ ቤተ፡ ዮሴፍ፡ ውስተ፡ ቤቴል። ወስማ፡ ለይእቲ፡ ሀገርትካት፡ ሉዛ፡ ወርእዩ፡ ሰብአ፡
 መዓቅብ፡ ብእሴ፡ (እንዘ)ይወጽእ፡ እምነ፡ ሀገር፡ ወአጋዝዎ፤ ወይቤልዎ፡ አርእየነ፡ ምባአ፡ ለሀገር፡
 ወንግበር፡ ምስሌከ፡ ምሕረተወአርአዮሙ፡ እንተ፡ ኀበ፡ ይበውእዋ፡ ለሀገር፡ ወቃተል{.}ዋለይእቲ፡
 ሀገር፡ በአፈ፡ ሐዲን፡ ወለዝክቱስ፡ ብእሲ፡ ወአዝማዲሁ፡ አግዓዝዎ፡ ወአተወ፡ ውእቱ፡ ብእሲ፡
 ውስተ፡ ምድረ፡ ኬጤዎን፡ ወነደቀ፡ በህየ፡ ሀገረ፡ ወሰመየ፡ ስማ፡ ሉዛ፡ ወውእቱ፡ ኮነ፡ ስማ፡
 እስከ፡ ዮምክፍል፡ ፭ወኢያስሰሎሙ፡ ምናሴ፡ ለቤተ፡ ሳን፡ ወለአዋልዲሃ፡ ወለተ፡ አናኬ፡ ወእለ፡
 ይነብሩ፡ ጸር፡ ወለአ፡ ዋልዲሃ፡ ወእለ፡ ይነብሩ፡ ውስተመጌዶን፡ ወአዋልዲሃ፡ ወኢእለ፡ ይነብሩ፡
 ውስተ፡ ዮብልዓም፡ ወአዋልዲሃ፡ ወአኩዙ፡ ይነብሩ፡ ከናኔዎን፡ ውስተ፡ ዛቲ፡ ምድር። ወእምዝ፡
 ሶበ፡ ጸንዑ፡ እስራ

(col. 3) ኤል፡ መጽብሔ፡ ረሰይዎሙ፡ ለከናኔዎን፡ ወአጥፍእሰ፡ ኢያጥፍእዎሙ፡
 ክፍል፡ ፯ወኤፍሬምኒ፡ ኢያጥፍእሙ፡ ለከናኔዎን፡ እለ፡ ይነብሩ፡ ውስተ፡ ጋዜር፡ ወነበሩ፡ ከናኔዎን፡
 ማእከሎሙ፡ [ው]ስተ፡ ጋሴር፡ ወኮንዎሙ፡ መጽብሔ፡ ወዛብሎንሂ፡ ኢያጥፍእዎሙ፡ ለእለ፡
 ይነብሩ፡ ውስተ፡ ቄድሮስ፡ ወለእለ፡ ይነብሩ፡ ውስተ፡ አማን፡ ወነበሩ፡ ከናኔዎን፡ ማእከሎሙ፡
 ወኮንዎሙመጽብሔ፡ (ክፍል፡ ፯ወአሴርሂ)፡ ኢያጥፍእዎሙ፡ ለእለ፡ ይነብሩ፡ ውስተ፡ አካ፡ ወለእለ፡
 ይነብሩ፡ ሲዶናወለአሄላብ፡ ወለአኬዛብ፡ ወለሄሌካ፡ ወእፌቃወሮዎብ፡ ወነበረ፡ አሴር፡ ማእከለ፡
 ከናኔዎን፡ እለ፡ ይነብሩ፡ ውስተ፡ ይእቲ፡ ምድር፡ እስመ፡ ስእኑ፡ አጥፍአቶሙ፡ ክፍል፡
 ፰ወንፍታሌምኒ፡ ኢያጥፍእዎሙ፡ ለእለ፡ ይነብሩ፡ ውስተ፡ ቤተ፡ ሰሚስ፡ ወኢእለ፡
 ይነብሩ፡ ውስተ፡ ቤቴ(ኔስ)፡ ወነበረ፡ ማእከሎሙ፡ ለከናኔዎን፡ እለ፡ ሀለዉ፡ ይእተ፡ ምድረወእለ፡
 ይነብሩ፡ ውስተ፡ ቤተ፡ ሰሚስ፡ ውስተ፡ ቤተ፡ ኔክወአጠቅዎሙ፡ አሞሬዎን፡ ለደቂቀ፡ ዳን፡
 በውስተ፡ ደብር፡ እስመ፡ ኢያበውህዎሙ፡ ይረዱ፡ ውስተ፡ ቈላት፡ ወአጋዙ፡ አሞሬዎን፡
 ይነብሩ፡ ውስተ፡ ደብር። ምስናኖስ፡ ዘቦ፡ ውስቴቱ፡ ድበ፡ ወቄናጽለ፤ ወጸንዓ፡ እደዊሆሙ፡ ለቤተ፡
 ዮሴፍላዕለ፡ አሞሬዎን፡ ወኮንዎሙ፡ መጽብሔ፡ ወደብረ፡ አሞሬዎን፡ ለኢያሚዎን፡ ላዕለ፡
 ዘአቅራቢን፡ እለውስተ፡ ሉዓሌ፡ ኩኩሕ። ክፍል፡ ፱ወዓ{ር}ርገመልአከ፡ እግዚአብሔር፡ እምነ፡
 ገልገላ፡ ላዕለ፡ ቁላተ፡ ብካይ። ወይቤሎሙ፡ እግዚአብሔር፡ አውግእኩክሙ፡ እምነአ፡ ግብጽአ፡
 ወአግባእኩክሙአ፡ ውስተ፡ ምድርአ፡ እንተአ፡ መሐልኩአ፡ ለአበዊክሙአ፡ ከመ፡ አ፡ እሀብክሙአ፡
 ወእቤለክ{...}ሙአ፡ ኢየጋድግ፡ ኪዳንዩ፡ ዘምስሌክሙ፡ ለዓለም፡ ወአንትሙኒአ፡ ኢትትከየዱ፡
 ኪዳንአ፡ ውስተ፡ አ፡ ዛቲአ፡ ምድረአ፡ ወኢ፡ ለአማልክቲሆሙ፡ አ፡ ወኢትሰግዱአ፡ ሎሙአ፡
 ወለምስላቲሆሙ፡ ኒአ፡ ንሥቱአ፡ ወለግልፎሆሙኒአ፡ ቀጥቀጡአ፡ ወምሥዋዕቶሙኒ፡ ንሥቱአ፡
 ወኢሰማዕክሙአ፡ ቃልየአ፡ እመአ፡ ገበርክሙአ፡ ዘንተአ፡ አነ

F.97v

(col. 1) ኒአ፡ እቤአ፡ ኢይደግምአ፡ እንከአ፡ አሰስሎ፡ ቶሙአ፡ ለሕዝብአ፡ እለአ፡ እቤአ፡ ከመአ፡ አውፅአሙአ፡ ቅድሜክሙአ፡ ወይከውኑክሙ(አ፡ ለጎዘንአ፡ ወአማልክቲሆሙኒአ፡ ይከውኑክሙአ፡ ለዕቅፍትአ፡)(ወእምዝ፡ ሶበ፡ ይቤሎሙ፡ መልአከ፡ እግዚአብሔር፡ ለኩሉ፡ እስራኤል)፡ ዘንተ፡ ነገረ፡ ጸርኃ፡ ኩሉ፡ ሕዝብ፡ ወበከየ፡ ወበእንተ፡ ዝንቱ፡ ስመየ፡ ስሞ፡ ለውእቱመካን፡ ብካይ፡ ወሥዑ፡ በህየ፡ ለእግዚአብሔር፡ ከፍልጊ፡ ወፈነዎሙ፡ ኢያሱ፡ ለሕዝብ፡ ወአተዉ፡ ደቂቀ፡ እስራኤል፡ ኩሎሙ፡ ውስተ፡ አብያቲሆሙ፡ ወውስተ፡ ርስቶሙ፡ ከመ፡ ይትዋረስዋ፡ ለምድር፡ ወተቀንዩ፡ ሕዝብ፡ ለእግዚአብሔር፡ በኩሉ፡ መዋዕሊሁ፡ ለኢያሱ፡ ወበኩሉ፡ መዋዕሊሆሙ፡ ለሊቃነ፡ ኩሉ፡ እለ፡ ኖኃ፡ መዋዕሊሆሙ፡ እምድኅረ፡ ኢያሱ፡ ወኩሎሙ፡ እለ፡ አእመሩ፡ ኩሎ፡ ዘገብረ፡ እግዚአብሔር፡ ዐቢየ፡ ግብረ፡ ለእስራኤል፡ ወሞተ፡ ኢያሱ፡ ወልደ፡ ነዌ፡ ገብረ፡ እግዚእ፡ ወልደ፡ ፪ወ፤ ዓመት፡ ወቀበርዎ፡ ውስተ፡ ደብረ፡ ርስቱ፡ ውስተ፡ ተምናሳርኅ፡ ውስተ፡ ደብረ፡ ኤፍሬም፡ መንገለ፡ መሥዑ፡ ለደብረ፡ ኃዕስ፡ ወኩላ፡ ይእቲ፡ ትውልድ፡ አተዉኅበ፡ አበዊሆሙ፡ ወተንሥአ፡ ካልእ፡ ትውልድ፡ እምድኅራሆሙ፡ ኩሉ፡ እለ፡ የአምርዎ፡ ለእግዚአብሔር፡ ዘገብረ፡ ለእስራኤል፡ ክፍል፡ ፲፩፡ ወገብሩ፡ እስራኤል፡ እኪተ፡ በቅድመ፡ እግዚአብሔር፡ ወአምለኩ፡ በዓሊም፡ ወኃደግዎ፡ ለእግዚአብሔር፡ አምላክ፡ አበዊሆሙ፡ ዘአውፅአሙ፡ እምድረ፡ ግብጽ፡ ወተለዉ፡ አማልክተ፡ እምባዕድ፡ አማልክተ፡ ሕዝብእለ፡ ዓውዶሙ፡ ወሰገዱ፡ ሎሙ፡ ወአምዕዕዎ፡ ለእግዚአብሔር፡ ወኃደግዎ፡ ለእግዚአብሔር፡ ወአ፡ {...}ምለክዎ፡ ለበዓል፡ ወአስጣፎጤን፡ ወተምዕዓ፡ መዐተ፡ እግዚአብሔር፡ ላዕለ፡ እስራኤል፡ ወአግብአሙ፡ ውስተ፡ እደ፡ ፀሮሙ፡ እለ፡ ዓውዶሙ፡ ወኢክህሉ፡ ተቃውሞ፡ ቅድመ፡ ፀሮሙ፡ በኩሉ፡ ዘበርበርዎሙ፡ ወእደ፡ እግዚአብሔር፡ ላዕሌሆሙ፡ በእኪት፡ በከመ፡ ይቤ፡ እግዚአብሔር፡ ወበከመ፡ መሐለ፡ እግዚአብሔር፡ ወሣቀይዎሙ፡ ጥቀ፡ ወአቀመ፡ እግ

(col. 2) ዚአብሔር፡ መኳንንተ፡ ወአድኃኖሙ፡ እምእለ፡ ዒወውዎሙ፡ ወለመሳፍንቲሆሙኒ፡ ኢሰምዕዎሙ፡ እስመ፡ ዘመዉ፡ በተሊወ፡ አማልክት፡ ወሰገዱ፡ ሎሙ፡ ወአምዕዕዎ፡ ለእግዚአብሔር፡ ወኃደግዎ፡ ፍጡነ፡ ለፍኖት፡ እንተ፡ ባቲ፡ ሖሩ፡ አበዊሆሙ፡ ከመ፡ ኢይስምዑ፡ ቃለ፡ እግዚአብሔር፡ ወኢገብሩ፡ ከማሁ፡ ወሶበ፡ ዓቀመ፡ ሎሙ፡ እግዚአብሔር፡ መሳፍንተ፡ ወሀለወ፡ እግዚአብሔር፡ ምስለ፡ ውእቱ፡ መስፍን፡ ወአድኅኖሙ፡ እምእደ፡ ፀሮሙ፡ በኩሉ፡ መዋዕሊሁ፡ ለውእቱ፡ መስፍን፡ እስመ፡ ተሣሃሎሙ፡ እግዚአብሔር፡ እምነ፡ ሕማሞሙ፡ ዘበቅድመ፡ እለ፡ ይቀትልዎሙ፡ ወእምዝ፡ ሶበ፡ ሞተ፡ ውእቱ፡ መስፍን፡ ደገመ፡ ወይኤብሱ፡ ፈድፋድ፡ እምነ፡ አበዊሆሙ፡ ወየሐውሩ፡ ወይተልዉ፡ ድኅረ፡ አማልክተ፡ ባዕድ፡ ወያመልክዎሙ፡ ወይሰግዱ፡ ሎሙ፡ ወኢኃደጉ፡ እከዮሙ፡ ወኢገብኡ፡ እምነ፡ ፍኖቶሙ፡ እኪት፡ ወተምዕዓ፡ መዓተ፡ እግዚአብሔር፡ ላዕለ፡ እስራኤል፡ ወይቤ፡ እስመ፡ ኃደገ፡ ዝንቱ፡ ኪዳንየ፡ ዘአዘዝክዎሙ፡ ለአበዊሆሙ፡ ወኢሰምዑ፡ ቃልየ፡ ወአነኒ፡ ኢእደግም፡ እንከ፡ አሰስሎ፡ ብእሴ፡ እምቅድሜሆሙ፡ እምነ፡ ሕዝብ፡ እለ፡ አትረፈ፡ ኢያሱ፡ ወሞቱ፡ ከመ፡ አመከሮሙ፡ ቦሙ፡ ለእስራኤል፡ እመ፡ የዓቀቡ፡ ፍኖተ፡ እግዚአብሔር፡ ወአመ፡ የሐውሩ፡ ቦቱ፡ በከመ፡ የዐቅቡ፡ አበዊሆሙ፡ ወእመ፡ አልቦወአዕረፎሙ፡ እግዚአብሔር፡ ለእሉ፡ ሕዝብወኢያሰሰሎሙ፡ ወኢያግብአሙ፡ ውስተ፡ እዴሁ፡ ለኢያሱ፡ ከፍል፡ ፲፪ወዘአዕረፎሙ፡ እግዚአብሔር፡ ለእሉ፡ አሕዛብ፡ ከመ፡ ያመከሮሙ፡ ቦሙ፡

ለእስራኤል፡ ከሎሙ፡ እለ፡ ኢየአምሩ፡ ከሎ፡ ፀብአሙ፡ ለከናኔዎን፡ ዳእሙ፡ በእንተ፡ ትውልዶሙ፡ ለደቂቀ፡ እስራኤል፡ ከመ፡ ይምሐርዎሙ፡ ቀትለ፡ ወባሕቱ፡ እለ፡ ቅድሚያሆሙኒ፡ ወኢየአምረዎ፡ ለእሉ፡ ጎምስቱ፡ መሳፍንተ፡ ኢሎፍሊ፡ ወከሎ፡ ከነአን፡ ወሲዶና፡ ወኤዌዎን፡ እለ፡ ይነብሩ፡ ውስተ፡ ሊባኖስ፡ እምነ፡ ደብረ፡ በላሄርሞን፡ እስከ፡ ሙባአ፡ ኤማት፡ ወተርፉ፡ ከመ፡ ያመከሮሙ፡ በሙ(ለ)እስራኤል፡ ከመ፡ ያእምር፡ እ

(col. 3) መ፡ ይስምዑ፡ ትእዛዘ፡ እግዚአብሔር፡ ዘአዘዘሙ፡ ለአበዊሆሙ፡ በእደ፡ ሙሴ፡ ወነበሩ፡ ደቂቀ፡ እስራኤል፡ ማእከለ፡ ከናኔዎን፡ ወኬጤዮን፡ ወአሞሬዎን፡ ወፈዜዎን፡ ወኢያዌዎን፡ ወኢያቡሴዎን፡ ወነሥኡ፡ አዋልዲሆሙ፡ ሎሙ፡ አንስቲያሆሙ፡ ወአዋልዲሆሙኒ፡ ወወሀቡ፡ ለደቂቆሙ፡ ወአምለኩ፡ አማልክቲሆ፡ ሙ። ክፍል፡ 11፡ ወገብሩ፡ ደቂቀ፡ እስራኤል፡ እኩየ፡ ቅድመ፡ እግዚአብሔር፡ አምላኮሙ፡ ወአምለኩ፡ በዓሊም፡ ወአምሳለ፡ ወተምዕዓእግዚአብሔር፡ ላዕለ፡ እስራኤል፡ ወአግብአሙ፡ ውስተ፡ እደ፡ ከሳ፡ አርስቴም፡ ንጉሠ፡ ሶርያ፡ ወተቀንዩ፡ ለከሳ፡ አርስቴም፡ ደቂቀ፡ እስራኤል፡ ፳፬መተ፡ ወገዓሩ፡ ደቂቀ፡ እስራኤል፡ ጎበ፡ እግዚአብሔር፡ ወአቀመ፡ ሎሙ፡ እግዚአብሔር፡ መድኃኒተ፡ ለእስራኤል፡ ወአድኃኖሙ፡ ጎቶንያል፡ ወልደ፡ ቄዜዝ፡ እኑሁ፡ ለካሌብ፡ ዘይንእስ፡ ወተአዘዙ፡ ሎቱ፡ ወኮነ፡ ላዕሌሁ፡ መንፈስ፡ እግዚአብሔር፡ ወከነኖሙ፡ ለእስራኤል፡ ወወፅአ፡ ፀብአ፡ ወአግብአ፡ እግዚአብሔር፡ ውስተ፡ እዴሁ፡ ለከሳ፡ አርስቴም፡ ንጉሠ፡ ሶርያ፡ ወፀንዓት፡ እዴሁ፡ ላዕለ፡ ከሳ፡ ወአዕረፈት፡ ምድር፡ ፵፬መተ፡ ወሞተ፡ ጎቶንያል፡ ወልደ፡ ቄዜዝ፡ ክፍል፡ 12፡ ወደገሙ፡ ደቂቀ፡ እስራኤል፡ ገቢረ፡ እኩይ፡ ቅድመ፡ እግዚአብሔር፡ ወአጽንዖ፡ እግዚአብሔር፡ ለኤግሎን፡ ንጉሠ፡ ሞአብ፡ ላዕለ፡ እስራኤል፡ እስመ፡ ገብሩ፡ እኪተ፡ ቅድመ፡ እግዚአብሔር፡ ወአስተጋብአ፡ እግዚአብሔር፡ ላዕሌሆሙ፡ ከሎ፡ ደቂቀ፡ አሞን፡ ወአማሌቅ፡ ወሐረ፡ ወቀተሎሙ፡ ለእስራኤል፡ ወተዋረሰ፡ ሀገረ፡ ፊንቄን፡ ወተቀንዩ፡ ደቂቀ፡ እስራኤል፡ ለኤግሎም፡ ንጉሠ፡ ሞአብ፡ 13መተ፡ ወገዓሩ፡ ደቂቀ፡ እስራኤል፡ ጎበ፡ እግዚአብሔር፡ ወአመአቀመ፡ ሎሙ፡ እግዚአብሔር፡ መድኃኒተ፡ ናኦድሃ፡ ወልደ፡ ጌራ፡ ወልደ፡ ኢያሜን፡ ብእሴ፡ ዘክልኤሆን፡ እደዊሁ፡ የማኑ፡ ወፈነዉ፡ ደቂቀ፡ እስራኤል፡ አምሳ፡ ምስሌሁ፡ ለኤግሎም፡ ንጉሠ፡ ሞአብ፡ ወገብረ፡ ሎቱ፡ ናኦድ፡ መጥባሕተ፡ እንተ፡ ክልኤ፡ አፋሃ፡ እንተ፡ ስዝር፡ ኑጎ፡ ወቀነ

f.98r

(col. 1) ታ፡ ታሕተ፡ ቅናቱ፡ ውስተ፡ ኃቋሁ፡ መንገለ፡ የማኑ፡ ወአብአ፡ ሎቱ፡ አምኃሁ፡ ለኤግሎም፡ ንጉሠ፡ ሞአብ፡ ወኤግሎምስ፡ ቈጢጥ፡ ብእሲ፡ ውእቱ፡ ጥቀ፡ ወእምዝ፡ ሶበ፡ ፈጸመ፡ ናኦድ፡ ሎቱ፡ አምሳሁ፡ ወፈነዎሙ፡ ለእለ፡ ጾሩ፡ አምኃሁ-ወውእቱ፡ ተመይጠ፡ እምነ፡ ቤተ፡ አማልክት፡ ዘገልገል፡ ወይቤ፡ ብየ፡ ሀቡአ፡ ነገረ፡ ምስለ፡ ንጉሥ፡ እንተ፡ ባሕቲትከ፡ ወአዘዘ፡ ኤግሎም፡ ይፃእ፡ ከሎ፡ እምሳቤሁ፡ ወወፅአ፡ ከሎሙ፡ እለ፡ ይቀውሙ፡ ጎቤሁ፡ ወቦአ፡ ናኦድ፡ ጎቤሁ፡ ወይነብር፡ ውእቱ፡ ባሕቲቱ፡ ውስተ፡ ጽርሑ፡ ወኃጋይ፡ ውእቱ፡ ወይቤሎ፡ ናኦድ፡ ብየ፡ ነገረ፡ እግዚአ፡ ንጉሥ፡ ወተንሥአ፡ አግሎም፡ እምነ፡ ምንባሩ፡ ወቀርቦ፡ ወሶቦ፡ ተንሥአ፡ አልዓለ፡ ናኦድ፡ እዴሁ፡ እንተ፡ ፀጋም፡ ወመልሐ፡ መጥባሕቶ፡ እምነ፡ ገቦሁ፡ ዘየማን፡ ወረገዘ፡ ውስተ፡ ከርሡ፡ ለኤግሎም፡ ወአብአ፡ ሎቱ፡ እስከ፡ ለአታወበረሮ፡ እስከ፡ ዘባኑ፡ ወመልሐ፡ መጥባሕተ፡ እምነ፡ ከርሡ፡ ወወፅአ፡ ናኦድ፡ ጸናፌ፡ ወአፀወ፡ ጥጎተ፡ ጽርሕ፡ ላዕሌሁ፡ ወቀተረ፡

ወወዕአ፡ውእቱ፡ ወቦሑ፡ ደቁ፡ ወርእዩ፡ ወረከቡ፡ ጥጎተ፡(ጽርጎ)ዕዕወ፡ ወይቤሎ፡ ዮጊ፡ ባሕቲቱ፡ ይነብር፡ጽምወ፡ ውስተ፡ ምግጎሠ፡ ጽርሑ፡ ቀሰፋየ፡ ወጸንሑ፡ እስመ፡ ሐፍሩ፡ ወአልቦ፡ ዘኦርጎዎሙ፡ ጥጎተ፡ ጽርሕ፡ ወነሥኡ፡ መርሆ፡ ወኦርጎወ፡ ወረከብዎ፡ ለእግዚአሙ፡ ውዱቀ፡ ውስተ፡ ምድርምውተ፡ ወናኦድሰ፡ አምሰጠ፡ እስከ፡ እሙንቱ፡ይትሀወኩ፡ ወአልቦ፡ ዘአእመሮ፡ ወውእቱሰ፡ ኃለፈ፡ እምነ፡ አማልክቲሆሙ፡ ወአምሰወ፡ ውስተ፡ ሰይሮታ። (ወእምዝ፡ በጽሑ፡)ውስተ፡ ምድረ፡ እስራኤል፡ ወነፍሐ፡ ቀርነ፡ ውስተ፡ ደብረ፡ ኤፍሬም፡ወወረዱ፡ ምስሌሁ፡ እምነ፡ ደብረ፡ ደቂቀ፡ እስራኤል፡ ውእቱ፡ ቅድሜሆሙ፡ ወይቤሎሙ፡ ረዱ፡ትልዉኒ፡ እስመ፡ አግብአሙ፡ እግዚአብሔር፡ ለፀርነ፡ ውስተ፡ እዴነ፡ ለምአብ፡ ወረዱ፡ ወተለውዎ፡ ወአጎዙ፡ ምዕዳወ፡ ዮርዳኖስ፡ ዘሞአብ፡ ወኢያብሑ፡ ሰብአ፡ ይዕዱ፡ (ወዘ)ቀተልዎሙ፡ ለሞአብ፡በእማንቱ፡ መዋዕል፡ የአከል፡ እልፍ፡ ብእሴ፡ መስተቃትላን፡ ወኸሉ፡ ዕደወ፡ ኃይሎሙ፡ ወአልቦ፡ ዘአምሰጠ፡ እምኔሆሙ፡ ወኢአሐዱ፡ ብእሲ፡ ወገብ

(col. 2) ኡ፡ ሞአብ፡ በእማንቱ፡ መዋዕል፡ ውስተ፡ እዴሆሙ፡ ለእስራኤል፡ ወአዕረፈት፡ ምድር፡ ቸዓመተ። ወኩነኖሙ፡ ናኦድ፤ እስከ፡ ሞተ፡ ወእምድጎረ፡ ዝንቱ፡ ቆመ፡ ሴሜጌር፡ ወልደ፡ ሐናት፡ ወቀተሎሙ፡ ለኢሎፍሊ፡ ፯፻፡ ብእሴ፡ በጎበ፡ ማጎረስ፡ ላህም። ወውእቱኒ፡ አድጎኖሙ፡ ለእስራኤል። ክፍል፡ ፲፭፡፡ ወደገሙ፡ ገቢረ፡ እኩይ፡ቅድመ፡ እግዚአብሔር፡ ወናኦድሰ፡ ሞተ፡ ወአግብአሙ፡ እግዚአብሔር፡ ውስተ፡ እደ፡ ኢያሚን፡ ንጉሠ፡ ከናኔዎን፡ ዘነግሠ፡ በአሶር፡ ወመልአከ፡ ሰርዌሁ፡ ሲሳራ፡ወውእቱሰ፡ ይነብር፡ ውስተ፡ አሴሮት፡ ዘአሕዛብወ(ገዕሩ){.}ደቂቀእስራኤል፡ ጎበ፡ እግዚአብሔር፡ እስመ፡ ቦቱ፡፱ምእተ፡ ሰረገላተ፡ ዘጎሂን፡ ወውእቱሰ፡ አሕመሞሙ፡ ለእስራኤል፡ እንዘ፡ ይሣቅዮሙ፡ ፳፡ ዓመ(ተ)፡ ክፍል፡ ፲፯፡፡ ወዲቦራ፡ ብእሲት፡ ነቢት፡ ብእሲቱ፡ ለፊዶት፡ ይእቲ፡ ትኳንኖሙ፡ ለእስራኤልበእማንቱ፡ መዋዕል፡ ወዲቦራ፡ ትነብር፡ ጎበ፡ ፊንቃ፡ ማእከለ፡ ራማ፡ ወማእከለ፡ ቤቴል፡ ውስተ፡ደብረ፡ ኤፍሬም። ወዓርጉ፡ ጎቤሃ፡ ደቀ፡ እስራኤል፡ ከመ፡ ይትኩነኑ፡ ወፈነወት፡ ወጸውዓቶ፡ዲቦራ፡ ለባርቅ፡ ወልደ፡ አቤንሔም፡ እምነ፡ ቃዴስ፡ ንፍታሌም፡ ወትቤሎ፡ አኮኑ፡ ኪያከ፡ አዘዘ፡እግዚአብሔር፡ አምላክ፡ እስራኤል፡ ከመ፡ ትሖር፡ ውስተ፡ ደብረ፡ ታቦር፡ ወንሣእ፡ ምስሌከ፡እልፈ፡ እደወ፡ እምነ፡ ደቂቀ፡ ንፍታሌም፡ ወእምነ፡ ደቂቀ፡ ዛብሎን፡ ወእወስዶ፡ ጎቤከ፡ ጎበበ፡ ፈለገ፡ ቂሶን፡ ለሲሳራ፡ መልአከ፡ ሥረዊሁ፡ ለኢያሚን፡ ወሰረገላቲሁ፡ ወበዝጉ፡ ወገብአ፡ ውስተ፡ እዴከ፡ ወይቤላ፡ ባርቅ፡ እመ፡ ተሐውሪ፡ ምስሌየ፡ አሐውር፡ ወእመሰ፡ ኢተሐውሪ፡ ምስሌየ፡ ኢየሐውር፡ እስመ፡ ኢየአምር፡ዕለተ፡ እንተ፡ ባቲ፡ ይፈቅድ፡ እግዚአብሔር፡ይፈኑ፡ መልአከ፡ ምስሌየ፡ ወትቤሎ፡ ዲቦራ፡አሐውር፡ ምስሌከ። ወባሕቱ፡ አእምር፡ ከመኢይከውነከ፡ ክብረ፡ በፍኖት፡ እንተ፡ ሖርካ፡ እስመ፡ ውስተ፡ እደ፡ ብእሲት፡ ያገብአ፡ እግዚአብሔር፡ ለሲሳራ፡ ወተንሥአት፡ ዲቦራ፡ ወሐረት፡ምስለ፡ ባርቅ፡ እምነ፡ ቃዴስ፡ ወአዘዘሙ፡ ባርቅ፡ ለዛብሎን፤ ወንፍታሌም፡ በቃዴስ፡ ወዓርጉ

(col. 3) ምስሌሁ፡ ፪ብእሲ፡ ወዲቦራሂ፡ ዓርገት፡ ምስሌሁ፡ ወከቤር፡ ቄኔዝያዊ፡ ተፈልጠ፡ እምነ፡ ቃይም፡ እምነ፡ ደቂቀ፡ ኢየባብ፡ ሐሙሑ፡ ለሙሴ፡ ወተከለ፡ ትእይንቱ፡ ጎበ፡ ዕፅለበይን፡ ውስተ፡ ጸዓኒም፡ ጎበ፡ ዘቃዴስ፡ ወዜነውዎ፡ ለሲሳራ፡ ከመ፡ ዐርገ፡ ባርቅ፡ ወልደ፡ ኤቤኔሔም፡ ውስተ፡ ደብረ፡ ታቦር፡ ወአምጽአ፡ ሲሳረኸሎ፡ ሰረገላቲሁ፡ እስመ፡ ተስዓቱ፡ ፻ሰረገላተ፡ ዘሐፂን፡

ቦቱ፡ ወኸሉ፡ ሕዘቢሁ፡ እምነ፡ ጊሪሰቶ፡ ዘአሕዛብ፡ ውስተ፡ ፈለገ፡ ቂሳን፤ ወትቤሎ፡ ዲቦራ፡
ለባርቅ፡ ታንሥእ፡ እስመ፡ ዛቲ፡ ይእቲ፡ ዕለት፡ ያገብአ፡ እግዚአብሔርለሲሳራ፡ ውስተ፡ እዴከ፡
አኮኑ፡ እግዚአብሔር፡ የሐውር፡ ቅድሜከ፡ ወወረደ፡ ባርቅ፡ እምነ፡ ደብረ፡ ታቦር፡ ጭብእሲ፡
ይትልውዎ፡ ወአደንገዖ፡ እግዚአብሔር፡ ለሲሳራ፡ ወለኸሉ፡ ሰራዊቱ፡ ወለኸሉ፡ ትእይንቱ፡ ዓውደ፡
ቆሙ፡ ቅድመ፡ ባረቅ፡ በአፈ፡ ኀዲን፡ ወወረደ፡ ሲሳራ፡ እምነ፡ ሰረገላቲሁ፡ ወጐየ፡ በእግሩ፡
ወዴገኖ፡ ባርቅ፡ ወተለወ፡ ሰረገላቲሁ፡ ወዴገነ፡ ትዕይንቶ፡ እስከ፡ ሐቅለ፡ ገዳም፡ ወሞተ፡ ኸሉ፡
ትእይንተ፡ ሲሳራ፡ በአፈ፡ ሐዲን፡ ወኢተርፈ፡ ወኢአሐዱ፡ ወሲሳራ፡ ጐየ፡ በእግሩ፡ ውስተ፡
ትዕይንተ፡ ኢያኤል፡ ብእሲተ፡ ካቤር፡ ቄኔያው፡ እስመ፡ ሰላም፡ ውእቱ፡ ማእከሎሙ፡ ለኢያቤን፡
ንጉሠ፡ አርር፡ ወማእከለ፡ ቤተ፡ ካቤር፡ ቃንያዊ፡ ወወፅአት፡ ኢያኤል፡ ወተቀበለቶ፡ ለሲሳራ፡
ወትቤሎ፡ ገኝሥ፡ እግዚእየ፡ ኀቤየ፡ ወኢትፍራህ፡ ወገኝሥ፡ ኀቤሃ፡ ውስተ፡ ደብተራ፡
ወከደነቶሠቀ፡ ወይቤላ፡ ሲሳራ፡ አስትይኒ፡ ንስቲተ፡ ማ

F.98v

(col. 1) የ፡ እስመ፡ ጸማእኩ፡ ወፈትሐት፡ ሣዕረ፡ ሀሊብ፡ ወአስተየቶ፡ ወከደነቶ፡ ገጽ፡ ወይቤላ፡
ቁሚኀብ፡ ኖኀተ፡ ደብተራ፡ እመቦ፡ ዘመጽአ፡ ኀቤኪ፡ ወይቤለኪ፡ ቦሁ፡ ዘሀሎ፡ ዝየ፡ ብእሲ፡
በሊአልቦ፡ ወነሥአት፡ ኢያኤል፡ ብእሲተ፡ ከቤር፡ መታከለ፡ ደብተራ፡ ወእብነ፡ በካልእት፡ እዴሃ፡
ወቦአት፡ ኀቤሁ፡ ጽሚተ፡ ወጸቀወት፡ ወተከለት፡ ውእተ፡ መትከለ፡ ውስተ፡ መላትሒሁ፡
ወጐድአት፡ እስከ፡ ጸመረቶ፡ ውስተ፡ ምድር፡ ወተራገፀ፡ ውእቱ፡ በማእከለ፡ እገሪሃ፡ ወተጠሰየ፡
ወሞተ፡ ወበጽሐ፡ ባርቅ፡ እንዘ፡ ይዴግኖ፡ ለሲሳራ፡ ወወፅአት፡ ኢያኤል፡ ወተቀበለቶ፡ ለባርቅ፡
ወትቤሎ፡ ነዓ፡ አርእየከ፡ ብእሴ፡ ዘተኝሥሥ፡ ወቦአ፡ ኀቤሃ፡ ወረከቦ፡ ለሲሳራ፡ ውዱቀ፡ በድኖ፡
ወመትከል፡ ውስተ፡ መልታሕቱ፡ ክፍል፡ ፲፯ ወአኀሠሮ፡ እግዚአብሔር፡ ለኢያቤን፡ ንጉሠ፡ ከናኦን፡
በይእቲ፡ ዕለት፡ በቅድሚሆሙ፡ ለደቂቀ፡ እስራኤል፡ ወሐረት፡ {...} እዴሆሙ፡ ደቂቀ፡ እስራኤል፡
ወጸንዓት፡ ላዕለ፡ ኢያቤን፡ እስከ፡ አጥፍአቶ፡ ለኢያሚን፡ ንጉሠ፡ ከናኦን፡ ክፍል፡ ፲፰፡ ወኀለየት፡
ዲቦራ፡ በይእቲ፡ ዕለት፡ ባርቅ፡ ወልደ፡ አቤንሔም፡ ወትቤ፡ እንዘ፡ ተኀሊ፡ ሶበ፡ አኃዙ፡
መሳፍንተ፡ እስራኤል፡ በሕሊና፡ ሕዝብ፡ ባ(ር)ክዎ፡ ለእግዚአብሔር፡ ስምዑ፡ ነገሥት፡ ወአጽምዑ፡
መኳንንት፡ ጽኑዓን፡ አንሰ፡ አሐሊ፡ ለእግዚአብሔር፡ አምላክ፡ እስራኤል፡ እግዚአ፡ በጽዓትከ፡
እምነ፡ ሴይር፡ ሶበ፡ ተንሣእከ፡ እምነ፡ ሐቅለ፡ ኤዶምምድር፡ አድለቅለቀት፡ ወስማይ፡ ደንገፀት፡
ወደመናትኒ፡ አንጠብጠቡ፡ ማየ፡ ወአድባር፡ ተሀውሰ፡ እምቅድመ፡ እግዚአብሔር፡ ዝንቱ፡
ሲናእምቅድመ፡ እግዚአብሔር፡ አምላክ፡ እስራኤል፡ በመዋዕለ፡ ሴማገር፡ ወልደ፡ ቄናት፡
ወበመዋዕለ፡ ኢያኤል፡ ኀደጉ፡ ፍናዎ፡ ወሐሩ፡ ፍናወመብእስ፡ ፍናወ፡ ግፍቱዓ፡ ወሐልቁ፡
መፈከራን፡ እምነ፡ እስራኤል፡ ወኀልቁ፡ እስከ፡ ተንሥአት፡ ዲቦራ፡ እስመ፡ ቆመት፡ እመ፡
ለእስራኤል፡ ሶበ፡ ኀረየ፡ እግዚአብሔር፡ ሐዲሲተ፡ አሜሃ፡ ኀብስተ፡ ሰገም፡ ምስለ፡ ፍርሃት፡ ንዋየ፡
ሐቅል፡ አርማሕ፡ አርባዕቱ፡ እልፍ፡ ውስተ፡ እስራኤል፡ ልብያን፡ እለ፡ ይኤዝዙ፡ ውስተ፡
እስራኤል፡ ኃያላን፡ ሕዝብ፡ ባርክዎ፡ ለእግዚአብሔር፡ እለ፡ ትዔዓኑ፡ ውስተ፡ አእዱግ፡ ጽዕድዋን፡
ወትነብሩ፡ ውስተ፡ በሐውርት፡ ወእለ፡ ተሐውሩ፡ ውስተ፡ ፍኖት፡ ንብቡ፡ ቃለክሙ፡ ወስንቅዉ፡
ማእከለ፡ ፍሡሐን፡ በህየ፡ ይሁቡ፡ ጽድቀ፡ ለእግዚአብሔር፡ ወጽድቀ(ጽኑ)ዓን፡ አሜሃ፡

(ወረደ፡ውስተ፡ በሐውር)ተ፡ እስራኤል፡ አህጉሪሁ፡ ሕዝበ፡ እግዚአብሔር፡ ተንሥኢ፡ ተንሥኢ፡ ዲበራ። ተንሥኢ፡ ተንሥኢ፡ ወንብቢ፡ ማኅሌተ፡ ተንሥኢ፡ ባርቅ።

(col. 2) ወዲውው፡ ዪዋከ፡ ባርቅ፡ ወልደ፡ አቤሔም፡ አሜሃ፡ ወረደ፡ ነፋዲት፡ ኀበ፡ ዐበይተ፡ ሕዝበ፡ እግዚአብሔር፡ ወረደ፡ ሊተ፡ ውስተ፡ ኃያላን፡ እምነየ፡ ኤፍሬም፡ ሠርዎሙ፡ ለአማሌቅ፡ ድጎሬከ። ብንያም፡ ውስተ፡ ሕዝብከ፡ እምነየ፡ ወረደ፡ ማኪር፡ ይፍትኑ፡ ወእምነየ፡ ዛብሎን፡ እለ፡ ይእኅዙ፡ በትረ፡ ጸሐፊ፡ እግዚአብሔር፡ ይፀብእ፡ ሊተ፡ ወእምነየ፡ ኃያላን፡ እምነየ፡ ወትረ፡ በኃያላን፡ ይሳኮር፡ ምስለ፡ ዲበራ፡ ወይሳኮር፡ ወልደ፡ ባርቅ፡ ወፈነው፡ አጋራኒሁ፡ ውስተ፡ ቈላት፡ ውስተ፡ አፍለ(በ)ድ፡ ሮቤል፡ ዐቢይ፡ ጥይቅና፡ ልቡ፡ ለምንት፡ ሊተ፡ ትነብር፡ ማእከለ፡ ማሴፊታም፡ ከመ፡ ትስማዕ፡ እለ፡ ይትፋጸዩ፡ ኖሎት፡ በአፍላገ፡ ሮቤል፡ ዓቢያን፡ ፈታንያን፡ ልብ፡ (ገለአድ፡ ውስተ)፡ ማዕዶተ፡ ዮርዳኖስ፡ ኀደረ፡ ዳን፡ ለምንት፡ ይነብር፡ ውስተ፡ ማዕዶተ፡ አሕማር፡ ወአሴርስ፡ ነበረ፡ ውስተ፡ ሐይቀ፡ ባሕር፡ ውስተ፡ ወሰኑ፡ ነበረ፡ ዛብሎን፡ ሕዝብ፡ ዘአየረ፡ ነፍሰ፡ ለምት፡ ወንፍታሌም፡ ውስተ፡ መልዕልተ፡ ሐቅል፡ ወመጽኡ፡ ነገሥት፡ ወተቃተሉ፡ ውእተ፡ አሚረ፡ ተቃተሉ፡ ነገሥተ፡ ከናአን፡ በተና{.}{..}ኀበ፡ ማየ፡ መጌድ፡ ተአገለ፡ ብሩረ፡ ወኢነሥኦ፡ እምስማይ፡ ተፀብቡ፡ ከዋክብት፡ እምፍኖቶሙ። ወተቃተሉ፡ ምስለ፡ ሲሳራ፡ ወአውፅአሙ፡ ፈለገ፡ ቂሲን፡ ወፈለገ፡ ቂዴሜን፡ ፈለገ፡ ቂሶንነፍስየ፡ ጽንዒ፤ ወይእተ፡ አሚረ፡ ተቀጥቀጠ፡ ሰኩና፡ አፍራሲሆሙ፡ እምረዊጽ፡ ረድኤተ፤ ወኀያላኒሁ፡ ይርግምዎ፡ ለማዘር፡ ይቤ፡ መልአከ፡ እግዚአብሔር፡ ወይቤ፡ መርገመ፡ ርግምዎሙ፡ ለእለ፡ የሐድርዋ፤ እስመ፡ ኢመጽኡ፡ ውስተ፡ ረድኤተ፡ እግዚአብሔር። እምነ፡ መስተቃትላን። ኑዓን። ቡርከተ፡ ትኩን፡ ኢያኤል፡ ብእሲተ፡ ብእሲተ፡ ካሌርቄኔያ፡ እምነ፡ አንስት፡ ቡርከት፡ በውስተ፡ ደብተራ፡ ማየ፡ ሰአለ፡ ወሐሊበ፡ ወሀበቶ፡ ወበሐይገን፡ ዐቢይ፡ ዐቅረበት፡ ሎቱ፡ ዕቋነ፡ በእዴሃ፡ እንተ፡ ፀጋም፡ ወተመጠወት፡ መትከለ፡ ወበየማና፡ ጐድአት፡ ወቀተለቶለሲሳራ፡ ወቀጥቀጠቶ፡ ርእሶ፡ ወደመቀቶ፡ መልታሕቶ፡ ወተራገፀ፡ በማእከለ፡ እገሪሃ፡ ወበኀበ፡ ተራገጸ፡ በህየ፡ ሐሰረ። ወእንተ፡ መስኮት፡ ትሔውጽ፡ እሙ፡ ለሲሳራ፡ እንተ፡ ሰቅሰቅ፡ ትሬኢ፡ እመቦ፡ ዘገብአ፡ (እምኀበ፡ ሢሣራ)

(col. 3) በጺሐ፡ ወለበይነ፡ ምንትድኀረ፡ ስረገላሁ፡ ለሲሳራ፡ በጺሐ፡ ወበበይነ፡ ምንት፡ ጐንደየ፡ እግረ፡ ስረገላቲሁ፡ ጠቢባት፡ ላእክቲሃ፡ ያውሥአሃ፡ እማንቱስ፡ አውሥአሃ፡ በከመ፡ ቃለ፡ ይእቲኒ፡ ትሰጠዎን፡ ሎቶን፡ አኮኑ፡ ይረከብ፡ እንዘ፡ ይትከፈል፡ ምህርከ፡ ወይትአረክ፡ አዕርክተ፡ በላዕለ፡ አዕርክቲሆሙ፡ ለኃያላን፡ በርበረ፡ ኃያላን፡ ለሲሳራ፡ ምሕርካ፡ ኃያላን፡ አሰቀ፡ ኀያል፡ ወአስቃተ፡ {...}ውስተ፡ ክሳድ፡ ዘበርበር፡ ከማሁ፡ ለይትኀጐሉ፡ ከሎሙ፡ ፀርከ፡ እግዚአ፡ እለስ፡ ያፈቅሩከ፡ ከመ፡ ሠርቀ፡ ፀሐይ፡ በኃይሉ፡ ወአስረፈት፡ ምድር፡ ቫዓመተ። ከፍል፡ ፲፱፡ ወገብሩ፡ ደቂቀ፡ እስራኤል፡ እኩየ፡ በቅድመ፡ እግዚአብሔር፡ ወአግብአሙ፡ ውስተ፡ እደ፡ ምድያም፡ ፯ዓመተ፡ ወጸንዓ፡ እዴሆሙ፡ ለምድያምላዕለ፡ እስራኤል፡ ወገብሩ፡ ሎሙ፡ ደቂቀ፡ እስራኤል፡ በዓታተ፡ ወአጽዋናተ፡ ውስተ፡ አድባር፡ ወውስተ፡ አጽዳፍ። ወእምዝ፡ ሶበ፡ ይዘርኡ፡ ሰብአ፡ እስራኤል፡ የዓርጉ፡ ምድያም፡ ወአማሌቅ፡ ወደቂቀ፡ ጽባሕ፡ የዐርጉ፡ ላዕሌሆሙ፡ ወይተዓዩኑ፡ ዲቤሆሙ፡ ወያማስኑ፡ ሎሙ፡ ፍሬ፡ ገራውሂሆሙ፡ እስከ፡ ይበጽሑ፡ ውስተ፡ ጋዛን፡ ወኢያትረፋ፡ ሎሙ፡ ወኢምንትኒ፡ በዘ፡ የሐይዉ፡ ለእስራኤል፡ መራእዮሙኒ፡ ወላህሞሙኒ፡ ወአዕዱኅሙኒ፡ ወእንስሳሆሙኒ፡ ወተአይኒሆሙ፡ ያመጽኡ፡ ወከመ፡ አንበጣ፡ ብዝሆሙ፡ ወአልቦ፡ ኀልቄ፡

ለእሙንቱ፡ ወአግማሊሆሙ፡ ያመጽኡ፡ ውስተ፡ ምድረ፡ እእስራኤል፡ ከመ፡ ያማስንዋ፡ ወነደዩ፡ ጥቀ፡ እስራኤል፡ እምቅድመ፡ ምድያም፡ ወገግሩደቂቁ፡ እስራኤል፡ ኀበ፡ እግዚአብሔር፡ ክፍል፡ ፳። ወሶበ፡ ጸርሑ፡ ደቂቀ፡ እስራኤል፡ ኀበ፡ እግዚአብሔር፡ በእንተ፡ ምድያም፡ ፈነወ፡ ሎሙ፡ እግዚአብሔር፡ ብእሴ፡ ነቢየ፡ ለደቂቀ፡ እስራኤል፡ ወይቤሎሙ፡ ከመዝ፡ ይቤ፡ እግዚአብሔር፡ አምላክ፡ እስራኤል፡ አነ፡ ውእቱ፡ ዘአምጸእኩክሙ፡ እምድረ፡ ግብጽ፡ እምነ፡ ቅንዩት፡ ወአድኃንኩክሙ፡ {...}እምነ፡ እዴሆሙ፡ ለግብጽ፡ ወእምነ፡ ኩሉ፡ እለይሳቅዩክሙ፡ ወአውጸእክዎሙ፡ እምነ፡ ቅድ

f.99r

(col. 1) መ፡ ገጽክሙ፡ ወወሀብኩክሙ፡ ምድሮሙ፡ ወእቤለክሙ፡ አነ፡ ውእቱ፡ እግዚአብሔር፡ አምላክክሙ፡ ወኢትፍርሀ፡ አማልክተ፡ አሞሬዎን፡ እሉ፡ እለ፡ ትነብሩ፡ ውስተ፡ ምድሮሙ፡ አንትሙ፡ ወኢሰማዕክሙኒ፡ ቃልየ፡ ክፍል ፳፩፡ ወመጽአ፡ መልአክ፡ እግዚአብሔር፡ ወነበረ፡ ታሕተ፡ ዕፅ፡ እንተ፡ ኤፍራታ፡ ዘዮአስ፡ አቡሁ፡ ለኢያዜሪ፡ ወጌዴዎን፡ ወልዱ፡ ይዘብጥ፡ ስርናየ፡ በውስተ፡ ዓውዱ፡ ከመ፡ ያምሥጥ፡ እምነ፡ ቅድሚሆሙ፡ ለምድያም፡ ወአስተርአዮ፡ መልአክ፡ እግዚአብሔር፤ ወይቤሎ፡ እግዚአብሔር፡ (ምስሌክ፡ ጽኑዓ)፡ ኃይል፡ ወይቤሎ፡ ጌዴዎንኦሆ፡ እግዚአ፡ እግዚእየ፡ ወእመሰ፡ ሀለወ፡ እግዚአብሔር፡ ምስሌነ፡ ለምንት፡ ረከበተነ፡ ኩሉ፡ ዛቲ፡ እኪት፡ ወአይቱ፡ ውእቱ፡ ኩሉ፡ ሰብሐቲሁ፡ ኩሉ፡ ዘነገሩነ፡ አበዊነ፡ ወይቤሉነ፡ እምነ፡ ግብጽ፡ ወአውፅአሙ፡ ለአበዊነ፡ እግዚአብሔር፡ ወይእዜሰ፡ ኃደገነ፡ እግዚአብሔር፡ ወአግብአነ፡ እግዚአብሔር፡ ውስተ፡ እደ፡ ምድያም፡ ወነጸሮ፡ መልአክ፡ እግዚአብሔር፡ ወይቤሎ፡ ሖር፡ በኃይልክ፡ ወአድኅኖሙ፡ ለእስራኤል፡ እምእደ፡ ምድያም፡ ወናሁ፡ ፈነወኩክ፡ ወይቤሎ፡ ጌዴዎን፡ ኦሆ፡ እግዚአ፡ በምንት፡ አድኅኖሙ፡ ለእስራኤል፡ ወናሁአእላፍየኒ፡ ውሑድ፡ በውስተ፡ ምናሴ፡ ወአነኒ፡ ንኡስ፡ በቤተ፡ አቡየ፡ ወይቤሎ፡ መልአክ፡ እስመ፡ እግዚአብሔር፡ ሀለወ፡ ምስሌክ፡ ወትቀትሎሙ፡ ለምድያም፡ ከመ፡ አሐዱ፡ ብእሲወይቤሎ፡ ጌዴዎን፡ እመ፡ ረከብኩ፡ ሞገስ፡ ቅድመ፡ አዕይንቲክ፡ ግበር፡ ሊተ፡ ተአምረ፡ ከመ፡ አንተ፡ ውእቱ፡ ዘተናገርክ፡ ምስሌየ፡ ኢትሖር፡ እምዘየ፡ እስከ፡ እገብእ፡ ኀቤክ፡ ወአመጽእመሥዋዕትየ፡ ወእሠይም፡ ቅድሚክ፡ ወይቤሎ፡ አነ፡ ውእቱ፡ ወእፀንሐክ፡ እስከ፡ ትገብእ፡ ወሖረ፡ ጌዴዎን፡ ወገብረ፡ ማኅስአ፡ {...}ጠሊ፡ ወጸፍንታ፡ ናእት፡ ወአንበረ፡ ሥጋ፡ ውስተ፡ ከፈር፡ ወወደየ፡ ደሞ፡ ውስተ፡ መቅጹት፡ ወወሰደ፡ ሎቱ፡ ኀበ፡ ዕፅ፡ ወአቅረበ፡ ሎቱ፡ ወይቤሎ፡ መልአክ፡ እግዚአብሔር፡ ንሣእ፡ ሥጋሁ፡ ወኅብስተ፡ ናእት፡ ወሲሞ፡ ውስተ፡ ውእቱ፡ ኩኩ

(col. 2) ሕ፡ ወከዐው፡ ደሞ፡ ወገብረ፡ ከማሁ፡ ከፍል፡ ፳፪፡ ወአልዓለ፡ መልአክ፡ እግዚአብሔር፡ በትሮ፡ ወለከፎ፡ ለውእቱ፡ ሥጋ፡ ወለውእቱ፡ ናእት፡ ወፅአት፡ እሳት፡ እምነ፡ ይእቲ፡ ኩኩሕ፡ ወበልአቶ፡ ለውእቱ፡ ሥጋ፡ ወለውእቱ፡ ናእት፡ ወሖረ፡ መልአክ፡ እግዚአብሔር፡ እምአዕይንቲሁ፡ ወአእመረ፡ ጌዴዎን፡ ከመ፡ መልአክ፡ እግዚአብሔር፡ ውእቱ፡ ወይቤ፡ ጌዴዎን፡ ኦእግዚአ፡ እስመ፡ ርኢኩ፡ መልአክ፡ እግዚአብሔር፡ ገጽ፡ በገጽ፡ ወይቤሎ፡ እግዚአብሔር፡ ሰላም፡ ለከ፡ ኢትፍራህ፡ ኢትመውት፤ ወነደቀ፡ ጌዴዎን፡ በህየ፡ ምሥዋዓ፡ ለእግዚአብሔር፡ ወሰመዮ፡ ሰላም፡ እግዚአብሔር፡ እስከ፡ ዛቲ፡ ዕለት፡ ወእንዘ፡ ዓዲሁ፡ ሀለወ፡ ውስተ፡ ኤፍራታ፡

አቡዮ፡ ረዳእየ፡ ክፍል፡ ፳፫፡ ወእምዝ፡በይእቲ፡ ሌሊት፡ ይቤሎ፡ እግዚአብሔር፡ ንሣእ፡ ለከ፡
 ላህመ፡ መግዝእ፡ ዘአቡከ፡ ወካልኦ፡ ላህመ፡ ዘ፯፡ ዓመት፡ ወንስት፡ ምሥዋዖ፡ ለበዓል፡ ዘአቡከ፡
 ወምስለ፡ ዘላዕሌሁ፡ ስብር፡ ወንድቅ፡ ቦቱ፡ ምሥዋዓ፡ ለእግዚአብሔር፡ አምላክከ፡ ዘአስተርአየከ፡
 በውስተ፡ ደብረ፡ ማዕከከ፡ ዘለዝንቱ፡ ደወል፡ ወንሣእ፡ ካልኦ፡ ላህመ፡ ወግበሮ፡ መሥዋዕተ፡
 በዕፀው፡ ዘሰበርከ፡ ወነሥኦ፡ ጌዴዎን፡ ፲ተ፡ እደወ፡ ወእምነአግብርቲሁ፡ ወገብረ፡ በከመ፡ ይቤሎ፡
 እግዚአብሔር፡ ወእምዝ፡ ሶበ፡ ፈርሃ፡ ቤተ፡ አቡሁ፡ ወሰብኦ፡ ሀገሩ፡ ከመ፡ ይግበር፡
 መዓልተ፡ ገብረ፡ ሌሊተ፡ ወጌሱ፡ በጽባሕ፡ ሰብኦ፡ ሀገርወረከብዎ፡ ንሱተ፡ ለምሥዋዓ፡ በዓል፡
 ወምስል፡ ዘላዕሌሁ፡ ስብር፡ ወላህም፡ መግዝዕ፡ ግቡር፡ ቦቱ፡ በውስተ፡ ምሥዋዕ፡ ዘነደቀ፡
 ወተበሀሉ፡ በበይናቲሆሙ፡ መኑ፡ ገብረ፡ ዘንተ፡ ግብረ፡ ወኅሠሡ፡ ወኅተቱ፡ ወይቤሉ፡
 ጌዴዎን፡ ወልደ፡ ዮአስ፡ ገብረ፡ ዘንተ፡ ግብረ፡ ወይቤልዎ፡ ሰብኦ፡ ሀገር፡ ለዮአስ፡ አምጽእ፡
 ወልድከ፡ ይቅትልዎ፡ እስመ፡ ነሠተ፡ ምሥዋዓ፡ በዓል፡ ወሰበረ፡ ዘላዕሌሁ፡ ምስለ፡ ወይቤሎሙ፡
 ዮአስለሰብእ፡ እለ፡ ቆሙ፡ ላዕሌሁ፡ አንትሙኑ፡ ይእዜ፡ ትትበቀሉ፡ ሎቱ፡ ለበዓል፡ አው፡
 አንትሙ፡ ታድኅንዎ፡ ከመ፡ ትቅትሉ፡ ዘገፍኦ፡ ወእመስ፡

(col. 3) አምላክ፡ ውእቱ፡ እስከ፡ ይበጽሕ፡ ለይሙት፡ ዘገፍኦ፡ ወይትቤቀል፡ ሰሊሁ፡ ለዘ፡ ነሠተ፡
 ምሥዋዒሁ፡ ወሰመዖ፡ በይእቲ፡ ዕለት፡ ዓባይ፡ በዓል፡ እንዘ፡ ይብሉ፡ ይትቤቀል፡ በዓል፡ እስመ፡
 ነስተ፡ ምሥዋዖ፡ ክፍል፡ ፳፬፡ ወኩሉ፡ ምድያም፡ ወአማሌቅ፡ ወደቂቀ፡ ጽባሕ፡ ተጋብሉ፡ ላዕሌሁ፡
 ወዓደዉ፡ ወህደሩ፡ ውስተ፡ ቈላተ፡ ኢያዝራኤል፡ ወአጽንዖ፡ መንፈስ፡ እግዚአብሔር፡ ለጌዴዎን፡
 ወነፍሐ፡ ቀርነ፡ ወወውዐ፡ አብኤዜር፡ በድኅሬሁ፡ ወፈነወ፡ መልእክተ፡ ውስተ፡ ኩሉ፡ ምናሴ፡
 ወአውየወ፡ ውእቱኒ፡ እምድኅሬሁ፡ ወፈነወ፡ መልእክት፡ ውስተ፡ አሴር፡ ወውስተ፡ ዛብሎን፡
 ወንፍታሌም፡ ወዓርጉ፡ ወተቃተልዎሙ፡ ወይቤ፡ ጌዴዎን፡ ለእግዚአብሔር፡ እመ፡
 ታድኅኖሙ፡ ለእስራኤል፡ በእዴየ፡ በከመ፡ ትቤ፡ ናሁ፡ አነእሰፍሕ፡ ፀምረ፡ ብዙ{.}ተ፡ ውስተ፡
 ዐውድወእምከመ፡ ወረደ፡ ጠል፡ ውስተ፡ ፀምር፡ ባሕቲቱ፡ ወኩላ፡ ምድር፡ ይቡስ፡ አእምር፡
 እንከ፡ ከመ፡ ታድኅኖሙ፡ ለእስራኤል{.}በእዴየ፡ በከመ፡ ትቤ፡ ወኮነ፡ ከማሁ፡ ወጌስ፡ ጌዴዮን፡
 በሳኒታ፡ ወአዖሮ፡ ለውእቱ፡ ፀምር፡ ወወፅኦ፡ ማይ፡ እምነ፡ ውእቱ፡ ፀምር፡ ምልኦ፡ አይገን፡
 ወይቤ፡ ጌዴዎን፡ ለእግዚአብሔር፡ ኢትትመዓዕ፡ በመዓት፡ ላዕሌየ፡ ወእንግረከ፡ ካዕበ፡ ፩ፀምር፡
 ይኩን፡ ይቡስ፡ እንተ፡ ባሕቲቱ፡ ወውስተ፡ ኩሉ፡ ምድር፡ ይረድ፡ ጠል፡ ወገብረ፡ ከማሁ፡
 እግዚአብሔር፡ በይእቲ፡ ሌሊት፡ ወኮነ፡ ይቡስ፡ ፀምር፡ ባሕቲቱ፡ ወውስተ፡ ኩሉ፡ ምድር፡ ወረደ፡
 ጠልወጌስ፡ ሮብአም፡ ውእቱ፡ ጌዴዎን፡ ወኩሉ፡ ሕዝብ፡ ዘምስሌሁ፡ ወኃደሩውስተ፡ ምድረ፡
 አሮኤድ፡ ወትዕይንቶሙ፡ ለምድያም፡ እመንገለ፡ መስዕ፡ መንገለ፡ ምሥዋዕ፡ ዘአበሬ፡ ውስተ፡ ቈላ፡
 ክፍል፡ ፳፭፡ ወይቤሎ፡ እግዚአብሔር፡ ለጌዴዎን፡ ብዙኅ፡ ሕዝብ፡ ዘምስሌከ፡ ከመ፡ ዘኢይክል፡
 አግብአቶሙ፡ ለምድያም፡ ውስተ፡ እዴሆሙ፡ ከመ፡ ኢይትመከሁ፡ እስራኤል፡ ላዕሌየ፡ ወኢይበሉ፡
 እዴየ፡ አድኅነተኒ፡ ወይቤሎ፡ እግዚአብሔር፡ ንግሮሙለሕዝብ፡ ወበሎሙ፡ ዘይፈርህ፡ እምኔከሙ፡

F.99v

(col. 1) ወፈራህ፡ ለይግባእ፡ እምኅበ፡ ሕዝብ፡ ወተመይጡ፡ እምነ፡ ደብረ፡ ገለአድ፡
 ወገብኦ፡ እምነ፡ ሕዝብ፡ ክልኤ፡ እልፍ፡ ወ፳፫፡ ወተርፉ፡ እልፍክፍል፡ ፳፯፡ ወይቤሎ፡
 እግዚአብሔር፡ ለጌዴዮን፡ ዓዲ፡ ብዙኅ፡ ሕዝብ፡ አውርዶሙ፡ ኅበ፡ ማይ፡ ወአመከሮሙ፡

ለከ፡እምህየ፡ ወኸሉ፡ ዘአነ፡ እቤለከ፡ እሙንቱ፡ይሖሩ፡ ምስሌከ፡ ይሖሩ፡ ወዘእቤለከ፡ ኢትሰግድ፡ ኢትሖር፡ ወአውረደሙ፡ ኀበ፡ ማይ፡ ለሕዝብ፡ ወይቤሎ፡ እግዚአብሔር፡ ለጌዴዎን፡ ከሉ፡ ዘስትየ፡ በልሳኑ፡ እምነማይ፡ ከመ፡ ይስቲ፡ ከልብ፡ አቅም፡ እንተ፡ ባሕቲቱ፡ ወኸሉ፡ ዘአስተብረከ፡ በብረኪሁ፡ ከመ፡ ይስተይ፡ አቅምሙ፡ እንተ፡ ባሕቲቶሙ፡ ወኮነ፡ ጉልቆሙ፡ ለእለ፡ ሰትየ፡ በልሳኖሙ፡ ፫፻፡ ወእለሰ፡ ተርፉ፡ ሕዝብ፡ ወአስተብረኩ፡ ከመ፡ ይስተየ፡ ማየ፡ ክፍል፡ ፳፮ ወይቤሎ፡ እግዚአብሔር፡ ለጌዴዮን፡ በእሉ፡ ፫፻፡ ብእሲ፡ እለ፡ ከመዝ፡ ሰትየ፡ አድኅክሙ፡ ወአገብአሙ፡ ለምድያም፡ ውስተ፡ እዴከ፡ ወኸሉ፡ ሕዝብ፡ ይእተዉ፡ ውስተ፡ አብያቲሆሙ፡ ወይንሥኡ፡ ምስሌክሙ፡ ስንቀ፡ ሕዝብ፡ ዘውስተ፡ እዴሆሙ፡ ወአቅርንቲሆሙ፡ ወለኸሉ፡ ሰብአ፡ እስራኤል፡ ፈንዎሙ፡ ውስተ፡ አብያቲሆሙ፡ ይእተዉ፡ ወለእልክቱ፡ ፫፻፡ ብእሲ፡ አቅም፡ ወትዕይንቶሙ፡ ለምድያም፡ ሀሎ፡ ውስተ፡ ቈላ፡፡ ክፍ፳፻ ወእምዝ፡ በይእቲ፡ ሌሊት፡ ይቤሎ፡ እግዚአብሔር፡ ተንሥእ፡ ወረድ፡ ፍጡነ፡ ወእምዝ፡ ውስተ፡ ትእይንት፡ እስመ፡ አግባእክዋ፡ ውስተ፡ እዴከ፡ ወእመሰ፡ ትፈርሀ፡ ባሕቲትከ፡ ወሪደ፡ አንተ፡ ወፉራ፡ ቀልዔከ፡ ውስተ፡ ትእይንት፡ ወአጽምአሙ፡ ዘይትናገሩ፡ ወእምዝ፡ {...}እንከ፡ ይጸንዓ፡ እደዊከ፡ ወረድ፡ ውስተ፡ ትእይንት፡ ወወረደ፡ ውእቱ፡ ወፍራ፡ {ወ}ቀልዔሁ፡ ውስተ፡ ፩ኀብር፡ ዘኀምሳ፡ እምነ፡ ትእይንት፡ ወምድያም፡ ወዓማሌቅ፡ ወኸሉሙ፡ ደቂቀ፡ ጽባሕ፡ ሕዱራን፡ እሙንቱ፡ ውስተ፡ ቈላት፡ ከመ፡ አንበጣ፡ ብዝኖሙ፡ ወአግማሊሆሙ፡ አልቦ፡ ጐል

(col. 2) ቈ፡ አላ፡ ከመ፡ ኖዓ፡ ዘውስተ፡ ጽንፈ፡ ባሕር፡ እሙንቱ፡ ብዝኖሙ፡ ወቦአ፡ ጌዴዮን፡ ወናሁ፡ ብእሴ፡ ይነግሮ፡ ለካልኡ፡ ሕልም፡ ወይቤ፡ ወእሬኢ፡ ኀብስተ፡ ሰገም፡ ወታንከራኸር፡ ውስተ፡ ትእይንት፡ ምድያም፡ ወቀተላ፡ ወወድቀት፡ ትእይንት፡ ወአውሥኡ፡ ካልኡ፡ ወይቤ፡ ኢኮነ፡ ዝንቱ፡ ዘእንበለ፡ ኩናተ፡ ጌዴዎን፡ ወልደ፡ ዮአስ፡ ብእሲ፡ እስራኤል፡ አግብአሙ፡ እግዚአብሔር፡ ውስተ፡ እዴሁ፡ ለምድያም፡ ወለኸሉ፡ ትእይንት፡ ክፍል፡ ፳፱፡ ወእምዝ፡ ሶበ፡ ሰምዓ፡ ጌዴዮን፡ ፍካሬ፡ ሕልም፡ ወዘከመ፡ ነገሮ፡ ሕልም፡ ሰገደ፡ ለእግዚአብሔር፡ ወገብአ፡ ውስተ፡ ትእይንት፡ እስራኤል፡ ወይቤሎሙ፡ ተንሥኡ፡ እስመ፡ አግብአሙ፡ እግዚአብሔር፡ ውስተ፡ እዴነ፡ ለትእይንት፡ ምድያም፡ ወከፈሎሙ፡ ፫፻፡ ብእሲ፡ ለ፫፡ ሠራዊት፡ ወወሀቦሙ፡ ቀርነ፡ ለኸሎሙ፡ ውስተ፡ እዴሆሙ፡ ወመሳብክተ፡ ዕሩቃተ፡ ወመሐትወ፡ ውስተ፡ ውእቱ፡ ማእከለ፡ መሳብክት፡ ወይቤሎሙ፡ እምኔየ፡ ርእዩ፡ ወከማሁ፡ ግበሩ፡ ናሁ፡ አነ፡ እበውእ፡ ውስተ፡ ትእይንት፡ ወዘገበርኩ፡ ግበሩ፡ ወእነፍሕበ፡ ቀርን፡ አነ፡ ወኸሉ፡ እለ፡ ምስሌየ፡ ወንፍሖ፡ በቀርን፡ አንትሙኒ፡ ዐውደ፡ ከሉ፡ ትዕይንት፡ ወበሉ፡ ለእግዚአብሔር፡ ወለጌዴዮን፡ ክፍል፴፡ ወቦአ፡ ጌዴዮን፡ ወ፫፡ ብእሴ፡ እለ፡ ምስሌሁ፡ ውስተ፡ አሐዱ፡ ኀብር፡ ትዕይንት፡ በቀዳሚ፡ ሰዓተ፡ መንፈቀ፡ ሌሊት፡ እንበለ፡ ይንቅሁ፡ {ወ}ሰብአ፡ መዓቅብ፡ ወነፍሖ፡ በቀርን፡ ወነጽሖ፡ ዘንተ፡ መሳብክተ፡ ዘውስተ፡ እዴሆሙ፡ ወነፍሖ፡ ቀርነ፡ እልክቱ፡ ፫ሠራዊት፡ ወነጽሖ፡ መሳብክቲሆሙ፡ ወዓልአሉ፡ መኀትዊሆሙ፡ ዘፀጋም፡ ወውስተ፡ እደዊሆሙ፡ ዘየማን፡ ዘቦቱ፡ ይነፍሖ፡ ወጸሖ፡ ወይቤሎ፡ ኩናተ፡ እግዚአብሔር፡ ወዘጌዴዮን፡ ከሉ፡ ትዕይንት፡ ወቆሙ፡ ከሎሙ፡ በብሔሮሙ፡ በውስተ፡ ዐውደ፡ ትዕይንት፡ ወጐየ፡ ከሉ፡ ትዕይንት፡ ወደንገፀ፡ ወነፍሖ፡ በ፫፻፡ አቅርንት፡

(col. 3) ወአግብአ፡ እግዚአብሔር፡ መጥባሕተ፡ ብእሲ፡ ላዕለ፡ ካልኡ፡ በውስተ፡ ከሉ፡ ትእይንትጐዩ፡ ትዕይንቶሙ፡ እስከ፡ ቤተ፡ ሢጣ፡ ወተጋብኡ፡ እስከ፡ ጽንፈ፡ አቤል፡ ወውስተ፡

ገላአ(ድ)ቅ: ወአውየዉ: ሰብአ: እስራኤል: እምነ: ንፍታሌም: እምነ: አሴር: ወእምነ: ኩሉምናሴ: ወዴገንዎሙ: ለምድያም: ወፈነወ: መላእክተ: ጌዴዎን: ውስተ: ደብረ: ኤፍሬም: እንዘ: ይብል: ረዱአ: ተቀበልዎሙ: ለምድያም: ወአኃዙ: ላዕሌሆሙ: ማየ: እስከ: ባራ: ወአኃዝዎሙ: ለ፪: መላእክተ: ምድያም: ለሔሬብ: ወዜብ: ለሔሬብ: ቀተልዎ: በሱራን: ወለዜብ: ቀተልዎ: በኢያፌቅ: ወዴገንዎሙ: ለምድያም: ወአምጽኡ: አርእስቲሆሙ: ለሔረብ: ወለዜብ: ኀበ: ጌዴዎን: እምነ: ማዕዶተ: ዮርዳኖስ: ወይቤልዎ: ሰብአ: ኤፍሬም: ምንትት: ውእቱ: ዝንቱ: ነገር: ዘገበርከ: ላዕሌን: ከመ: ኢትጸውዓነ: አመ: ተሐውር: ትትቃተሎሙ: ለምድያም: ወተሳነኑ: ዓቢየ: ተስናነ: ምስሌሁ: ወይቤሎሙ: ምንተ: ገበርከ: ይእዜ: ከማክመ: አኮኑ: አንትሙ: ትሔይሱ: ቈጽለ: ኤፍሬም: እምቀስመ: አቤዜር: ውስተ: እዴክሙ: አግብአሙ: እግዚአብሔር: ለመላእክተ: ምድያም: ሔሬብ: ወዜብ: ወምንተ: ክህልኩ: ገቢረ: ከማክመ: ወእምዝ: ኃደግ{ም}ዎ: ወአዕረፈት: ነፍሶሙ: እምኔሁ: ሶበ: ይቤሎሙ: ዘንተ: ቃለ: ወመጽአ: ጌዴዮን: ኀበ: ዮርዳኖስ: ወዓደወ: ውእቱ: ፫፻: ብእሴ: እለ: ምስሌሁ: ወአንበዙ: {...}ሶበ: ርኀቡ: ወአንሰ: እተልዎሙ: ለዘብሔ: ወለስልማ: ነገሥተ: ምድያም: ወይቤልዎ: መላእክተ: ስኮትቦኑ: እዴሆሙ: ለዘብሔ: ወለስልማ: ውስተ: እዴየ: እሰቅል: ሥጋክሙ: ውስተ: ዓቀብተ: ገዳም: ውስተ: ዓርቂሞን: ወዓርገ: እምህየ: ውስተ: ፈኑል: ወይቤሎ{ሙ}: ከመዝ: ወይቤልዎ: ሰብአ: ፋኑሔል: በከመ: ይቤልዎ: ሰብአ: {...}: ስኮት: ወይቤሎሙ: ለሰብአ: ፋኑሔል: ሶበ: ገባእኩ: በዳኀን: እነሥቶ: ለዝንቱ: ማኅፈድ: ወዘብሔሰ: ወስልማና: ውስተ:

F.100r

(col. 1) ቀርቃር: ወትዕይንቶሙ: ምስሌሆሙ: የአክሉ: እልፍ: ወ፶፻: ኩሎሙ: እለ: ተርፉ: እምነ: ኩሎሙ: ተዓይኒሆሙ: ደቂቀ: ጽባሕ: ወእለሰ: ወድቁ: ፲፱፻ ወ፳፻: ብእሴ: እለ: ይፀውሩኩናተ: ክፍል: ፴፩: ወዓርገ: ጌዴዮን: ፍኖተ: ኩስኒ: እለ: ይነብሩ: በደባትር: መንገለ: ጽባሕ: ሰብአ: ናቡቴ: ላዕለ: ዛብሔ: ወቀተለ: ትዕይንቶሙ: እንዘ: ይትአመኑ: ወጐዩ: ዛብሔ: ወስልማና: ወዴገንዎሙ: ወትለውዎሙ: ወአሐዝዎሙ: ለክልኤሆሙ: ነገሥተ: ምድያም: ለዘብሔ: ለስልማና: ወለኩሉ: ትዕይንቶሙ: ቀጥቀጦሙ: ወተመይጠ: ጌዴዎን: ወልደ: ዮእስ: እምነ: ጸብእ: እምነ: እቀበ: ርእሰ: ወእኀዙ: አሐደ: ወልደ: እምነ: ሰብአ: ስኮት: ወኃቀቶ: ወጸሐፈ: ሎቱ: መኳንንተ: ስኮት: ወሊቃናቲሃ: ፸: ወ፯ብእሴ: ወበጽሐስትት: ኀበ: ሰብአ: ስኮት: ወይቤሎሙ: ነዮሙ: ዘብሔ: ወስልማና: ቦእለ: ቦሙ: ተዓየርክሙ: ወትቤሉኒ: ቦኑ: እዴሆሙ: ለዘብሔ: ወለስልማና: ይእዜ: ውስተ: እዴከ: ከመ: ነሀቦሙ: እክለ: ለሰብእክ: ለእለ: ርኀቡ: ወነሥአሙ: ለሰብአ: ስኮት: ለሊቃናቲሆሙ: ወቦአ: ውስተ: ገዳም: ወውስተ: በራቂሚን: ወአእመርም(ሙ: ሰብአ: ሳኮት: ወነስቶ: ለማኅፈደ: ፋኑሔል: ወቀተሎሙ: ለሰብአ: ሳኮት: ወለሀገሮሙ: ወይቤሎሙ: ለዛብሔ: በለስልማና: አይቴ: እደው: እለ: ቀ)ተልክሙ: በታቦር: ወይቤልዎ: ከማክ: እሙንቱ: ወኪያክ: ይመስሉ: እሙንቱ: ወከመ: ርእየተ: ደቂቀ: ነገሥት: ርእየቶሙ: ወይቤሎሙ: ጌዴዮን: አኀውየ: እሙንቱ: ወደቂቀ: እምየ: ወመሐለ: ሎሙ: ወይቤሎሙ: ሕያው: እግዚአብሔር: ሶበ: አኀውክምዎሙ: እምኢቀተልኩክሙ: ወይቤሎ: ለዮቶር: በኩሩተንሥአ: ቅትሎሙ: ወኢመልሐ: ሰይፎ: ውእቱ: ሕፃን: እስመ:

ንኡስ፡ ውእቱ፡ ወፈርጎ፡ ወይቤልዎ፡ ዘብሔ፡ ወመስልማና፡ ተንሥእንተ፡ ወተራከበነ፡ እስመ፡
ከመ፡ ብእሲ፡ ውእቱ፡ ጎይልከ፡ ወተንሥኦ፡ ጌዴዎን፡ ወተቃሎሙ፡ ለዜብሔ፡ ወለስልማና፡
ወነሥኦ፡ ባዝግናተ፡ ዘውስተ፡ ከሰደ፡ አግማሊሆሙ፡ ወይቤሉ፡ ሰብኦ፡ እስራኤል፡ ለጌዴዎን፡ መል

(col. 2) አከ፡ አንተ፡ ለነ፡ ወደቂቅከ፡ እስመ፡ አድኃንከነ፡ እምእደ፡ ምድያም፡ ወይቤሎሙ፡
ጌዴዎን፡ ኢእትመለክ፡ ለክሙ፡ ወልድየኒ፡ ኢይትመለ(አክ)፡ ለክሙ፡ እግዚአብሔር፡
ይትመለ(አክ)፡ ለክሙ፡ ወይቤሎሙ፡ ጌዴዎን፡ እስእል፡ እምኔክሙ፡ ስእለተ፡ ወሀቡኒ፡ ብእሲ፡
አእኑገ፡ ዘወርቅ፡ ቦሙ፡ እስመ፡ እስማኤላውያን፡ እሙንቱ፡ ወይቤሉ፡ ውሂበ፡ ንሁብ፡ ወስፍሐ፡
ልብስ፡ ወገደፈ፡ ብእሲ፡ አእኑገ፡ ስሉብ፡ ወኮነ፡ ድልወተ፡ ወርቅ፡ ዘሰአሎሙ፡ አእኑጊሁ፡ ፲፪ ወ፳፪፡
በስቅለ፡ ወርቅ፡ ወርቁ፡ እንበለ፡ አውፃባት፡ ወባዝግናት፡ ዘኢፎት፡ ወመዋጥሐ፡ ዘሜላት፡ ዘላዕለ፡
ነገሥተ፡ ምድያም፡ ወእንበለ፡ ሐብላተ፡ ወርቅ፡ ዘውስተ፡ ክሳውዳተ፡ አግማሊሆሙ፡ ወገብረ፡
ሎቱ፡ ጌዴዎን፡ ምስለ፡ ወዓቀመ፡ ውስተ፡ ሀገሩ፡ ውስተ፡ ኤፍራ(ታ)፡ ወዘመዉ፡ ቦቱ፡ ኩሉ፡
እስራኤል፡ ወተለውዎ፡ በህየ፡ ወኮየ፡ ጌጋየ፡ ለጌዴዎን፡ ወለቤቱ፡ ወተትሕቱ፡
ምድያም፡ ቅድሚሆሙ፡ ለእስራኤል፡ ወኢደገሙ፡ እንከ፡ አልዕሎ፡ ርእሶሙ፡ ወአዕረፈት፡ ምድር፡
፱ዓመተ፡ በመዋዕለ፡ ጌዴዎን፡ ክፍል፡ ፴፪፡ ወሐረ፡ ኢዮርብአም፡ ወልደ፡ ዮአስ፡ ወነበረ፡ ውስተ፡
ቤቱ፡ ወቦ፡ ጌዴዎን፡ ሰብኦ፡ ደቂቀ፡ እለ፡ ወጽኡ፡ እምገቦሁ፡ እስመ፡ ብዙኃን፡ አንስቲያሁ፡
ወዕቅብቱ፡ በውስተ፡ ሰቂሞስ፡ ወለደት፡ ሎቱ፡ ወልደ፡ ወሰመዮ፡ ስሞ፡ አቤሜልክ፡ ወሞተ፡
ጌዴዎን፡ ወልደ፡ ዮአስ፡ በርስእሠናይ፡ ወተቀብረ፡ ውስተ፡ መቃብረ፡ አቡሁ፡ ዮአስ፡ በኤፍራታ፡
አብያዜር፡ ከፍል፡ ፴፫፡ ወእምዝ፡ ሶበ፡ ሞተ፡ ጌዴዎን፡ ተመይጡ፡ ደቂቀ፡ እስራኤል፡ ወተለዉ፡
በአሊም፡ ወተካየዱ፡ ምስሌሁለበዓል፡ ከመ፡ ይኩኖሙ፡ አምላኮሙ፡ ወኢተዘከርዎ፡ ደቂቀ፡
እስራኤል፡ ለእግዚአብሔር፡ አምላኮሙ፡ ዘአድኃኖሙ፡ እምእደ፡ ኩሉ፡ ፀሮሙ፡ እለ፡ ዓውዶሙ፡
ወኢገብሩ፡ ምሕረተ፡ ምስለቤተ፡ ኢዮርብአም፡ ዘውእቱ፡ ጌዴዎን፡ በኩሉ፡ ሠናይት፡ እንተ፡ ገብረ፡
ምስለ፡ እስራኤል፡ ክፍል፡ ፴፬፡ ወሐረ፡ አቤሜልክ፡ ወልደ፡ ሮብአም፡ ውስተ፡ ሰቂማ፡ ኀበ፡ እኅወ፡
እሙ፡ ወተናገሮሙ፡ ለኩሎሙ፡ አዝማደ፡ ቤተ፡ እሙ፡ ወይቤሎሙ፡ ተናገርዎሙ፡ ለኩሎሙ፡
ሰብእ፡ ሰቂማ፡ ወ

(col. 3) በልዎሙ፡ ምንተ፡ ይኒይሰክሙ፡ ሰብኦኦ፡ ብእሲ፡ ይኩንክሙ፡ ኩሎሙ፡ ደቂቀ፡
ሮብዓም፡ አው፡ ፩ ብእሲ፡ ይኩንክሙ፡ ወተዘከሩ፡ ከመ፡ ሥጋክሙ፡ ወአዕፅምቲክሙ፡ አነ፡
ወተናገሩ፡ ሎቱ፡ እኅወ፡ እሙ፡ ምስለ፡ ኩሉ፡ ሰቂማ፡ ኩሉ፡ ዘንተ፡ ነገረ፡ ወሜጥዎ፡ ለልቦሙ፡
ኀበ፡ አቤሜልክ፡ ወይቤሉ፡ እኑነ፡ ውእቱ፡ ወወሀብዎ፡ ሰብዓ፡ ብሩረ፡ እምነ፡ ቤተ፡ በዓል፡
ወተዓስበ፡ ቦቱ፡ አቤሜልክ፡ እደው፡ ኃቃልያን፡ ወመደንግሃን፡ ወሐሩ፡ ወተለውዎ፡ ወቦኦ፡
ውስተ፡ አቡሁ፡ ኤፍራታ፡ ወቀተለ፡ ለአኃዊሁ፡ ፪ ብእሲ፡ ላዕለ፡ እብን፡ አሐቲ፡ ወተረፈኢያታም፡
ወልደ፡ ኢዮርብአም፡ ዘይንእስ፡ እስመ፡ ተሀብኦ፡ ክፍል፡ ፴፭፡ ወተታብኦ፡ ኩሎሙ፡ ሰብኦ፡
ሰቂማ፡ ወኩሎሙ፡ ቤተ፡ ማህሉም፤ ወሐሩ፡ ወአንገሥዎ፡ ለአቤሜልክ፡ ኀበ፡ ዕፀ፡ ባሎን፡
እንተ፡ ውስተ፡ ሰቂማ፡ ወዜነውዎ፡ ለኢዮኦታም፡ ወሐረ፡ ወቆመ፡ ውስተ፡ ደብረ፡ ገሪዛን፡ ወጸርጎ፡
ወበከየ፡ ወይቤሎሙ፡ ስምኡ፡ ሰብዓ፡ ሰቂማ፡ ወይስማዕክሙ፡ እግዚአብሔር፡ ሐሩኦ፡ ዕፀው፡
ያንግሡ፡ ሎሙ፡ ንጉሠ፡ ወይቤልዎ፡ ላዕዐ፡ ዘይቅ፡ ንገሢኦ፡ ለነ፡ ወትቤሎሙ፡ ዘይት፡ እኅድግኦ፡
ቅብዕየ፡ ዘተዕብሐ፡ እግዚአብሔር፡ በላዕሌየ፡ ወእንለ፡ እመሕያው፡ ወእሐር፡ እንግሥ፡ ለአፀው፡

ወይቤልዋ፡ ኩሉ፡ ዕፀው፡ ለበለስ(ንዲ)፡ (ንግ)ሢ፡ ለነ፡ ወትቤሎሙ፡ በለስ፡ እኅድግኑ፡ ምጥቀትየ፡
ወፍሬየ፡ ቡሩከ፡ ወአሐር፡ እንግሥ፡ ለእፀው። ወይቤልዋ፡ ኩሉ፡ ዕፀው፡ ለወይን፡ ንዲ፡ ንግሢ፡
ለነ፡ ወትቤሎሙ፡ እኅድግኑ፡ ወይንየ፡ ወትፍሥሕትየ፡ ዘኅበ፡ እግዚአብሔር፡ ወበኅበ፡ እጓለ፡
እመሕያው፡ ወእሐር፡ ወእንግሥ፡ ለዕፀው። ወይቤልዋ፡ ኩሉ፡ ዕፀው፡ ላዕፀ፡ ራብኖንንዲ፡ አንቲ፡
ንግሢ፡ ለነ፡ ወትቤሎሙ፡ ዕፀ፡ ራብኖን፡ ላዕፀው፡ እመ፡ አማን፡ ታኅግሡኒ፡ በጽድቅ፡ ላዕሌክሙ፡
ንዑ፡ አጽልሉ፡ ታሕተ፡ ጽላሎትየ፡ እመ፡ አኮ፡ ትወፅእ፡ እሳት፡ እምነ፡ ራብኖስ፡ ወትበልዖ፡
ለአርዘ፡ ሊባኖስ። ይእዜኒ፡ ለእመ፡ አማን፡ በጽድቅ፡ ገበርክሙ፡ ወአንገሥክምዎ፡ ለአበሜሌክ፡
ለእመ፡ ሠናየ፡ ገበርክሙ፡ ምስለ፡ ኢዮርብዓም፡ ወምስለ፡ ቤቱ፡ ወእመ፡ በከመ፡ ዕሴ

F.100v

(col. 1) ተ፡ እዴሁ፡ ገበርክሙ፡ ሎቱ፡ በከመ፡ ተቃተለ፡ አቡሁ፡ ለክሙ፡ ወገደፈ፡ ነፍሶ፡
ቅድሚክሙ፡ ወአድኃክሙ፡ እምእደ፡ ምድያም፡ ወአንትሙ፡ (ተን)ሣእከሙ፡ ላዕለ፡ ቤተ፡ አቡየ፡
ወቀተልክሙ፡ ደቂቁ፡ ፎብእሲ፡ በአሐቲ፡ እብን፡ ወአንገሥክምዎ፡ ለአበሜሌክ፡ ወልደ፡ ዕቅብቱ፡
ላዕለ፡ ሰብአ፡ ሰቂማ፡ ንእስመ፡ እኅክሙ፡ ውእቱ፡ ወእመሰ፡ በጽድቅ፡ ወበርትዕ፡ ገበርክሙ፡
ምስለ፡ ሮብአም፡ ወቤቱ፡ በዛቲ፡ ዕለት፡ ቡሩካን፡ ኩኑ፡ አንትሙ፡ ወተፈሥሐ፡
በአበሜሌክ፡ ወውእቱኒ፡ ይትፈሣሕ፡ ብክሙ፡ ወእመአኮስ፡ ትፃእ፡ እሳት፡ እምነ፡ አበሜሌክ፡
ወትበልዖሙ፡ ለሰብአ፡ ሰቂማ፡ ወቤተ፡ ማህሎን። ወትፃእ፡ እሳት፡ {...}፡ እምነ፡ ሰቂማ፡ እምነ፡
ቤተ፡ መሀሎን፡ ወትበልዖ፡ ለአበሜሌክ፡ ወጐየ፡ ዮአታም፡ ወሮፀ፡ ውስተ፡ ፍኖት፡ ወአምሰጠ፡
ውስተ፡ ራራ፡ ወነበረ፡ ህየ፡ እምነ፡ ገጸ፡ አበሜሌክ፡ እኅሁ። ክፍል፡ ፴፯። ወከነነ፡ አበሜሌክ፡
ለቤተ፡ እስራኤል፡ ፫ዓመተ፡ ወፈነወእግዚአብሔር፡ ጋኔነ፡ እኩየ፡ ማእከለ፡ አበሜሌክማእከለ፡
ሰብአ፡ ሰቂማ፡ ወከሕድዎ፡ ሰቂማ፡ ለቤተ፡ አበሜሌክ፡ ከመ፡ ይግባእ፡ ኃጢአቱ፡ ዘፎ፡ ደቂቀ፡
ኢዮርብአም፡ ወደሞሙ፡ ወይፈድዮ፡ ለአበሜሌክ፡ እኅሆሙ፡ ዘቀተሎሙ፡ ወላዕለ፡ ሰብአ፡ ሰቂማ፡
እለ፡ አጽንዕዎ፡ ለእዴሁ፡ ከመ፡ ይቅትሎሙ፡ ለአኃዊሁ፡ ወአንበሩ፡ ሎቱ፡ ሰብአ፡ ሰቂማ፡ ማእገተ፡
ውስተ፡ አርእስተ፡ አድባር፡ ወየሀይዱ፡ ኩሎሙ፡ ዘየሐልፍ፡ ፍኖተ፡ እንተ፡ ላዕሌሆሙ፡
ወዜነውዎ፡ ለአበሜሌክ፡ ወመጽአ፡ ጋድ፡ ወልደ፡ አቤድ፡ ወአኃዊሁ፡ ውስተ፡ ሰቂማ፡ ወተአመኑ፡
ቦቱ፡ ሰብአ፡ ሰቂማ፡ ወወፅኡ፡ ኃቅለ፡ ወቀሰሙ፡ አዕፃደ፡ ወይኖሙ፡ ወአኬዱ፡ ወገብሩበዓለ፡
ወቦሉ፡ ቤተ፡ አምላኮሙ፡ ወበልዑ፡ ወስትዩወረገምዎ፡ ለአበሜሌክ፡ ይቤ፡ ጋድ፡ ወልደ፡ አቤድ፡
መኑ፡ ውእቱ፡ አበሜሌክ፡ ወመኑ፡ ሴኬም፡ ከመ፡ ንትቀነይ፡ ሎቱ፡ አኮኑ፡ ወልደ፡ ሮብአም፡
ወዜቡል፡ ዓቃቢሁ፡ ገብሩ፡ ወሰብአ፡ ኤሞር፡ አቡሁ፡ ለሴኬም፡ ወለምንት፡ ንትቀነይ፡ ሎቱ፡
ንሕነ፡ ወመኑእምአግብአ፡ ለዝንቱ፡ ሕዝብ፡ ውስተ፡ እዴየ፡ ወአፍልሶ፡ ለአበሜሌክወይቤልዋ፡
ለአበሜሌክ፡ አክለከ፡ ኃይልከ፡ ወፃእ፡ ወሰምዓ፡ ዛብሔል፡ መልአከ፡ ሀገር፡ ነገረ፡ ጋድወልደ፡
አቤድ፡ ወተምዕዓ፡ መዓተ፡ ወፈነወ፡ መልእክተ፡ ኃበ፡ አበሜሌክ፡ ምስለ፡ አምኃ፡ እንዘ፡ ይብል፡

(col. 2) ናሁአ፡ ጋድ፡ ወልደ፡ አቤድ፡ ወአኃዊሁ። ወመጽአ፡ ውስተ፡ ሰቂማ፡ ወናሁ፡
ይትቃተልዋ፡ ለሀገር፡ በእንቲአከ። ወይእዜኒ፡ ተንሥእ፡ በሌሊት፡ አንተ፡ ወሕዝብ፡ እለ፡ ምስሌከ፡
ወአግታ፡ ውስተ፡ ሐቅል፡ ወብጻሕጊዜ፡ ይሠርቅ፤፡ ዐሐይ፡ ወበጽባሕጊስ፡ ወሩዳ፡ ለሀገር፡
(ወሶበ)መጽአ፡ ውእቱ፡ ወሕዝብ፡ እለ፡ ምስሌሁ፡ ይወጽኡ፡ ኀቤከ፡ ወግባር፡ ላዕሌሁ፡ ከመ፡
ትረከብ፡ እዴከወተንሥአ፡ አበሜሌክ፡ ወሕዝብ፡ እለ፡ ምስሌሁ፡ ሌሊተ፡ ወዓገትዋ፡ ለሰቂማ፡

፬ሠራዊት፡ ወወፅአ፡ ገላአድ፡ ወልደ፡ አቢድ። ወቆመ፡ ኀበ፡ ኖኅተ፡ አንቀጸ፡ ሀገርወተንሥአ፡
 አበሜሌክ፡ ወሕዝብ፡ ምስሌሁ፡ እምኀበ፡ የዓግቱ፡ ወርእየ፡ ጋድ፡ ወልደ፡ አቢድ፡ ሕዝበ፡
 ወይቤሎለዜቡል፡ ናሁ፡ ሕዝብ፡ ይወርድ፡ እምኦርእስተ፡ አድባር። ወይቤሎ፡ ዜቡል፡ ጸላሎተ፡
 አድባር፡ ትሬኤ፡ አንተሰ፡ ከመ፡ ሰብእ፡ ወደገመ፡ ዓዲ፡ ጋድ፡ ብሂሎቶ፡ ናሁ፡ ሕዝብ፡ ይወርድ፡
 እማእከለ፡ ምድር፡ ወ፩፡ ሰርዌ፡ ይወጽእ፡ እምነ፡ ፍኖተ፡ ኤሎን፡ እመንጸር። ወይቤሎ፡ ዜቡል፡
 አይቱ፡ ውእቱ፡ አፉከ፡ ዘትቤ፡ መኑ፡ ውእቱ፡ አበሜሌክ፡ ከመ፡ ንትቀነይ፡ ሎቱ፡ (አ)ኮኑ፡
 ውእቱ፡ ዝንቱ፡ ሕዝብ፡ ዘተዓየርከ፡ ፃእኬ፡ ይእዜ፡ ወተቃተሎሙ፡ ወወፅአ፡ ጋድ፡ እምነ፡
 ቅድሚሆሙ፡ ለሰብአ፡ ሰቂማ፡ ወተቃተሎ፡ ለአበሜሌክ፡ ወዴገኖ፡ አበሜሌክ፡ ወጐየ፡ እምቅድመ፡
 ገጹ፡ ወወድቁ፡ ብዙኃን፡ ቅቱላን፡ እስከ፡ አንቀጸ፡ ሀገር። ወነበረ፡ አበሜሌክ፡ ውስተ፡ አርማ፡
 ወአውጽአሙ፡ ዜቡል፡ ለጋድ፡ ወለአኃዊሁ፡ ወከልአሙ፡ ነቢረ፡ ውስተ፡ ሰቂማ፤ ወእምዝ፡ በሳኒታ፡
 ወፅኡ፡ ውስተ፡ ገዳም፡ ኀዝብ፡ ወዜነውዎ፡ ለአበሜሌክ፡ ወነሥአ፡ ኀዝብ፡ ወከፈሎሙ፡
 ለ፫ሠራዊት፡ ወዓገተ፡ ገዳመ፡ ወሶበ፡ ይኔጽር፡ ናሁ፡ ሕዝብ፡ ይወፅእ፡ እምነ፡ ሀገር፡ ወተነሥአ፡
 ላዕሌሆሙ፡ ወቀተሎሙ። ወአበሜሌክ፡ ወሰራዊት፡ እለ፡ ምስሌሁ፡ ቶሙ፡ ዲፓ፡ ኀበ(ኖኅተ፡
 አንቀጸ)፡ ሀገር። ወእልክቱ፡ ክልኤ፡ ሠራዊት፡ ተዘርወ፡ ውስተ፡ ኩሉገዳም፡ ወቀተልዎሙ።
 ወአበሜሌክሰ፡ ይትቃተል፡ ምስለ፡ ሀገር፡ ኩላ፡ ወአተ፡ ዕብተ፡ ወአስተ፡ ጋብአ፡ ለሐገርወሕዝብሰ፡
 ዘውስቴታ፡ ቀተለ፡ ወነሠተ፡ ሀገረ፡ ወዘርአ፡ ውስቴታ፡ ፂወ። ወስምዑ፡ ኩሎሙ፡ ሰብአ፡
 ማኅፈደ፡ ሰቂማ፡ ወቦኡ፡ ውስተ፡ ፀወን፡ ቤተ፡ በዐል። ወዜነውዎ፡ ለአበሜሌክ፡ ከመ፡ ተጋብአ፡
 ኩሉ፡ ሰብአ፡ ማኅፈደ፡ ሰቂማ፡ ወአርገ፡ አበሜሌክ፡ ወስተ፡ ደብረ፡ ሰልሞን፡ ውእቱ፡ ወሕዝብ፡
 እለ፡ ምስሌሁ፡ ወነ

(col. 3) ሥአ፡ አበሜሌክ፡ ጉድበ፡ ውስተ፡ እዴሁ፡ ወገማደ፡ ጸረ፡ ዕፀወ፡ ወነሥአ፡ ወጸር፡
 ውስተ፡ መታክፍቲሁ፡ ወይቤሎሙ፡ ለሕዝብ፡ ለእለ፡ ምስሌሁ፡ ዘከመ፡ ርኤክሙኒ፡ እገብር፡ ግብረ፡
 ግብሩ፡ አንትሙኒ፡ ፍጡነ፡ ከመ፡ አነ፡ ገበርኩ፡ ወገዘሙ፡ እሙንቱ፡ ኩሎሙ፡ ፀሮሙ፡ ወነሥአ፡
 ወተለውዎ፡ ለአበሜሌክ፡ ወአንበሩ፡ ኀበ፡ ፀወን፡ ወአውዓዩ፡ ላዕሌሆሙ፡ ፀወኖሙ፡ በእሳት፡
 ወሞቱ፡ ኩሎሙ፡ ሰብአ፡ ሰቂማ፡ ዘማኅፈዱ፡ ወየአክሉ፡ ፲፪፡ ብእሲ፡ ወአንስት። ክፍል፡
 ፴፱፡ ወሐረ፡ አበሜሌክ፡ ውስተ፡ ቴቤስ፡ ወነበረ፡ ላዕሌሃ፡ ወአስተጋብአ፡ ወቦቱ፡ ማሕፈደ፡ ዐቢየ፡
 ውስተ፡ ማእከለ፡ ሀገር፡ ወተፀወኑ፡ ኩሎሙ፡ እደዊሆሙ፡ ወአንስቲያሆሙ፡ ወኩሉ፡ ዐበይተ፡
 ሀገር፡ ወዓፀዉ፡ ላዕ{.....}{.....}(ሌሆሙ፡ ወዓርጉ፡
 ውስተ፡ ናሕስ፡ ወሐረ፡ አበሜሌክ፡ ኀበ፡ ማኅፈድ፡ ወተቃተሎ(ሙ፡ ወቀርበ፡ አበሜሌክ፡ ኀበኖኅተ፡
 ማኅፈድ፡ ከመ፡ ያውዕየ፡ በእሳት፡[.])ረቶ፡ አሐቲ፡ ብእሲት፡ በስባረ፡ ማኅረጽ፡ ውስተ፡ ርእሱ፡
 ለአበሜሌክ፡ ወቀጥቀጠቶ፡ ርእሱ፡ ወወፅአ። ናላሁ፡ ወጸርሐ፡ ፍጡነ፡ ለቀላዲሁ፡ ዘይጸውር፡
 ንዋዮ። ወይቤሎ፡ ምላሕ፡ መጥባሕተ፡ ወቅትለኒ፡ ከመ፡ ኢይበሉ፡ ብእሲት፡ ቀተለቶ። ወወግአ፡
 ቀላዲሁ፡ ወሞተ፡ አበሜሌክ፡ ወርእየ፡ ሰብአ፡ እስራኤል፡ ከመ፡ ሞተ፡ አበሜሌክ፡ ወአተዉ፡
 ኩሎሙ፡ በሐውርቲሆሙ፡ ወፈደዮ፡ እግዚአብሔር፡ ለአበሜሌክ፡ እኪተ፡ እንተ፡ ገብረ፡ ላዕለ፡
 አቡሁ፡ ዘቀተለ፡ ፸አኃዊሁ፡ ወኩሎ፡ እኪቶ፡ ለሰብአ፡ ሰቂማ፡ ፈደዮሙ፡ እግዚአብሔር፡ ላዕለ፡
 ርእሱሙ፡ ወበጽሖሙመርገመ፡ ኢዮአታም፡ ወልደ፡ ሮብአም። ክፍል፡ ፵ወቆመ፡ እምድኅረ፡
 አበሜሌክ፡ ዘያድኅኖሙ፡ ለእስራኤል፡ ቶላ፡ ወልደ፡ ፎሕ፡ ወልደ፡ እጉሁ፡ ለአቡሁ፡ ብእሲ፡
 ዘእምነ፡ ይሳኮር፡ ወውእቱሰ፡ ይነብርውስተ፡ ሰማርያ፡ ወውስተ፡ ደብረ፡ ኤፍሬም። ወኩነኖሙ፡

ለእስራኤል፡ ፳፱፻፲፱፡ ዓመተ፡ ወሞተ፡ ወተቀብረ፡ ውስተ፡ ሰማርያ፡ ክፍል፡ ፵፩፡
 ወቆመእምድኅሬሁ፡ ኢያሕር፡ ገለአዳዊ፡ ወከነኖሙ፡ ለእስራኤል፡ ፳፱፻፲፱፡ ዓመተ፡ ወኮኑ፡ ሎቱ፡
 ፴፩፻፲፱፡ ወይዳዳኑ፡ ላዕለ፡ ፴፩፻፲፱፡ ወቦሙ፡ ፴፩፻፲፱፡ ወሰመዮን፡ ደብራተ፡ ዘኢያሕር፡ እስከ፡
 ዮም፡ ወሀለዋ፡ ውስተ፡ ገለአድ። ወሞተ፡ ኢያሕር፡ ወተቀብረ፡ ውስተ፡ ሪሞ። ክፍል፡ ፵፪፡
 ወደገሙ፡ ደቂቀ፡ እስራኤል፡ ገቢረ፡ እኩይ፡ ቅድመ፡ እግዚአብሔር፡ ወአምላ

F.101r

(col. 1) ክዎሙ፡ ለበዐሊም፡ ወአስጣሮት፡ ወአማልክተ፡ ሶርያ፡ ወአማልክተ፡ ሲዶና፡ ወአማልክተ፡
 ሞአብወአማልክተ፡ ደቂቀ፡ ዓሞን፡ ወአማልክተ፡ ኢሎፍሊ፡ ወኅደግዎ፡ ለእግዚአብሔር፡
 ወኢተቅንዩ፡ ሎቱ፡ ወተምዕዓ፡ መዐተ፡ እግዚአብሔር፡ ላዕለ፡ እስራኤል፡ ወአግብአሙ፡ ውስተ፡
 እደ፡ ኢሎፍሊ፡ ውስተ፡ እዴሆሙ፡ ለደቂቀ፡ አሞን፡ ወሣቀይዎሙ፡ ወአጠቅዎሙ፡ ለደቂቀ፡
 እስራኤል፡ በውእቱ፡ ዓመት፡ ፲፱፻፲፱፡ ዓመተ፡ በማዕዶት፡ ዮርዳኖስ፡ በምድረ፡ አሞሬዎን፡ ዘወስተ፡
 ገለአድ፡ ወዓደው፡ ደቂቃ፡ አሞን፡ ዮርዳኖስ፡ ይትቃተልዎሙ፡ ለይሁዳ፡ ወለብንያሚ፡ ወለቤተ፡
 ኤፍሬም፡ ወተሣቀዩ፡ ደቂቀ፡ እስራኤል። ወገዓሩ፡ ደቂቀ፡ እስራኤል፡ ኀበ፡ እግዚአብሔር፡
 ወይቤሉ፡ አበሰነ፡ ለከ፡ እስመ፡ ኃደግናከ፡ አምላክነ፡ ወአምለክናሆሙ፡ ለበዓሊም። ወይቤሎሙ፡
 እግዚአብሔር፡ ለደቂቀ፡ እስራኤል፡ አኮነ፡ ግብጽ፡ ወአሞሬዎን፡ ወደቂቀ፡ አሞን፡ ወሞአብ፡
 ወኢሎፍሊ፡ ወሲዶና፡ ወምድያም፡ ወአማሌቅ፡ ሣቀዩክሙ፡ ወገዳርክሙ፡ ኀቤየ፡ ወአድኅንኩክሙ፡
 እምእዴሆሙ፤ ወአንትሙስ፡ ኀደግሙኒ፡ ወአምለክሙ፡ ባዕደ፡ አማልክተ፡ ዐበይነ፡ ዝንቱ፡
 ኢያድኅንክሙ። ሐሩ፡ ጽርሐ፡ ኀበ፡ አማልክት፡ እለ፡ ኃረይክሙ፡ ለክሙ፡ ወደድኅንክሙ፡
 በመዋዕለ፡ ምንዳቤክሙ። ወይቤልዎ፡ ደቂቀ፡ እስራኤል፡ ለእግዚአብሔር፡ አበሰነ፡ ስረይ፡ ለነ፡
 ወግበር፡ ለነ፡ ዘከመ፡ ትፈቅድ፡ ቅድሜከ፡ ወባሕቱ፡ እግዚአ፡ አድኅነነ፡ በዛቲ፡ ዕለት። ወአሰሰሉ፡
 አማልክተ፡ ባዕደ፡ እምነ፡ ማእከሎሙ፡ ወአምለክዎ፡ ለእግዚአብሔር፡ ወአስመርዎ፡ ወአንበዙ፡
 እምነ፡ ስቃይ፡ ደቂቀ፡ እስራኤል። ክፍል፡ ፵፫። ወአውየዉ፡ ደቂቀ፡ አሞን፡ ወተዓየኑ፡ ውስተ፡
 ገለአድ፤ ወተጋብኡ፡ ደቂቀ፡ እስራኤል፡ ወኅደሩ፡ ውስተ፡ መሴፋ። ወተበሀሉ፡ መላእክተ፡
 ሕዝበ{...}ገለአድ፡ በበይናቲሆሙ፡ መኑ፡ ብእሲ፡ ዘይእኅዝ፡ ይትቃተሎሙ፡ ለነ፡ ለደቂቀ፡ አሞን፡
 ወይኩን፡ ርእሰ፡ ለኩሉ፡ እለ፡ ይነብሩ፡ ውስተ፡ ገለአድ። ክፍል፡ ፵፬፡ ወዮፍታሔ፡ ገለአዳዊ፡ ኮነ፡
 ጽኑዓ፡ ኃይል፡ ወልደ፡ ብእሲት፡ ዘማ፡ ውእቱ፡ ወወለዶ{.}ገለአድ፡ ለዮፍታሔ፡ ወወለደት፡
 ብእሲተ፡ ገለአድ፡ ደቂቀ። ወልህቱ፡ ደቂቃ፡ ለይእቲ፡ ብእሲት፡ ወአውፅእዎ፡ ለዮፍታሔ፡
 ወይቤልዎ፡ ኢትወርስ፡ ውስተ፡ ቤተ፡ አቡነ። እስመ፡ ወልደ፡ ክል

(col. 2) እት፡ ብእሲት፡ አንተ፡ ወተኃጥአ፡ ዮፍታሔ፡ እምነ፡ ገጸ፡ አኅዊሁ፡ ወነበረ፡ ውስተ፡
 ምድር፡ ሠናይ፡ ይጸመድዎ፡ ለዮፍታሔ፡ ሰብእ፡ ነዳያን፡ ወየሐውሩ፡ ምስሌሁ። ወእምድኅረ፡
 መዋዕል፡ ተቃተልዎሙ፡ ደቂቀ፡ አሞን፡ ለእስራኤል። ወእምዝ፡ ድኅረ፡ ተጸብአ፡ ደቂቀ፡ አሞን፡
 ምስለ፡ እስራኤል። ወሐሩ፡ ሊቃናተ፡ ገለአድ፡ ይንሥእዎ፡ ለዮፍታሔ፡ እምነ፡ ምድረ፡ ሠናይ።
 ወይቤልዎ፡ ለዮፍታሔ፡ ነዓ፡ ወትኩነን፡ መስፍነ፡ ወንትቃተሎሙ፡ ለደቂቀ፡ አሞን።
 ወይቤሎሙ፡ ዮፍታሔ፡ ለሊቃናተ፡ ገለአድ፡ አኮነ፡ አንትሙ፡ ጸላእክሙኒ፡ ወአውግእክሙኒ፡
 እምኀቤክሙ፡ ለምንት፡ እንከ፡ መጻእክሙ፡ ይእዜ፡ ኀቤየ፡ ሶበ፡ ተመንደብክሙ። ወይቤልዎ፡
 ሊቃናተ፡ ገለአድ፡ ለዮፍታሔ፡ በእንተ፡ ዝንቱ፡ ይእዜ፡ መጻእነ፡ ኀቤከ፡ ከመ፡ ትሐር፡ ምስሌነ፡

ወትትቃተል፡ ለኒ፡ ምስለ፡ ደቂቀአሞን፡ ወትኩነነ፡ ራእሰ፡ በኩሉ፡ እለ፡ ይነብሩ፡ ውስተ፡ ገለአድ። ወይቤሎሙ፡ ዮፍታሔ፡ ለሊቃናተ፡ ገለአድ፡ አመ፡ ትነሥኡኒ፡ አንትሙ፡ ከመ፡ እትቃተሎሙ፡ ለደቂቀ፡ አሞን፡ እምከመ፡ አግብአሙ፡ እግዚአብሔር፡ ቅድሜየ፡ አነ፡ እከውነከመ፡ ርእሰ፡ ወይቤልዎ፡ ሊቃናተ፡ ገለአድ፡ ለዮፍታሔ፡ እግዚአብሔር፡ ስምዕነ፡ ማእከሉ፡ በከመ፡ ትቤ፡ ከማሁ፡ ንገብር፡ ወሐሩ፡ ዮፍታሔ፡ ምስሌሆሙ፡ ለሊቃናተ፡ ገለአድ፡ ወሴምዎ፡ ሕዝብ፡ ሎሙ፡ ርእሶ፡ ከመ፡ ይኩኖሙ፡ መስፍነ፡ ወነገረ፡ ዮፍታሔ፡ ኩሉ፡ ቃሎ፡ ቅድመ፡ እግዚአብሔር፡ በሴፋ። ክፍል፡ ፵፭፡ ወፈነወ፡ ዮፍታሔ፡ መላእክተ፡ ኀበ፡ ንጉሥ፡ ለደቂቀ፡ አሞን፡ እንዘይብል፡ ምንተአ፡ ብከ፡ ምስሌየ፡ ከመ፡ ትምጸእ፡ ትትቃተለኒ፡ ውስተ፡ ብሔርየ። ወይቤ፡ ንጉሥሙ፡ ለደቂቀ፡ አሞን፡ ለእለ፡ ለአከ፡ ዮፍታሔ፡ እስመ፡ ነሥኡአ፡ እስራኤል፡ ምድረ፡ አመ፡ የዓርጉ፡ እምነ፡ ግብጽ፡ እምነ፡ አርኖን፡ እስከ፡ ኢያቤቅ፡ ወእስከ፡ ዮርዳኖስ። ወይእዜኒ፡ አግብእ፡ ሊተ፡ በሰላም። ወገብኡ፡ እለ፡ ለአከ፡ ዮፍታሔ፡ ወፈነወ፡ ዮፍታሔ፡ ሐዋርያተ፡ ኀበ፡ ንጉሥሙ፡ ለደቂቀ፡ አሞን፡ ወይቤሉ፡ ከመዝ፡ ዮፍታሔ፡ ይቤ፡ ኢነሥኡአ፡ እስራኤል፡ ምድረከ፡ ዘሞአብ፡ ወምድረ፡ ደቂቀ፡ አሞን፡ እስመ፡ አመዓርጉ፡ እምነ፡ ግብጽ፡ ሐረ፡ እስራኤል፡ ውስተ፡ ገዳም፡ እስከ፡ ባረ፡ ኤርትራ፡ ወበጽሑ፡ እስከ፡ ቃዴስ፡ ወፈነወ፡ እስራኤል፡ ሐዋርያተ፡ ኀበ፡ ንጉሡ፡ ኤዶ

(col. 3) ም፡ እንዘ፡ ይብል፡ አሕልፈኒ፡ ኀበ፡ ምድርከ፡ ወዓበየ፡ ንጉሡ፡ ኤዶም፡ ወንጉሡ፡ ሞአብ፡ ለአከ፤ ወአበየ፡ ወነበረ፡ እስራኤል፡ ውስተ፡ ቃዴስ፡ ወሐለፈ፡ እንተ፡ ገዳም፡ ወኦደ፡ ምድረ፡ ኤዶም፡ ወሞአብ፡ ወበጽሑ፡ መንገለ፡ ጽባሒሁ፡ ለምድረሞአብ፡ ወኀደሩ፡ ውስተ፡ ማዕዶተ፡ አርኖን፡ ወኢቦኡ፡ ደወሎሙ፡ ለሞአብ፡ ወፈነወ፡ እስራኤል፡ ሐዋርያተ፡ ኀበ፡ ሴዎን፡ ንጉሡ፡ አሞሬዎን፡ ወንጉሡ፡ ሐሴቦን። ወይቤሎሙ፡ እስራኤል፡ አሕልፈኒ፡ አ፡ እንተ፡ ምድርከ፡ እስከ፡ ብሔርየ፡ ወአበየ፡ ሴዎን፡ አሕልፎቶሙ፡ ለእስራኤል፡ እንተ፡ ደወሎ፡ ወአስተጋብአ፡ ሴዎን፡ ሕዝቦ፡ ወኃደረ፡ ውስተ፡ ኢያቤር፡ ወተቃተሎሙ፡ ለእስራኤል፡ ወአግብአሙ። እግዚአብሔር፡ አምላክ፡ እስራኤል፡ ለሴዎን፡ ወለኩሉ፡ ሕዝቡ፡ ውስተ፡ እደዊሆሙ፡ ለእስራኤል፡ ወቀተልዎሙ፡ ወተዋረስዎሙ፡ እስራኤል፡ ኩሎ፡ ምድሮሙ፡ ለአሞሬዎን፡ እለ፡ ይነብሩ፡ ውስተ፡ ይእቲ፡ ምድር፡ ወተዋረሱ፡ ኩሎ፡ ምድሮሙ፡ ለአሞሬዎን፡ እምነ፡ አርኖን፡ እስከ፡ ኢያባቅ፡ ወእምነ፡ ገዳም፡ እስከ፡ ዮርዳኖስ። ወይእዜኒ፡ እግዚአብሔር፡ አምላክ፤ እስራኤል፡ አስስሎሙ፡ ለአሞሬዎን፡ እምቅድመ፡ ገጾሙ፡ ለእስራኤል፡ ወአተኑ፡ ትትዋረስ፡ በዕብሬትከ፡ ከሞስአ፡ አምላክከ፡ ኪያሁ፡ ዳእሙ፡ ትትዋረስ፡ ወኩሉ፡ አውረስነ፡ እግዚአብሔር፡ አምላክነ፡ ቅድሜነ፡ ኪያሁ፡ ንትዋረስ። ወይእዜኒ፡ {...}ቦኑ፡ አንተ፡ ትኄይሶ፡ ለባላቅ፡ ወልደ፡ ሴፎር፡ ንጉሡ፡ ሞአብ፡ ባእሰኑ፡ ተበአሰ፡ ምስለ፡ እስራኤል፡ አው፡ ፀብአኑ፡ ተፃብአሙ፡ ለእስራኤል፡ አመ፡ ነበረ፡ በሐሴቦን፡ ወበአዋልዲሃ፡ ወበኢያዜር፡ ወበአዋልዲሃ፡ ወበኩሉ፡ አህጉር፡ ዘሀበ፡ አርኖን፡ በ፫፫፡ ዓመት፡ ለምንት፡ ኢያድኃንዎሙ፡ በዝንቱ፡ መዋዕል። ወአነኒ፡ ኢአበስኩ፡ ለከ፡ ወአንተሰ፡ ትገብር፡ እኪተ፡ ምስሌየ፡ ከመ፡ ትትቃተለኒ። ወይፍታሕ፡ እግዚአብሔር፡ ዘውእቱ፡ ይፈትሕ፡ ዮም፡ ማእከለ፡ ደቂቀ፡ እስራኤል፡ ወማእከለ፡ ደቂቀ፡ አሞን። ወአበዮ፡ ንጉሡ፡ ደቂቀ፡ አሞን። ወኢስምዓ፡ ቃለ፡ ዮፍታሔ፡ ዘለአከ፡ ሎቱ፡ ወመጽአ፡ መንፈሰ፡ እግዚአብሔር፡ ላዕለ፡ ዮፍታሔ፡ ወዓደወ፡ ምድረ፡ ገለአድ፡ ወዘምናሴ፡ ወዓደወ፡ ውስተ፡ መሴፋ፡ ዘ

F.101v

(col. 1) ገለአድ፡ ወእምነ፡ መሴፋ፡ ዘገለአድ፡ (ሐረ፡ ውስተ)ማዕድቶሙ፡ ለደቂቀ፡ አሞን፡ ወበፅአ፡ ዮፍታሔ፡ ብፅዓተ፡ ለእግዚአብሔር፡ ወይቤ፡ ለእመ፡ አግብአሙ፡ ለደቂቀ፡ አሞን፡ ውስተ፡ እዴየ፡ ወመዲአ፡ ዘወፅአ፡ እምነ፡ ጥጎተ፡ ቤትየ፡ ወተቀበለኒ፡ ሶበ፡ ገባእኩ፡ በዳጎን፡ እምነ፡ ጎበ፡ ደቂቀ፡ አሞን፡ ለእግዚአብሔር፡ እሬስዮ፡ መሥዋዕተ፡ ወዓደወ፡ ዮፍታሔ፡ ጎበ፡ ደቂቀ፡ አሞን፡ ከመ፡ ይትቃተሎሙ፡ ወአግብአሙ፡ እግዚአብሔር{.....}(ር፡ ውስተ፡ እዴሁ፡ ወቃተሎሙ፡ ወአግብአሙ፡ እግዚአብሔር፡ ወቀተሎሙ፡ እምነአ{.....}(ሮኤር፡ እስከ፡ ይበጽሕ፡ ውስተ፡ ኢዮምት፩)፥አህጉር፡ እስከ፡ አቤል፡ አዕፃደ፡ ወይን፡ ዐቢየ፡ ቀትለ፡ ጥቀ፡ ወተሐውሩ፡ ደቂቀ፡ አሞን፡ ቅድመ፡ ደቂቀ፡ እስራኤል፡ ክፍል፡ ፵፮፡ ወአተወ፡ ዮፍታሔ፡ ውስተ፡ መሴፋ፡ ውስተ፡ ቤቱ፡ ወናሁ፡ ወለቱ፡ ወጽአት፡ ወተቀበለቶ፡ ምስለ፡ ከበሮ፡ ወመሰንቆ፡ ወይእቲ፡ ባሕቲታ፡ ሎቱ፡ እንተ፡ ያፈቅር፡ ወአልቦ፡ ባዕደውሉደ፡ እንበሌሃ፡ ወኢወልደ፡ ወኢወለተ፡ ወሶበ፡ ርእያ፡ ሰጠጠ፡ አልበሲሁ፡ ወይቤ፡ አሌሊተ፡ ወለትየ፡ አእቀጽክኒ፡ ወዕፁብ፡ ኮንከኒ፡ ወአንሰ፡ ፈታሕኩ፡ አፉየ፡ ጎበ፡ እግዚአብሔር፡ በእንቲአኪ፡ ወኢይክል፡ ዓሊዎቶ፡ ወትቤሎ፡ አባ፡ ለእመ፡ በእንቲአየ፡ ፈታሕከ፡ አፉከ፡ ጎበ፡ እግዚአብሔር፡ ረስየኒ፡ በከመ፡ ወጽአ፡ እምአፉከ፡ እስመ፡ ገብረ፡ ለከ፡ እግዚአብሔር፡ በቀለ፡ እምነ፡ ፀርከ፡ እምነ፡ ደቂቀ፡ አሞን፡ ወትቤሎ፡ ለአቡሃ፡ ረሲ፡ ሊተ፡ ዘቃለ፡ አብሐኒ፡ ክልኤተአውራጋ፡ እሖር፡ ወአዕርግ፡ ውስተ፡ አድባር፡ ወአብኪ፡ ላዕለ፡ ድንግልናየ፡ ምስለ፡ ካልእትየ፡ ወይቤላ፡ ሑሪ፡ ወፈነዋ፡ ክልኤተ፡ አውራጋ፡ ወሖረት፡ ይእቲ፡ ወካልአኒሃኒ፡ ወበከያ፡ ላዕለ፡ ድንግልናሃ፡ ምስለ፡ ካልአቲሃ፡ በውስተ፡ አድባር፡ ወእምድጎረ፡ ሐልቀ፡ ፪አውራጎ፡ ገብአት፡ ጎበ፡ አቡሃ፡ ወገብረ፡ ዮፍታሔ፡ ብፅዓቲሁ፡ ዘበፅዓ፡ ወይእቲስ፡ ኢተአምር፡ ብእሴ፡ ወኮነት፡ ሕግ፡ በውስተ፡ እስራኤል፡ በመመዋዕሊሁ፡ የሐውራ፡ አዋልደ፡ እስራኤል፡ ይብክያሃ፡ ለወለተ፡ ዮፍታሔ፡ ገለአዳዊ፡ ረቡዓ፡ መመዋዕለ፡ (ለለዓመ){.}ት፡ ክፍል፡ ፵፯ ወተጋብሑ፡ ደቂቀ፡ ኤፍሬም፡ ወመጽአ፡ ውስተ፡ ሴፍና፡ ወይቤልዎ፡ ለዮፍታሔ፡ ለምንት፡ ሖርከ

(col. 2) ትትቃተሎሙ፡ ለደቂቀ፡ አሞን፡ ወኢጸዋዕከነ፡ ከመ፡ ንሖር፡ ምስሌከ፡ ናውዔ፡ ቤተከ፡ ላዕሌከ፡ በእሳት፡ ወይቤሎሙ፡ ዮፍታሔ፡ ብእሲ፡ ግፉዕ፡ አነ፡ ወሕዝብየ፡ ወደቂቀ፡ አሞን፡ ሰቀዩነ፡ ወጸራሕነ፡ ለክሙ፡ ወኢያድጋንክሙነ፡ እምነ፡ እዴሆሙ፡ ወሶበ፡ ርኢኩ፡ ከመ፡ አልቦ፡ ዘያድጎን፡ አግባእክዋ፡ ለነፍስየ፡ ውስተ፡ እዴየ፡ ወዓደውኩ፡ ጎበ፡ ጎበ፡ ደቂቀ፡ አሞን፡ ወአግብአሙ፡ እግዚአብሔር፡ ቅድሜየ፡ ወለምንት፡ ዓረግሙ፡ ጎቤየ፡ ዮም፡ ትትቃተሉኒ፡ ወአስተጋብአሙ፡ ዮፍታሔ፡ ለኩሉ፡ ሰብአ፡ ገለአድ፡ ወተፃብዓ፡ ምስለ፡ ኤፍሬም፡ ወቀተልዎሙ፡ ሰብአ፡ ገለአድ፡ ለኤፍሬም፡ እስመ፡ ይቤልዎሙ፡ ድጉናነ፡ ኤፍሬም፡ አንትሙ፡ ገለአድ፡ ማእከለ፡ ኤፍሬም፡ ወማእከለ፡ ምናሴ፡ ወአጎበ፡ ገለአድ፡ ምዕዳወ፡ ዮርዳኖስ፡ ዘኤፍሬም፡ ወእምዝ፡ ሶበ፡ ይቤሉ፡ ድጉናነኤፍሬም፡ አአዱ፡ ወይቤልዎሙ፡ ሰብአ፡ ገለአድአንትሙኒ፡ ቦኑ፡ እምነ፡ ኤፍሬም፡ እሙንቱ፡ ወይቤልዎ፡ አኮ፡ ወይቤሎሙ፡ በሉ፡ ሺኮሊት፡ ወዓበዩ፡ ብሂለ፡ ሲኮሊት፡ ወኢበየኑ፡ ነገረ፡ ለተናግሮ፡ ከመዝ፡ ወይእጎዝዎ፡ ወይቀትልዎ፡ በውስተ፡ ምዕዳወ፡ ዮርዳኖስ፡ ወወድቁ፡ እምነ፡ ኤፍሬም፡ ይእተ፡ አሚረ፡ ፬፻፱፡ ወ፳፻፱፡ ወኩነኖሙ፡ ለእስራኤል፡ ዮፍታሔ፡ ፯ዓመተ፡ ወሞተ፡ ዮፍታሔ፡ ገለአዳዊ፡ ወተቀብረ፡ ውስተ፡ ሀገሩ፡ ገለአድ፡ ክፍል፡ ፵፰፡ ወኩነኖሙ፡

ለእስራኤል፡ እምድጎፊሁ፡ ሔሴቦን፡ ዘእምነ፡ ቤተ፡ ልሔዎ፡ ወወለደ፡ ሸደቂቀ፡ ወሸደቂቀ፡ እለ፡ አስተዋሰበ፡ አፍአ፡ ወሸደቂቀ፡ ነሥአ፡ ለደቂቀ፡ እምነ፡ አፍአወኩነኖሙ፡ ለእስራኤል፡ ፯ዓመተ። ወሞተሔሴቦን፡ ወተቀብረ፡ ውስተ፡ ቤተ፡ ልሔዎ። ክፍል፡ ፱። ወኩነኖሙ፡ እምድጎፊሁ፡ ለእስራኤል፡ ኤሎም፡ ዛብሎናዊ፡ ወኩነኖሙ፡ ለእስራኤል፡ ፲ዓመተ። ወሞተ፡ ኤሎም፡ ዛብሎናዊ፡ ወቀበርዎ፡ ውስተ፡ ምድረ፡ ዛብሎን። ክፍል፡ ፶፡ ወኩነኖሙ፡ ለእስራኤል፡ እምድጎፊሁ፡ አብዶን፡ ኤፍሬታዊ፡ ወተወልዱ፡ ሎቱ፡ ሸደቂቀ፡ ወሸ፡ ደቂቀ፡ ደቂቀ፡ ይጼዓኑ፡ ላዕለፎ፡ አእዱግ፡ ወኩነኖሙ፡ ለእስራኤል፡ ፳ዓመት፡ ወሞተ፡ አብዶን፡ ወልደ፡ ኤሎም፡ ኤፍሬታዊ፡

(col. 3) ወቀበርዎ፡ ውስተ፡ ኤፍሬታ፡ ውስተ፡ ምድረ፡ ኤፍሬም፡ ውስተ፡ ደብረ፡ አማሌቅ። ወደገሙ፡ ደቂቀ፡ እስራኤል፡ ገቢረ፡ እከይ፡ ቅድመ፡ እግዚአብሔር፡ ወአግብአሙ፡ ውስተ፡ እደ፡ ኢሎፍሊ፡ ፵ዓመተ። ክፍል፡ ፶፩። ወሀለወ፡ ብእሲ፡ ዘእምነ፡ ስራሕ፡ ዘእምነ፡ ነገደ፡ ዳን፡ ወስሙ፡ ምናሔ፡ ወብእሲቱሰ፡ መካን፡ ይእቲ፡ ወኢትወልድ። ወአስተርአያ፡ መልአከ፡ እግዚአብሔር፡ ለብእሲቱ፡ ወይቤላ፡ ናሁ፡ መካን፡ ይእቲ፡ ወኢወለድኪት፡ ወትወልዲ፡ ወልደ። ወይእዜኒ፡ ኢትስትዩ፡ ተዓቀቢ፡ ወይነ፡ ወሜስ፡ ወኢትብልዲ፡ ኩሉ፡ ዘርኩስ፡ እስመ፡ ናሁ፡ ትፀንሲ፡ ወትወልዲ፡ ወልደ፡ ወኢይለከፎ፡ ርእሶ፡ ሐፂን፡ እስመ፡ ቅዱስ፡ ውእቱ፡ ናዝራዊ፡ ለእግዚአብሔር፡ ውእቱ፡ ሕፃን፡ እምከርሠ፡ እሙ፡ ውእቱ፡ ይእነዝ፡ ያድጎኖ፡ ለእስራኤል፡ እምነ፡ እደ፡ ኢሎፍሊ። ወሐረት፡ ይእቲ፡ ብእሲት፡ ወነገረቶ፡ ለምታ፡ ወትቤሎ፡ ብእሴ፡ እግዚአብሔር፡ መጽአ፡ ጎቤየ፡ ወርእየቱ፡ ከመ፡ መልአከ፡ እግዚአብሔር፡ ወግሩም፡ ውእቱ፡ ጥቀ፡ ወኢተስልክዎ፡ እምአይቱ፡ ውእቱ፡ ወኢያይድአኒ፡ ስሞ፡ ወይቤለኒ፡ ናሁ፡ ትፀንሲ፡ ወትወልዲ፡ ወልደ። ወይእዜኒ፡ ኢትስትዩ፡ ወይነወሜስ፡ ወዲትብልዲ፡ ኩሎ፡ ዘርኩስ፡ እስመ፡ ናዝራዊ፡ ውእቱ፡ ሕፃን፡ ለእግዚአብሔር፡ እምነ፡ ከርሠ፡ እሙ፡ እስከ፡ ይመውት። ወሰአለ፡ ምናሔ፡ ጎቤ፡ እግዚአብሔር፡ ወይቤ፡ እግዚአ፡ ብእሴ፡ እግዚአብሔር፡ ዘፈኖከ፡ ጎቤነ፡ ለይምጸእ፡ ዳግመ፡ ጎቤነ፡ ወያለብወነ፡ ምንተ፡ ንግበር፡ ለውእቱ፡ ሕፃን፡ ዘይትወለድ። ወስምዎ፡ እግዚአብሔር፡ ቃሎ፡ ለምናሔ፡ ወመጽአ፡ መልአከ፡ እግዚአብሔር፡ ጎቤ፡ ብእሲቱ፡ ዓዲ፡ እንዘ፡ ትነብርውስተ፡ ገዳም፡ ወኢሀለወ፡ ምናሔ፡ ምታ፡ ምስሌየ፡ ወሮፀት፡ ብእሲቱ፡ ወአፍጠነት፡ ወነገረቶ፡ ለምታ፤ ወትቤሎ፡ ናሁ፡ አስተርእየኒ፡ ዝክቱ፡ ብእሲ፡ ዘመጽአ፡ ጎቤየ፡ ቀዲሙ፡ ወተንሥአ፡ ምናሔወሐረ፡ ወተለዋ፡ ለብእሲቱ፡ ወመጽአ፡ ጎቤ፡ ብእሲ፡ ወይቤሎ፡ አንተኑ፡ ዝኩ፡ ብእሲ፡ ዘተናገርከ፡ ምስለ፡ ብእሲትየ፤ ወይቤሎ፡ መልአከ፡ አነ፡ ውእቱ፡ ወይቤሎ፡ ምናሔ፡ ይእዜ፡ ሶቤ፡ በጽሐ፡ ቃልከ፡ ምንት፡ ውእቱ፡ ነገሩ፡ ወግብሩ፡ ለውእቱ፡ ሕፃን። ወይቤሎ፡ መልአከ፡ እግዚአብሔር፡ ለምናሔእምነ፡ ኩሉ፡ ዘእቤላ፡ ለብእሲ(ት)ከ፡ ቅትዓቀብ፡ እምነ፡ ኩሉ፡ ዘይወጽእ፡ እምነ፡ ወይን፡ ኢትብላዕ፡ ወይነ፡ ወሜስ፡ ኤትስተይ፡ ወኩሉ፡ ዘርኩስ፡ ኢትብላዕ፡ ወኩሉ፡ ዘአዘዝከዋ፡ ትትዓቀብ። ወ

F.102r

(col. 1) ይቤሎ፡ ምናሔ፡ ለመልአከ፡ እግዚአብሔር፡ ናጌብረከ፡ ወንገብር፡ ለከ፡ መሐስአ፡ ጠሊ፡ ቅድሜከ። ወይቤሎ፡ መልአከ፡ እግዚአብሔር፡ ለምናሔ፡ አመ፡ አገበርከኒ፡ ኢይበልዕ፡ እክለከ፡ ወእመሰ፡ ለእግዚአብሔር፡ ገበርከ፡ መሥዋዕተ፡ ግበር፡ ሎቱ። እስመ፡ ኢያእመሮ፡ ምናሔ፡ ከመ፡ መልአከ፡ እግዚአብሔር፡ ውእቱ። ወይቤሎ፡ ምናሔ፡ ለመልአከ፡ እግዚአብሔር፡ ሙኑ፡ ስምከ፡ ከመ፡ አመ፡ በጽሐ፡ ቃልከ፡ ንሰብሕከ። ወይቤሎሙ፡ መልአከ፡ እግዚአብሔር፡ ለምንት፡

ዝንቱ፡ ዘትሴአል፡ ስምየ፡ ወመድምም፡ ውእቱ። ወነሥአምናሔ፡ ማሕስኦ፡ ጠሊ፡ መሥዋዕቶ፡
 ወአዕረገ፡ ዲበ፡ ከኩሕ፡ ለእግዚአብሔር፡ ዘይገብር፡ መድምመ፡ ወርእይዎ፡ ምናሔ፡ ወብእሲቱ፡
 ሶበ፡ ዓርገላዕለ፡ ምሥዋዕ፡ ውስተ፡ ሰማይ። ወዓርገ፡ ውስተ፡ ሰማይ፡ መልአከ፡ እግዚአብሔር፡
 በነደ፡ ምሥዋዕ፡ ውስተ፡ ሰማይ። ወምናሔሰ፡ ወብእሲቱ፡ ርእይዎ፡ ወወድቁ፡ በገጽሙ፡ ዲበ፡
 ምድር፡ ወኢደገመ፡ እንከ፡ መልአከ፡ እግዚአብሔር፡ ወአስተርአዮ፡ ለምናሔ፡ ወብእሲቱ፡
 ወውእተ፡ ጊዜ፡ አእመረ፡ ምናሔ፡ ከመ፡ መልአከ፡ እግዚአብሔር፡ ውእቱ። ወይቤላ፡ ምናሔ፡
 ለብእሲቱ፡ ሞተ፡ ንመውት፡ እስመ፡ ርኢናሁ፡ ለመልአከ፡ እግዚአብሔር፡ ወትቤሎ፡ ብእሲቱ፡
 ሰበስ፡ ፈቀደ፡ ይቅትለን፡ እግዚአብሔር፡ እመ፡ ኢተመጠወ፡ እምነ፡ እዴነ፡ መሥዋዕተ፡ ወቀረባን፡
 ወእመ፡ ኢአለበወነ፡ ኩሎ፡ ዘንተ፡ በከመ፡ መዋዕሊሁ፡ እስመ፡ ኢያስምዓነዘንተ። ወወለደት፡
 (ወልደ፡ ይእቲ፡) ብእሲት፡ ወሰመየቶስሞ፡ ሶምሶን፡ ወባረኮ፡ እግዚአብሔር፡ ወልሕቀ፡ ውእቱ፡
 ሕፃን፡ ወአኃዘ፡ መንፈስ፡ እግዚአብሔር፡ ይሖር፡ ምስሌሁ፡ ውስተ፡ ትዕይንተ፡ ዳን፡ ማእከለ፡
 ስራሕ፡ ማእከለ፡ አስታሔል። ክፍል፡ ፶፪ ወወረደ፡ ሶምሶን፡ ውስተ፡ ታምናታ፡ ወርእየ፡ ብእሲተ፡
 እምነ፡ አዋልደ፡ ኢሎፍሊ፡ ወአደመቶ፡ ቅድሜሁ፡ ወዓርገ፡ ወነገሮሙ፡ ለአቡሁ፡ ወለእሙ

(col. 2) ወይቤሎሙ፡ ርኢኩ፡ ብእሲተ፡ በታምናታ፡ እምነ፡ አዋልደ፡ ኢሎፍሊ። ወይእዜኒ፡
 ንሥእዋ፡ ሊተ፡ ብእሲተ፡ ወይቤልዎ፡ አቡሁ፡ ወእሙ፡ ቦኑ፡ አልቦእምነ፡ አዋልደ፡ አኃዊከ፡
 ወውስተ፡ ኩሎ፡ ሕዝብየ፡ ብእሲተ፡ ከመ፡ ትሖር፡ አንተ፡ ወትንሣእ፡ ብእሲተ፡ እምነ፡ አዋልደ፡
 ኢሎፍሊ፡ ቈላፋን። ወይቤሎ፡ ሳምሶን፡ ለአቡሁ፡ ኪያሃ፡ ዳእሙ፡ ንሥኡሊተ፡ እስመ፡ አደመተኒ፡
 ውስተ፡ አዕይንትየ። ወኢያእመሩ፡ አቡሁ፡ ወእሙ፡ ከመ፡ እምነበ፡ እግዚአብሔር፡ ውእቱ፡
 እስመ፡ በቀለ፡ ይፈቅድ፡ ውእቱ፡ ወበእማንቱ፡ መዋዕል፡ ይቀንይዎሙ፡ ኢሎፍሊ፡ ለእስራኤል።
 ክፍል፡ ፶፫፡ ወወረደ፡ ሶምሶን፡ አቡሁ፡ ወእሙ፡ ውስተ፡ ቴምናታ፡ ወተግሳሠ፡ ውስተ፡ ዓፀደ፡
 ወይን፡ ዘቴምናታ፡ አንበሳ፡ ተቀበሎ፡ እንዘ፡ ይጥጎር፡ ወመጽአ፡ ላዕሌሁ፡ መንፈስ፡ እግዚአብሔር፡
 ወነጽሖ፡ ከመ፡ ዘይነጽሖ፡ ማሕስኦ፡ ጠሊ፡ ወከመ፡ ወኢምንት፡ ኮነ፡ ውስተ፡ እዴሁ፡ ወኢያይድዓ፡
 ለአቡሁ፡ ወእሙ፡ ዘገብረ። ወወረደ፡ ወተናገራ፡ ለብእሲት፡ ወአደመቶ፡ ቅድሜሁ፡ ለሰምሶን፡
 ወተመይጠ፡ እምድጎረ፡ መዋዕል፡ ከመ፡ ይንሣእ፡ ወተግሳሠ፡ ከመ፡ ይርአዮ፡ ለዝንቱ፡ በድነ፡
 አንበሳ፡ ወናሁ፡ ንሕብ፡ ውስተ፡ አፋሁ፡ ለዝኩ፡ አንበሳ፡ ጎደረ፡ ወቦ፡ መዓረ፡ ወነሥኦ፡ ወበልዓ።
 ወሖረ፡ እንዘ፡ ይበልዕ፡ ወበጽሖ፡ ጎበ፡ አቡሁ፡ ወእሙ፡ ወወሀቦሙ፡ ወበልዑ፡ ኢያይድዎሙ፡
 ከመ፡ እምአፈ፡ አንበሳ፡ አውፅኦ፡ ለውእቱ፡ መዐር፡ ወወረደ፡ አቡሁ፡ ጎበ፡ ይእቲ፡ ብእሲት፡
 ወገብረ፡ ህየ፡ በዓለ፡ ሶምሶን፡ ሰቡዓ፡ መዋዕለ፡ እስመ፡ ከማሁ፡ ይገብሩ፡ ወራዙት። ወእምዝ፡
 ሶበ፡ ወሀብዎ፡ አንበሩ፡ ምስሌሁ፡ ካልኦነ፡ ፴እደው። ወነበሩ፡ ምስሌሁ። ወይቤሎሙ፡ ሶምሶን፡
 እሜስል፡ ለክሙ፡ አምሳለ፡ እመ፡ አይዳዕክሙኒ፡ አምሳልየ፡ በእላንቱ፡ ስቡዕ፡
 መዋዕልወረከብክሙ፡ እሁበክሙ፡ ፴ሰንዶናተ፡ ወ፴አልባሰ፡ ወእመሰ፡ ስእንክሙ፡ አይድኦትየ፡
 ትሁቡ፡ ኒ፡ ሊተ፡ አንትሙ፡ ፴ሰንዶናተ፡ ወ፴አልባሰ፡ ወይቤልዎ፡ መስል፡ አልባሲከ፡ ወንስማዕ፡
 ወይቤሎሙ፡ እምነ፡ በላዒ፡ ወፅኦ፡ ወብልዕ፡ ወእምነ፡ ጽኑዕ፡ ወጽኦ፡ ጥዑም፡ ወስእኑ፡ አይድኦቶ፡
 አምሳሊሁ፡ እስከ፡ ሠሉስ፡ መዋዕል። ወእምዝ፡ አ

(col. 3) መ፡ ሳብዕት፡ ዕለት፡ ይቤልዋ፡ ለብእሲተ፡ ሰምሶን፡ አስፍጢዮ፡ ይንግርኪ፡ ምትኪ፡
 አምሳሊሁ፡ ከመ፡ ኢናውዒክሙ፡ በእሳት፡ ለኪ፡ ወለቤተ፡ አቡኪ። አው፡ ከመ፡ ታንድዩነኑ፡

ጸዋዕክሙን፡ ወበከየት፡ ላዕሌሁ፡ ብእሲቱ፡ ለሶምሶን፡ ወትቤሎ፡ ጸላእከኒ፡ ወኢያፍቀርከሂ፡ እስመ፡
 አምሳሊከ፡ ዘመሰልከ፡ ለደቂቀ፡ ሕዝብየ፡ ወኢነገርከኒ፡ ወይቤላ፡ ሶምሶን፡ ናሁ፡ ለአቡየ፡ ወለእምየ፡
 ኢነገርኩ፡ ለኪኑ፡ እነግረኪ፡ ወበከየት፡ ላዕሌሁ፡ ሰቡዓ፡ መዋዕለ፡ ዘበዐል፡ ወእምዝ፡ አመ፡
 ሰብዕት፡ ዕለት፡ ነገራ፡ ሶበ፡ አስርሐቶ፡ ወአይድዓቶሙ፡ ለደቂቀ፡ ሕዝባ፡ ወይቤልዎ፡ እሙንቱ፡
 እደው፡ አመ፡ ሳብዕት፡ ዕለት፡ እንበለ፡ ይዕርብ፡ ፀሐይ፡ ምንት፡ ይጥዕም፡ እምነ፡ መዐር፡
 ወምንት፡ ይጸንዕ፡ እምነ፡ አንበሳ፡ ወይቤሎሙ፡ ሶምሶን፡ ሶበ፡
 ኢያስራኅክምዋ፡ {.....}(ለእጐልትየ፡ እምኢያእመርክምዋ፡ ለምሳሌየ፡
 ወመጽአ፡ ላዕሌሁ፡ ወንፈስ፡ እግዚ)አብሔር፡ ወወረደ፡ ውስተ፡ አስቀሎና፡ ወቀተለ፡ ፴ብእሴ፡
 ወሰለበ፡ አልባሲሆሙ፡ ወወሀብሙ፡ ለእለ፡ አይድዕዎ፡ [አልባሲሆ]፡ ወተምዐ፡ መዓተ፡ ሶምሶን፡
 ወአተወ፡ ቤተ፡ አቡሁ፡ ወኮነት፡ ብእሲተ፡ ሶምሶን፡ ለካልኡ፡ ዘኮነ፡ ሎቱ፡ ካልኡ፡ ክፍል፡ ፶፬፡
 ወእምድኅረ፡ መዋዕል፡ አመ፡ ማእረረ፡ ስርናይ፡ ሐወጸ፡ ሶምሶን፡ ለብእሲቱ፡ ወአምጽአ፡ ላቲ፡
 ማሕለአ፡ ጠሊ፡ ወይቤ፡ እባእ፡ ኀበ፡ ብእሲትየ፡ ውስተ፡ ጽርሐ፡ ወከልኦ፡ አቡሃ፡ በዊአ፡ ኀቤሃ፡
 ወይቤ፡ አቡሃ፡ እስመ፡ እቤ፡ እስመ፡ ጸለእካሃ፡ ወሀብከሃ፡ ለካልእከ፡ ወባሕቲ፡ ናሁእኅታ፡ እንተ፡
 ትንእስ፡ ወትሢንያ፡ ወትኩንከ፡ ህየንቲሃ፡ ወይቤ፡ ሶምሶን፡ ንጹሕ፡ አነ፡ ምዕረ፡ እምነ፡ ኢሎፍሊ፡
 እስመ፡ እገብር፡ እኪተ፡ ምስሌክሙ፡ ወሐረ፡ ሶምሶን፡ ወአኃዘ፡ ሠለስተ፡ ፪ቄናጽለ፡ ወነሥአ፡
 መኃትወ፡ ወአሰረ፡ ውስተ፡ አዝናቢሆሙ፡ ወወደየ፡ ፩ማኅቶተ፡ ማእከለ፡ ፪፡ አዝናቢሆን፡ ወአኅቱወ፡
 እሳተ፡ እስመ፡ ውእቱመኃትወ፡ ወፈነዎሙ፡ ውስተ፡ ክላስስት፡ ዘኢሎፍሊ፡ ወአውየው፡ ሰዊተ፡
 ወክምረ፡ ዘተአዕደ፡ ወ(ዘይ)ቀውም፡ ወዘውጡኅ፡ ወአዕፃዳተ፡ ወይንወዘዘይት፤ ወይቤሎ፡ ኢሎፍሊ፡
 መኑ፡ ገብረ፡ ዘንተ፡ ወይቤሎሙ፡ ሶምሶን፡ ሐሙሁ፡ ለቱምና

F.102v

(col. 1) ታዊ፡ እስመ፡ ሄድዎ፡ ብእሲቶ፡ ወወሀብዎ፡ ለካልኡ፡ ወዐርጉ፡ ኢሎፍሊ፡ ወአውዓዩ፡
 ቤተ፡ አቡሃ፡ በእሳት፡ ኪያሃኒ፡ ወአቡሃኒ፤ ወይቤሎሙ፡ ሶምሶን፡ እመሰ፡ ገበርክሙ፡ ዘንተ፡
 ኢይፈቅድ፡ በቀልየሰ፡ እምነ፡ ፩፡ ወለኩልክሙ፡ እምረሰይኩ፡ ወዘበጦሙ፡ ሶምሶንውስተ፡ ቊያጸ፡
 እገረሆሙ፡ ወኮነ፡ ዓቢይ፡ ቀትል፡ ወወረደ፡ ሶምሶን፡ ውስተ፡ በዓተ፡ ኩኩሕ፡ ዘኤጦም፡ ወዓርጉ፡
 ኢሎፍሊ፡ ወኃደሩ፡ ላዕለ፡ ይሁዳ፡ ወተዓዝሩ፡ ላዕለ፡ ላሂ፡ ወይቤሎሙ፡ ኩሉ፡ ሰብአ፡ ይሁዳ፡
 ለምንት፡ ዓረግሙ፡ ላዕሌነ፡ ወይቤሎ፡ ኢሎፍሊ፡ ከመንእስሮ፡ ለሶምሶን፡ ወዓረግነ፡ ወንገብሮ፡
 በከመ፡ ገበርነ፡ ወወረዱ፡ ፴፪፡ ብእሲ፡ እምነ፡ ይሁዳ፡ ኀበበዓተ፡ ኩኩሕ፡ ዘኤጦም፡ ወይቤልዎ፡
 ለሶምሶን፡ ኢተአምርኑ፡ ከመ፡ ኢሎፍሊ፡ ይኳንኑነ፡ ለምንት፡ ገበርከ፡ ከመዝ፡ ላዕሌነ፤ ወይቤሎሙ፡
 ሶምሶንበከመ፡ ገብሩ፡ ላዕሌክሙ፡ ከማሁ፡ ገበርኩ፡ ላዕሌሆሙ፤ ወይቤልዎ፡ ከመ፡ ንእስርከ፡
 ወረድነ፡ ወናግብእከ፡ ውስተ፡ እደ፡ ኢሎፍሊ፡ ወይቤሎሙ፡ ሶምሶን፡ መሐሉ፡ ሊተ፡ አንትሙ፡
 ከመ፡ ኢትቅትሉኒ፡ አንትሙ፡ ወአግብኡኒ፡ አንትሙ፡ ሎሙ፡ ወአንትሙሰ፡ ኢትትራከቡ፡
 ምስሌየ፡ ወመሐሉ፡ ሎቱ፡ ወይቤሎ፡ አልቦ፡ ዳእሙ፡ ነአስረከ፡ ወናገብእከ፡ ውስተ፡ እዴሆሙ፡
 ወቀቲለሰ፡ ኢነቀትለከ፤ ወአሰርዎ፡ በ፪፡ መጻምድ፡ ሐደስት፡ ወአውፅእዎ፡ እምይእቲ፡ ኩኩሕ፡
 ወበጽሐ፡ እስከ፡ ኀበ፡ ላሂ፡ ወውዑ፡ ኢሎፍሊ፡ ወተቀበልዎ፡ ወሮጹ፡ ላዕሌሁ፡ ወመጽአ፡ ላዕሌሁ፡
 መንፈስ፡ እግዚአብሔር፡ ወኮነ፡ እልክቱ፡ መጻምድ፡ እለ፡ ውስተ፡ መዝራዕቱ፡ ከመ፡ ኃሠር፡ ሶበ፡
 ያጼኑ፡ እሰት፡ ወተፈትሐ፡ መሕመሜሁ፡ እምነ፡ መዝራዕቱ፡ ወረከበ፡ ዓፅመ፡ መንከሰ፡ አድግ፡

ግዱፍ፡ ውስተ፡ ፍኖት፡ ወአትሐተ፡ እዴሁ፡ ወተመጠዋ፡ ወቀተለ፡ ባቲ፡ ፲፪፡ ብእሴ። ወይቤ፡ ሶምሶን፡ በዓፅመ፡ መንከስ፡ አድግ፡ ደምስሶ፡ ደምስስክዎሙ፡ እስመ፡ በዓፅመ፡ መንከስ፡ አድግ፡ ቀተልኩ፡ ፲፪፡ ብእሴ። ወእምዝ፡ ሶበ፡ አሕለቀ፡ ነቢበ፡ ገደፋለይእቲ፡ ዓፅመ፡ {...}፡ መንሶከ፡ እምእዴሁ፡ ወሰመዮ፡ ለውእቱ፡ መካን፡ ቀትል፡ ዓፅመ፡ መንከስ፡ ወፀምዓ፡ ጥቀ፡ ወጸርሐ፡ ኀበ፡ እግዚአብሔር፡ ወይቤ፡ አንተ፡ አግባእከ፡ ውስተ፡ እደ፡ ገብርከ፡ ዛተ፡ ሕይተ፡ ዓቢየ፡ ወይእዜሰ፡ እመውት፡ በጽምእ፡ ወእወ

(col. 2) ድቅ፡ ውስተ፡ እዴሆሙ፡ ለቈላፋን። ወእርሐወ፡ እግዚአብሔር፡ ንቅዓታ፡ ለይእቲ፡ ዓፅመ፡ መንከስ፡ ወወፅ፡ እምኔሃ፡ ማይ፡ ወሰትየ፡ ወገብአ፡ ነፍሱ፡ ወአዕረፈ፡ ወበበይነ፡ ዝንቱ፡ ተሰምየ፡ ስሙ፡ ለውእቱ፡ መካን፡ ነቅዓ፡ ዓፅመ፡ መንከስ፡ እስከ፡ ዮም፤ ወከነንዎሙ፡ ለእስራኤል፡ በመዋዕለ፡ ኢሎፍሊ፡ ጁዓመተ። ክፍል፡ ፶፭ ወሐረ፡ ሶምሶን፡ እምህየ፡ ውስተ፡ ጋዛን፡ ወርእየ፡ ብእሲተ፡ ዘማ፡ ወቦአ፡ ኀቤሃ፡ ወነገርዎሙ፡ ለሰብአ፡ ጋዛን። ወይቤልዎሙ፡ መጽአ፡ ሶምሶን፡ ዝየ፡ ወዓገትዎ፡ ወኦድዎ፡ ኩላ፡ ሌሊተ፡ ወይቤሉ፡ ንጸንሕ፡ እስከ፡ ይበጽሕ፡ ወንቅትሎ። ወኖመ፡ ሶምሶን፡ እስከ፡ መንፈቀ፡ ሌሊት። ወተንሥአ፡ መንፈቀ፡ ሌሊት፡ ወአኀዛ፡ ለኖኀተ፡ ሀገር፡ ዘአንቀጽ፡ በክልኤሆን፡ ሩግዛቲሃ፡ ወጸሮሙ፡ ምስለ፡ ኩሉ፡ ሰብአ፡ ወተሰክመ፡ ላዕለ፡ መትከፍቱ፡ ወአዕረጎሙ፡ ውስተ፡ ርእሰ፡ ደብር፡ ዘቅድመ፡ ኬብሮን፡ ወአንበሮሙ፡ ህየ። ወእምድኀረ፡ ዝንቱ፡ አፍቀረ፡ ብእሲተ፡ በኀበ፡ ፈለገ፡ ሴሬኀ፡ ወስማ፡ ደሊላ፡ ወዓርጉ፡ ኀቤሃ፡ መሳፍንተ፡ ኢሎፍሊ፡ ወይቤልዎ፡ አስፍጢዮ፡ ወእእምሪ፡ በምንት፡ ውእቱ፡ ኀይሉ፡ ዐቢይ፡ ወበምንት፡ ንክል፡ ንእስሮ፡ ወንሁበኪ፡ ንሕነ፡ ፲፪ ብእሲ፡ ፪ ብሩረ። ወትቤሎ፡ ደሊላ፡ ለሶምሶን፡ አይድዓኒ፡ ምንት፡ ውእቱ፡ ኃይልከ፡ ዐቢይ፡ ወበምንት፡ እምአሰሩከ፡ ትደክም። ወይቤላ፡ ሶምሶን፡ እመ፡ አሠሩኒ፡ በ፯፡ አውታር፡ ሐዳሳት፡ እለ፡ አልቦሙ፡ ብትክተ፡ ወእደክም፡ እንከ፡ ወእከውን፡ ከመ፡ ፩ እንጓለ፡ እመሕያው፡ ወእምጽኡ፡ ሎቱ፡ መሳፍንተ፡ ኢሎፍሊ፡ ፯ አውታረ፡ ሐዳሳተ፡ እለ፡ አልቦሙ፡ ብትክተ፡ ወአሰረቶ፡ ቦሙ፡ ወእለሰ፡ ይጸንሕዎ፡ ይነብሩ፡ ውስተ፡ ውስተ፡ ውሣጢት። ወትቤሎ፡ መጽኡከ፡ ኢሎፍሊ፡ ሶምሶን፡ ወበተኮሙ፡ ለእልክቱ፡ አውታር፡ በከመ፡ ይትበተከ፡ ፈትል፡ ሶበ፡ ያጼኑ፡ እሳተ፡ ወኢተዓውቀ፡ ኃይሉ። ወትቤሎ፡ ደሊላ፡ ለሶምሶን፡ ናሁ፡ አስተቃቀርከኒ፡ ወሐሰተ፡ ተናገርከኒ፡ ይእዜ፡ ዓይድዓኒ፡ በምንት፡ የአሰሩከ፡ ወይቤላ፡ እመ፡ አሰሩኒ፡ በ፯፡ መጻምድ፡ እለ፡ ኢገ[ብ]ሩ፡ ቦሙ፡ ግብረ፡ እደክም፡ ወእከውን፡ ከመ፡ ፩ እምእንጓለ፡ እመሕያው፤ ወንሥአት፡ ደሊላ፡ መጻምድሐደስተ፡ ወአሰረቶ፡ ቦቱ፡ ወትቤሎ፡ ኢሎፍሊ፡ መጽኡከ፡ ሶምሶን። ወእለሰ፡ ይጸንሕዎ፡ ይነብሩ፡ ውሣ

(col. 3) ጤ፡ ወበተኮሙ፡ እምነ፡ መዝራእቱ፡ ከመ፡ ፈትል፡ ወትቤሎ፡ ደሊላ፡ ለሶምሶን፡ ይእዜኒ፡ አስተሐቀርከኒ፡ ወሐሰተ፡ ተናገርከኒ፡ አይድዓኒ፡ በምንት፡ የአሰሩከ፡ ወይቤላ፡ እመ፡ ጸፈርኪዮን፡ ለሰብዑ፡ ቈናዝእየ፡ ዘርእስየ፡ ወአሰርኪዮን፡ በሰብአ፡ መታክል፡ ውስተ፡ ዓረፍት፡ ወእደክም፡ እንከ፡ ከመ፡ ፩ እንጓለ፡ እመሕያው። ወአንበረቶ፡ ደሊላ፡ ወጻፈረቶ፡ ለሰብአ፡ ቈናዝዒሁ፡ ዘርእሱ፡ በኃይል፡ ወተከለቶ፡ በመታክል፡ ውስተ፡ ዓረፍት፡ ወትቤሎ፡ መጽኡከ፡ ኢሎፍሊ፡ ሶምሶን፡ ወንቅሀ፡ እምንዋሙ፡ ወነዝዓ፡ ውእተ፡ መትከለ፡ እምነ፡ እረፍት፡ ምስለ፡ ቈናዝዒሁ። ወትቤሎ፡ ደሊላ፡ እፎ፡ ትብለኒ፡ አፍቀርኩኪ፡ ወልብየ፡ ምስሌኪ፡ ናሁ፡ ሳልሰ፡ ዝንቱ፡ እንዘ፡ ታስተሐቅረኒ፡ ወኢታየድዓኒ፡ ለምንት፡ ውእቱ፡ ኃይልከ፡ ዐቢይ። ወእምዝ፡ ሶበ፡ አስርሐቶ፡ በነቢብ፡ ኩላ፡

ሌሊተ፡ ወአጽሐበቶ፡ እስከተቈጥዓ፡ ለሞት፡ ዓይድኦ፡ ኩሎ፡ ዘውስተ፡ ልቡ፡ ወይቤላ፡ መላጼ፡ ኢለከፈኒ፡ ርእሰየ፡ እስመ፡ ናዝራዊ፡ አነ፡ ለእግዚአብሔር፡ እምነ፡ ከርሠ፡ እምየ፡ ወእምከመ፡ ተላጸይኩ፡ የኃድገኒ፡ ኃይልየ፡ ወእደክም፡ ወእከውን፡ ከመ፡ ኩሎ፡ እንላ፡ እመሕያው፡ ወእመረቶ፡ ገሊላ፡ ከመ፡ አድዓ፡ ኩሎ፡ ዘውስተ፡ ልቡ፡ ወለአከት፡ ወጸውዓቶሙ፡ ለመላእክተ፡ ኢሎፍሊእንዘ፡ ትብል፡ ንዑአ፡ ዕርጉ፡ እስመ፡ ዐይድዓኒ፡ ኩሎ፡ ዘውስተ፡ ልቡ፡ ወዓርጉ፡ ኀቤሃ፡ ኩሎሙ፡ መሳፍንተ፡ ኢሎፍሊ፡ ወአምጽኡ፡ ወርቀ፡ ምስሌሆሙ፡ ወስኖመቶ፡ ማእከለ፡ ብረኪሃ፡ ወጸውዓት፡ ቀራጹ፡ ወቀረጸቶ፡ ሰብዑ፡ ቈናዝዓ፡ ርእሱ፡ ወአኃዞ፡ ይድከም፡ ወኃደኅ፡ ኃይሉ፡ ወትቤሎ፡ ደሊላ፡ መጽኡከ፡ ኢሎፍሊ፡ ሶምሶን፡ ወነቅሐ፡ እምንዋሙ፡ ወይቤ[እ]ወጽእ፡ ወእገብር፡ ከመ፡ ዘልፍ፡ ወእነጽሐሙ፡ ውእቱስ፡ ኢያእመረ፡ ከመ፡ ኃደኅ፡ እግዚአብሔር፡ ወአኃዝዎ፡ ኢሎፍሊ፡ ወአውፅኡ፡ አዕይንቲሁ፡ ወአውረድዎ፡ ውስተ፡ ጋዛን፡ ወሞቅሕዎ፡ በመሞቅሕተ፡ ሐፂን፡ ወአንበርዎ፡ ውስተ፡ ቤተ፡ ሞቅሕ፡ ይሕርጽ፡ ወአኃዝ፡ ስዕርቱ፡ ይብቀላ፡ እምዘ፡ ቀረጽዎ፡ ክፍል፡ ፶፯፡ ወተጋብኡ፡ መላእክተ፡ ኢሎፍሊ፡ ከመ፡ ይሡዑ፡ መሥዋዕተ፡ ለዳጎን፡ አምላኮሙ፡ ወከመይት፡ ፌሥሐ፡ ወይቤሎ፡ አግብኦ፡ ለነ፡ ለሶምሶን፡ ዐርነ፡ ውስተ፡ እዴነ፡ ወሶበ፡ ርእይዎ፡ ሕዝብ፡ አእኩትዎ፡

F.103r

(col. 1) ለአምላኮሙ፡ ወይቤሎ፡ አግብኦ፡ ለዐርነ፡ ውስተ፡ እዴነ፡ አምላክነ፡ ዘአማስና፡ ለምድርነ፡ ወዘአብዝኃአብድንቲነ፡ ወእምዝ፡ ሶበ፡ ተፈሥሐ፡ ይቤሎ፡ አምጽእዎ፡ ለሶምሶን፡ እምነ፡ ቤተ፡ ሞቅሕ፡ ይትዋነይ፡ በቅድሚነ፡ ወጸውዕዎ፡ ለሶምሶን፡ እምነ፡ ቤተ፡ ሞቅሕ፡ ወሰሐቀ፡ በቅድሚሆሙ፡ ወአቀምዎ፡ ማእከለ፡ ፪አዕማድ፤ ወይቤሎ፡ ሶምሶን፡ ለወልድ፡ ዘይመርሐ፡ አዕርፈኒ፡ ወአግስሰኒ፡ አዕማድ፡ እለ፡ ዲቤሆን፡ ይቀውም፡ ዝንቱ፡ አዕማድ፡ ወአስምከኒ፡ ላዕሌሆን፡ ወገብረ፡ ሎቱ፡ ከማሁ፡ ውእቱ፡ ወልድ፡ ወምሉእ፡ ውእቱ፡ ቤት፡ እደው፡ ወአንስት፡ ሀለዉ፡ ህየ፡ ኩሎሙ፡ መሳፍንተ፡ ኢሎፍሊ፡ ውስተ፡ ናሕስኒ፡ የአክሉ፡ ፴፪፡ እደው፡ ወአንስትኒ፡ ይፈእይዎ፡ ከመይትዋነይ፡ ወጸርሐ፡ ሶምሶን፡ ኀበ፡ እግዚአብሔር፡ ወይቤ፡ እግዚአ፡ ተዘከረኒ፡ ወነጽረኒ፡ አሐተ፡ እንከ፡ ወእትቤቀል፡ በቀለ፡ አሐተ፡ ህየንተ፡ ክልኤሆንአዕይንትየ፡ እምነ፡ ኢሎፍሊ፡ ወአኃዞን፡ ሶምሶን{.....}(ለእልክቱ፡ ክልኤሆን፡)አዕማድ፡ እለ፡ ማእከል፡ እለ፡ ዲቤሆን፡ ይቀውም፡ ውእቱ፡ ቤት፡ ወገፍዖን፡ አሐተ፡ በየማኑ፡ ወአሐተ፡ በፀጋሙ፡ ወይቤ፡ ሶምሶን፡ ለትሙት፡ ነፍስየ፡ ምስለ፡ ኢሎፍሊ፡ ወአጠቆን፡ በኃይሉ፡ ወወድቀ፡ ውእቱ፡ ቤት፡ ማእከለ፡ ኢሎፍሊ፡ ወላዕለመሳፍንት፡ ወላዕለ፡ ኩሎ፡ ሕዝብ፡ ዘውስቴቱ፡ ወኮኑ፡ አላ፡ ሞቱ፡ እለ፡ ቀተለ፡ ሶምሶን፡ በሞቱ፡ ፈድፋደእምእለ፡ በሕይወቱ፡ ወወረዱ፡ አኃዊሁ፡ ወኩሎ፡ ቤተ፡ አቡሁ፡ ወነሥእዎ፡ ወአርጉ፡ ወቀበርዎ፡ ማእከለ፡ ሰሐሪ፡ ወማእከለ፡ ኢስታዎስ፡ ውስተ፡ መቃብረ፡ መናሄ፡ አቡሁ፡ ወኩነኖሙ፡ ለእስራኤል፡ ውእቱ፡ ፳ዓመተ፡ ከፍል፡ ፶፯ ወሀለወ፡ ብእሲ፡ እምነ፡ ደብረ፡ ኤፍሬዎ፡ ወስሙ፡ ሚከ፤ ወይቤላ፡ ለእሙ፡ ዝክቱ፡ ወርቅ፡ ዘትቤልኒ፡ ተስርቀኒ፡ ነዋ፡ ኀቤየ፡ ዘአምሐልኪ፡ አነ፡ ነሣእክዎ፡ ወትቤ፡ እሙ፡ ቡሩክ፡ ወልድየ፡ ለእግዚአብሔር፡ ወአግብኦ፡ ውእተ፡ ወርቀ፤ ፪፡ ወ፪፡ ለእሙ፡ ወትቤ፡ እሙ፡ ቀድሶ፡ ቀደስክዎ፡ ለእግዚአብሔር፡ ለውእቱ፡ ወርቅ፡ እምነ፡ እዴየ፡ ለባሕቲትየ፡ ከመ፡ ይትገበር፡ ግልፎ፡ ወስብኮ፡ ወይቤላ፡ አግብኦ፡ ለኪ፡

ወእሁብኪ፡ ወወሀበ፡ ውእተ፡ ወርቀ፡ ለእሙ፡ ወነሥአት፡ እሙ፡ ውእተ፡ ወርቀ፡ ወወሀበት፡ እምኔሁ፡ ፪፻፡ ብሩረ፡ ለዘ፡ ይሰብኮ፡ ወገብሮ፡ግልር፡ ወስብኮ፡ ወአንበርዎ፡ ውስተ፡ ቤተ፡ ሚካ፡

(col. 2) ወብእሲሁሰ፡ ሚካ፡ ረሰዮ፡ ሎቱ፡ ቤተ{..}እግዚአብሔር፡ ወገብረ፡ ሎቱ፡ ምስለ፡ ወቲራፊን፡ ወመልአ፡ እዴሁ፡ ለ፩፡ እምደቂቁ፡ ወኮኖ፡ ካህነ፡ ወበውእቱ፡ መዋዕል፡ አልቦሙ፡ ንጉሠ፡ በውስተ፡ እስራኤል፡ ብእሲ፡ ዘአደሞ፡ ቅድመ፡ አዕይንቲሁ፡ ይገብር። ክፍል፡ ፶፰፡ ወሀሎ፡ ወልድ፡ ዘእምነ፡ ቤቱ፡ ልሔም፡ ዘእምነ፡ ቤተ፡ ይሁዳ፡ ሌዋዊ፡ ውእቱ፡ ግዩር፡ ህዩ። ወሐረ፡ ብእሲ፡ እምነ፡ ሀገረ፡ ይሁዳ፡ ወእምነ፡ ቤተ፡ ልሔም፡ ከመ፡ ይኅድር፡ ኀበ፡ ረከበ፡ ወበጽሐ፡ ውስተ፡ ደብረ፡ ኤፍሬም፡ ኀበ፡ ቤተ፡ ሚካ፡ ከመ፡ ይቢት። ወይቤሎ፡ ሚካ፡ እምአይቱ፡ መጻእከ። ወይቤሎ፡ ሌዋዊ፡ አነ፡ እምነ፡ ቤተ፡ ልሔም፡ ዘይሁዳ፡ ወአሐውር፡ እንበር፡ ኀበ፡ ረከብኩ። ወይቤሎ፡ ሚካንበር፡ ምስሌየ፡ ወኩነኒ፡ አበ፡ ወካህነ፡ ወአነ፡ እሁብከ፡ ፲ብሩረ፡ ለለመዋዕል፡ ወዘውገ፡ አልባስ፡ ወእሴስየከ፡ ወሐረ፡ ውእቱ፡ ሌዋዊ፡ ወአኀዘ፡ ይንበርምስለ፡ ውእቱ፡ ብእሲ፡ ወኮነ፡ ውእቱ፡ ወልድ፡ ከመ፡ ፩እምደቂቁ፡ ወመልአ፡ እዴሁ፡ ሚካ፡ ለውእቱ፡ ሌዋዊ፡ ወኮኖ፡ ውእቱ፡ ወልድ፡ ካህነ፡ ወነበረ፡ ውስተ፡ ቤተ፡ ሚካ፡ ወይቤ፡ ሚካ፡ ይእዜ፡ አእመርኩ፡ ከመ፡ አሠነዩ፡ ገቢረ፡ ላዕሌየ፡ እግዚአብሔር፡ ወኮነኒ፡ ሌዋዊ፡ ካህነ። ክፍል፡ ፶፱፡ እማንቱ፡ መዋዕል፡ አልቦሙ፡ ንጉሠ፡ ለእስራኤል። ወበእማንቱ፡ መዋዕል፡ የሐሥሡ፡ ሕዝበ፡ ዳን፡ ርስተ፡ ኀበ፡ ይነብሩ፡ እስመ፡ ኢረከቡ፡ እስከ፡ ይእቲ፡ አሚር፡ ውስተ፡ ማእከለ፡ ሕዝበ፡ እስራኤል። ወፈነዉ፡ ደቂቀ፡ ዳን፡ እምነ፡ ሕዝቦሙ፡ ፭እደወ፡ እምነ፡ መክፈልቶሙ፡ ደቂቀ፡ ኃይል፡ እምነ፡ ሰአራ፡ ወኤስታሔል፡ ከመ፡ ይርአይዋ፡ ለምድር። ወይቤልዎሙ፡ ሖሩ፡ ርእዩ፡ ለነ፡ ምድረ፡ ወበጽሐ፡ ውስተ፡ ደብረ{.....}(ኤፍሬም፡ ኀበ፡ ቤተሚካ፡ ወኅደሩ፡ ህዩእሙንቱ፡ ኀበ፡ ቤተሚካ፡ ወአእመርዎ፡ ለውእቱ፡ ወልድ፡ ወሬዛ፡ ሌዋዊ፡ ወቦኡ፡ ህዩ፡ ወይቤልዎ፡ መኑ፡ አምጽአከ፡ ዝዩ፡ ምንተ፡ ትገብር፡ በዝዩ፡ ወምንተ፡ ብከ። ወይቤሎሙ፡ ከመዝ፡ ወከመዝ፡ ረሰየኒ፡ ሚካ፡ ወዓሰበኒ፡ ወኮንክዎ፡ ካህነ። ወይቤልዎ፡ ተሰአል፡ ኀበ፡ እግዚአብሔር፡ አመ፡ ይሴርሕ፡ ፍኖተነ፡ እንተ፡ ነሐውር፡ ውስቲታ፡ ንሕነ። ወይቤሎሙ፡ ውእቱ፡ ካህነ፡ ሖሩ፡ በሰላም፡ ይእቲፍኖትክሙ፡ ቅድመ፡ {..}እግዚአብሔር፡ እንተ፡ ባቲ፡ ተሐውሩ። ክፍል፡ ፷፡ ወሖሩ፡ ፭እደወ፡ ወ

(col. 3) በጽሐ፡ ውስተ፡ ሊሳ፡ ወርእዩ፡ ሕዝበ፡ እለ፡ ይነብሩ፡ ውስቲታ፡ ተአሚኖሙ፡ ይነብሩ፡ በሕገ፡ ሲዶና፡ ኀዱአን፡ ወዕሩፋን፡ እንዘ፡ ይትአመኑ፡ ወኢይክሉ፡ ነቢበ፡ ቃለ፡ ውስተ፡ ምድረ፡ ርስት፡ መዝገበ፡ እስመ፡ ርኹቃን፡ እሙንቱ፡ እስመ፡ ሲዶና፡ ወአልቦሙ፡ ነገር፡ ምስለ፡ ሰብእ፡ ወገብኡ፡ እልክቱ፡ ፭፡ እደወ፡ ኀበ፡ አኃዊሆሙ፡ ውስተ፡ ስራሕ፡ ወኤስታሔል። ወይቤልዎሙ፡ ምንት፡ ያነብረክሙ፡ ተንሥኡ፡ ንሖር፡ ላዕሌሃ፡ እስመ፡ ቦእናሃ፡ ወአንሶስውናሃ፡ ለይእቲ፡ ምድር፡ እስከ፡ አጽናፊሃ፡ ወርኢነ፡ ሕዝበ፡ እለ፡ ይነብሩ፡ ውስቲታ፡ በሕገ፡ ሲዶናወርኹቃን፡ እሙንቱ፡ እምነ፡ ሲዶና፡ ወአልቦሙ፡ ነገር፡ ምስለ፡ ሰብእ። ወባሕቱ፡ ተንሥኡ፡ ንዕርግላዕሌሆሙ፡ እስመ፡ ርኢናሃ፡ ለይእቲ፡ ምድር፡ ሠናይት፡ ጥቀ፡ ወአንትሙሰ፡ ታረምሙ፡ ወትትሐከዩ፡ ሐዊረ፡ ወበዊአ፡ ከመ፡ ትትዋረስዋ፡ ለይእቲ፡ ምድር፡ ወእምከመ፡ ቦእክሙ፡ ትበጽሑ፡ ኀበ፡ ሕዝብ፡ እለ፡ ተአሚኖሙ፡ ይነብሩ። ወምድርኒ፡ ርኹብ፡ እስመ፡ አግብአ፡ እግዚአብሔር፡ ውስተ፡ እዴክሙ፡ ብሔረ፡ ዘአልቦ፡ ዘይትኃጣእ፡ እምነ፡ ቃል፡ ዘተፈጥረ፡ ውስተ፡ ምድር። ወተንሥኡ፡

እምህየ፡ እምነ፡ ብሔረ፡ ዳን፡ እምነ፡ ስራሕ፡ ወኤፍታሔል፡ ፯፻፡ ብእሲ፡ እለ፡ ቅኑታኒሆሙ፡
ይጸውሩ፡ ንዋየ፡ ሐቅሎሙ፡ ወዓርጉ፡ ወኅደሩ፡ ውስተ፡ ቀርቦታርም፡ ውስተ፡ ይሁዳ፡ ወበእንተ፡
ዝንቱ፡ ተሰምየ፡ ውእቱ፡ መካን፡ ትዕይንተ፡ ዳን፡ እስከ፡ ዮም፡ መንገለ፡ ድኅሬሁ፡ ለቀርታርም፡
ወኃሊፎሙ፡ እምህየ፡ በጽሑ፡ ውስተ፡ ደብረ፡ ኤፍሬም፡ ወበጽሑ፡ ኅበ፡ ሚካ፡ ወይቤልዎሙ፡
እልክቱ፡ እደው፡ ፭እለ፡ ሐሩ፡ ከመ፡ ይርአይዋ፡ ለይእቲ፡ ምድር፡ ሊሰ፡ ይቤልዎሙ፡
ለአጋዊሆሙ፡ ሶበ፡ ተአምሩ፡ ከመ፡ ቦቱ፡ ውስተ፡ ዝንቱ፡ አብያት፡ ምስለ፡ ወተራፊን፡ ወግልሮ፡
ወስብኮ፡ ወይእዜኒ፡ አእምሩ፡ ዘትገብሩ፡ ወገኃሡ፡ ህየ፡ ወቦኡውስተ፡ ቤተ፡ ውእቱ፡ ወልድ፡
ሌዋዊ፡ ውስተ፡ ቤተ፡ ሚካ፡ ወተአምሳዋ፡ እልክቱ፡ እደው፡ ወ፯፻፡ ብእሲ፡ ወይጸውሩ፡ ንዋየ፡
ሐቅሎሙ፡ ቅኑታኒሆሙ፡ ወተጋብኡ፡ ኅበ፡ ኖሳተ፡ አንቀጽ፡ እለ፡ እምነ፡ ደቂቀ፡ ዳን፡ ወዓርጉ፡
እልክቱ፡ ፭እደው፡ እለ፡ ሐሩ፡ ቀዲሙ፡ ከመ፡ ይርአዩ፡ ምድር፡ ቦኡ፡ ህየ፡ ወነሥኡ፡ ዝክተ፡
ምስለ፡ ወግል፡ ወቴራፍን፡ ወ

F.103v

(col. 1) ስብኮ፡ ወዝንቱሰ፡ ካህን፡ ይቀውም፡ ኅበ፡ ኖሳተ፡ አንቀጽ፡ ወእልክቱኒ፡ ፯፻፡ ብእሲ፡
ይጸውሩ፡ ንዋየ፡ ሐቅሎሙ፡ ቅኑታኒሆሙ፡ ወቦኡ፡ እሙንቱ፡ እደው፡ ውስተ፡ ቤተ፡ ሚካ፡
ወነሥኡ፡ ዝክተ፡ ግል፡ ወቴራፍን፡ ወስብኮ፡ ወይቤሎሙ፡ ዝክቱ፡ ካህን፡ ምንተ፡ ትገብሩ፡
አንትሙ፡ ወይቤልዎ፡ አርምም፡ ወደይ፡ እዴከ፡ ውስተ፡ አፉከ፡ ወነዓ፡ ምስሌን፡ ወትከውን፡
አቡነ፡ ወካህነ፡ ቦኑይጌይሰከ፡ ትኩን፡ ካህነ፡ ለ፩፡ ብእሲ፡ እምትኩን፡ ካህነ፡ ለነገድ፡ ወለሕዝበ፡
እስራኤል፡ ወተራሥሐ፡ ልቡ፡ ለውእቱ፡ ካህን፡ ወነሥኡ፡ ውእቱ፡ ምስለ፡ ቴራፍን፡ ወግልሮ፡
ወስብኮ፡ ወቦኡ፡ ማእከለ፡ ሕዝብ፡ ወተመይጡ፡ ወሐሩ፡ ወነሥኡ፡ ኩሉ፡ ቤቶ፡ ወጥሪቶ፡ ዘከብሩ፡
ወነድኡ፡ ቅድሚሆሙ፡ እንበለ፡ ይርሐቁ፡ እምቤቱ፡ ወመጽአ፡ ሚካ፡ ወእደው፡ ሕዝብ፡ እለ፡
ቅሩብ፡ ቤቱ፡ ለሚካ፡ ወጸርሑ፡ እምድኅሬሆሙ፡ ለደቂቀ፡ ዳን፡ ወተመይጡ፡ ገጸሙ፡ ደቂቀ፡ ዳን፡
ወይቤልዎ፡ ለሚካ፡ ምንተ፡ ኮንከ፡ ዘትጸርሕ፡ ወይቤሎሙ፡ ሚካ፡ ግል፡ ወነሥኡ፡ ነሣእክሙኒ፡
ወካህንኒ{.}፡ ወሐርክሙ፡ ወምንተ፡ እንከ፡ ኅደግሙ፡ ሊተ፡ ወትቤሉኒ፡ ምንተ፡ ትጸርሕ፡
ወይቤልዎ፡ ደቂቀ፡ ዳን፡ ወኢይስማዕ፡ እንከ፡ ቃልከ፡ ምስሌን፡ ወእመ፡ አኮሰ፡ ይትራከቡከ፡
እደው፡ መሪራነነፍስ፡ ወተኅጉል፡ ዓዲ፡ ነፍስከ፡ ወነፍስ፡ ቤትከ፡ ወሐሩ፡ ደቂቀ፡ ዳን፡ ፍኖቶሙ፡
ወርእየ፡ ሚካ፡ ከመ፡ ይጸንዕዎ፡ ተመይጠ፡ ወቦኡ፡ ቤቶ፡ ወእሙንቱሰ፡ ነሥኡ፡ ኩሉ፡ ዘገብረ፡
ሚካ፡ ወካህንኒ፡ ወኩሉ፡ ዘቦ፡ ወሐሩ፡ እስከ፡ ሌስ፡ ላዕለ፡ ሕዝብ፡ ዕሩፍ፡ ዘተአሚኖ፡ ይነብር፡
ወቀተልዎሙበአፈ፡ ሐፂን፡ ወሀገሮሙኒ፡ አውዐዩ፡ በእሳት፡ ወአልቦ፡ ዘድኅነ፡ እስመ፡ ርኅቃን፡
እሙንቱ፡ እምነ፡ ሲዶና፡ ወአልቦሙ፡ ነገር፡ ምስለ፡ ባዕድ፡ ሰብእ፡ ወይእቲሰ፡ ውስተ፡ ቈላት፡
እንተ፡ ቤተ፡ ጣብ፡ ወሐነጽዋ፡ ለይእቲ፡ ሀገር፡ ወነበሩውስቲታ፡ ወሰመይዋ፡ ስማ፡ ለይእቲ፡ ሀገር፡
ዳን፡ በስመ፡ አቡሆሙ፡ ዳን፡ ዘተወልደ፡ ለእስራኤል፡ ወስማ፡ ለይእቲ፡ ሀገር፡ ቀዳሚሁ፡ ሊሰ፡
አቀሙሎሙ፡ ደቂቀ፡ ዳን፡ ግል፡ ዘሚካ፡ ወዮናታን፡ ወልደ፡ ጌርሶም፡ ወልደ፡ ሙሴ፡ ውእቱ፡
ወደቂ

(col. 2) ቁ፡ ኮኑ፡ ካህናት፡ ለሕዝበ፡ ዳን፡ እሙንቱ፡ እስከአመ፡ ፍልሰተ፡ ምድሮሙ፡ ወአቀሙ፡
ሎሙ፡ ግል፡ ዘሚካ፡ ዘገብረ፡ በኩሉ፡ መዋዕል፡ አምጣነ፡ ነበረ፡ ቤተ፡ እግዚአብሔር፡ ውስተ፡
ሴሎም፡ ክፍል፡ ፳፩፡ ወበእማንቱ፡ መዋዕል፡ አልቦሙንጉሠ፡ ለእስራኤል፡ ወሀለወ፡ ፩፩ላሲ፡

ብእሲ፡ ሌዋዊ፡ ወይነብር፡ ውስተ፡ አሐቲ፡ ኅብር፡ ዘደብረ፡ ኤፍሬም፡ ወነሥአ፡ ሎቱ፡ ውእቱ፡
 ብእሲ፡ ብእሲተ፡ ዕቅብተ፡ እምቤተ፡ ልሔም፡ ዘይሁዳ፡ ወዘመወት፡ ዕቅብቱ፡ ወኅደገቶ፡
 ወአተወትቤተ፡ አቡሃ፡ ዘይሁዳ፡ ወነበረት፡ ህየ፡ መዋዕለ፡ ፬አውራጃ፡ ወተንሥአ፡ ምታ፡ ወሐረ፡
 ወተለዋ፡ ከመ፡ ይትአረቃ፡ ወያግብአ፡ ኅቤሁ፡ ወቋላዒሁ፡ ምስሌሁ፡ ወ፪፡ አእዱግ፡ ወአብአቶ፡
 ቤተ፡ አቡሃ፡ ወርእዮ፡ አቡሃ፡ ለይእቲ፡ ወለት፡ ወሐረ፡ ወተቀበሎ፡ ወአብአ፡ ሐሙሁ፡ አቡሃ፡
 ለይእቲ፡ ብእሲቱ፡ ወነበሩ፡ ምስሌሁ፡ ሠሉስ፡ መዋዕለ፡ ወበልዑ፡ ወሰትዩ፡ ወቤተ፡ ህየ፡
 ወእምዝ፡ አመ፡ ራብዕት፡ ዕለት፡ ነቅሁ፡ በጽባሕ፡ ወተንሥአ፡ ወይቤሎ፡ አቡሃ፡ ለይእቲ፡ ወለት፡
 አጽንዕ፡ ልበከ፡ ወብላዕ፡ ፍተ፡ ኅብስት፡ ወእምዝ፡ ተሐውር፡ ወነበረ፡ ወበልዑ፡ ክልኤሆሙ፡
 ኅቡረ፡ ወሰትዩ፡ ወይቤሎ፡ አቡሃ፡ ለይእቲ፡ ወለት፡ ለውእቱ፡ ብእሲ፡ ቤት፡ ዮም፡ ወይትፈሣሕከ፡
 ልብከ፡ ወሐረ፡ ወተንሥአ፡ ውእቱ፡ ብእሲ፡ ወአገበሮ፡ ሐሙሁ፡ ወካዕበ፡ ቤተ፡ ህየ፡ ወነቅሐ፡
 በጽባሕ፡ አመ፡ ኃምስት፡ ዕለት፡ ከመ፡ ይሐር፡ ወይቤሎ፡ አቡሃ፡ ለይእቲ፡ ወለት፡ ብላዕ፡ እክለ፡
 ወእምዝ፡ ተሐርር፡ እስከ፡ ተዓርብ፡ ፀሐይ፡ ወበልዑ፡ ወሰትዩክልኤሆሙ፡ ወተንሥአ፡ ውእቱ፡
 ብእሲ፡ ከመይሐር፡ ውእቱ፡ ወዕቅብቱ፡ ወቋላዒሁ፡ ምስሌሁ፡ ወይቤሎሙ፡ ሐሙሁ፡ አቡሃ፡
 ለይእቲ፡ ወለት፡ ናሁ፡ መስየ፡ ወተቈልቈለ፡ ፀሐይ፡ ኅድር፡ ዝየ፡ ዮምኒ፡ ወንበር፡ ዝየ፡
 ይትፌሥሐከ፡ ልብከ፡ ወትጊሡ፡ በጽባሕ፡ ፍኖትክሙ፡ ወዐበየ፡ ውእቱ፡ ብእሲ፡ በይተ፡
 ወተንሥአ፡ ወሐረ፡ ወበጽሑ፡ እስከ፡ ቅድመ፡ ኢያቡስ፡ እንተ፡ ይእቲ፡ ኢየሩሳሌም፡ ወምስሌሁ፡
 ፪አእዱግ፡ ዕፁናን፡ ወዕቅብቱሂ፡ ምስሌሁ፡ ይእቲ፡ ወእንዘ፡ ዓዲሆሙ፡ ሀለዉ፡ አንጻረ፡ ኢያቡስ፡
 ወፀሐይኒ፡ ተቈልቈሊ፡

(col. 3) ጥቀ፡ ወይቤሎ፡ ቋላዒሁ፡ ለእግዚአ፡ ንግሥስውስተ፡ ሀገረ፡ ኢያቡሴዎን፡ ዛቲ፡ ወንቢት፡
 ውስቴታ፡ ወይቤሎ፡ እግዚአ፡ ኢእግሳሥ፡ ውስተ፡ ሀገር፡ ነኪር፡ እንተ፡ ኢኮነት፡ ለደቂቀ፡
 እስራኤል፡ ንኅልፍ፡ እንተ፡ ገባአን፤ ወይቤሎ፡ ቋላዒሁነዓ፡ ንግሥሥ፡ ውስተ፡ ፩፡ መካን፡
 ወኅድር፡ ውስተ፡ ገባአን፡ አው፡ ራማ፡ ወኃለፉ፡ ወሐሩ፡ እስከ፡ ዕርበተ፡ ፀሐይ፡ ወበጺሐሙ፡
 ገባአን፡ እንተ፡ ብንያም፡ ወግሳሡ፡ ህየ፡ ከመ፡ ይባሉ፡ ወይኅድሩ፡ ውስተ፡ ገባአን፡ ወዐረበ፡
 ፀሐይ፡ ወቦሉ፡ ወነበሩ፡ ውስተመርኅብሀገርወአልቦ፡ ዘያበውአሙ፡
 ውስተቤትዘየኃድሮሙወመጽአ፡ ብእሲ፡ ልሂቅእምነግብሩወብእሲሁስ፡
 እምነደብረኤፍሬምወምንባሪሁውስተ፡

ገባአንወሰብአብሔርደቂቀብንያሚነጻሩብ፡ አዕይንቲሆሙወርእይዎለዝንቱኒብእሲነጋዲ፡

ውስተመርኅብሀገርወይቤሎዝክቱኒ፡ ልሂቅአይቴተሐውርወእምአይቴመዳእከ፡
 ወይቤልዎኃለፍትንሕንእምነቤተ፡ ልሔምዘይሁዳእስከአመንበጽሕደብረ፡ ኤፍሬም፡ እስመእምህየአነ፡
 ወሐርኩእስከ፡ ቤተ፡ ልሔም፡ ዘይሁዳ፡ ወቤተ፡ እግዚአብሔር፡ አሐውር፡ ወአልቦ፡ ዘእግኃሠኒ፡
 ውስተ፡ ቤቱ፡ ወኃሠርኒ፡ ወእክልኒ፡ ብነ፡ ለአእዱጊነ፡ ወኅብስትኒ፡ ወወይንኒ፡ ብነ፡ ወለአመቲከሂ፡
 ወለቋላዒ፡ አግብርቲከ፡ ወአልቦ፡ ዘነኃጥእ፡ እምነ፡ ኩሉ፡ መፍቅድነ፡ ወይቤሎ፡ ዝክቱ፡ ብእሲ፡
 ልሂቅ፡ ሰላም፡ ለከ፡ ወኩሎ፡ ዘአልብከ፡ ላዕሌየ፡ ወባሕቱ፡ ውስተ፡ መርኅብ፡ ኢትኅድር፡
 ወአብአ፡ ውስተ፡ ቤቱ፡ ወአቅምሐሙለአእዱጊሁ፡ ወሐፀበ፡ እገሪሆሙ፡ ወበልዑ፡ ወሰትዩ፡
 ወእምዝ፡ ሶበ፡ ተፈሥሐ፡ ልቦሙወመጽአ፡ ሰብአ፡ ሀገር፡ ደቂቀ፡ ኃጥአን፡ ዓገትዎ፡ ለውእቱ፡
 ቤት፡ ወጐድጐዱ፡ ፕኅተ፡ ወይቤልዎ፡ ለዝክቱ፡ ብእሲ፡ ልሂቅ፡ በዐለ፡ ቤት፡ አውፅአ፡ ለዝክቱ፡
 ብእሲ፡ ዘቦአ፡ ውስተ፡ ቤትከ፡ ከመ፡ ናእምሮ፡ ወወፅአ፡ ኅቤሁ፡ ዝክቱ፡ ብእሲ፡ በዐለ፡ ቤት፡

ወይቤሎሙ፡ ኃሠ፡ ለክሙ፡ አኃዊነ፡ ኢትግበሩ፡ እኩየ፡ እምድኅረ፡ ቦአ፡ ብእሲ፡ ውስተ፡ ቤትየ፡ ኢትግበሩ፡ ዘንተ፡ ዕበደ፡ ናሁ፡ ወለትየ፡ ድንግ

F.104r

(col. 1) ል፡ ወዕቅብቱ፡ አውፅኦን፡ ወአኅሥርዎን፡ ወግበሩ፡ ላዕሌሆን፡ ዘይኤድመክሙ፡ በውስተ፡ አዕይንቲክሙ፡ ወላዕለ፡ ዝክቱ፡ ብእሲ፡ ኢትግበሩ፡ ዘንተ፡ ነገረ፡ እበድ፡ ወኢይፈቅዱ፡ እሙንቱስ፡ ሰብእ፡ ይስምዕዎ፡ ወነሥአ፡ ዝክቱ፡ ብእሲ፡ ለዕቅብቱ፡ ወአውጽአ፡ አፍአ፡ ኅቤሆሙ፡ ወአኅሥርዎ፡ ወተዋነይዋ፡ ኩላ፡ ሌሊተ፡ እስከ፡ ፀብሐ፡ ወፈነውዋ፡ ሶበ፡ ኀሐ፡ ወመጽአት፡ ይእቲ፡ ብእሲ፡ ት፡ በጽባሕ፡ ወወድቀት፡ ኀበ፡ መድረክ፡ ሞተ፡ ዘውእቱ፡ ብእሲ፡ ላዕለ፡ ቤት፡ ኀበ፡ ሀለው፡ ህየ፡ እግዚአ፡ እስከ፡ ጽባሕ፡ ወተንሥአ፡ እግዚአ፡ በጽባሕ፡ ወአርኃው፡ ሞተ፡ ቤት፡ ወወፅአ፡ ከመ፡ ይሖር፡ ፍኖቶ፡ ወረከበ፡ ለዕቅብቱ፡ ወድቅት፡ ኀበ፡ ሞተ፡ ቤት፡ ወእደዊሃ፡ ላዕለ፡ መድረክ፡ ወይቤላ፡ ተንሥኢ፡ ንሖር፡ ወኢአውሥአቶ፡ እስመ፡ ሞተ፡ ወጸዓና፡ ዲበ፡ አድግ፡ ወተንሥአ፡ ወእቱ፡ ብእሲ፡ ወአተወ፡ ብሔር፡ ወበአ፡ ቤቶ፡ ወነሥአ፡ መጥባሕተ፡ ወአኃዛ፡ ለዕቅብቱ፡ ወመተራ፡ እምነ፡ መለያልያ፡ አዕፅምቲሃ፡ ዓሠርተ፡ ወክልኤተ፡ ክፍለ፡ ረሰያ፡ ወፈነዋ፡ ውስተ፡ ውስተ፡ ሕዝበ፡ እስራኤል፡ ወእምዝ፡ ኩሉ፡ ዘርእየ፡ ይቤ፡ አልቦ፡ አመ፡ ኮነ፡ ከመዝ፡ አልቦ፡ አመአስተርአየ፡ እምአመ፡ ወፅኡ፡ እስራኤል፡ እምነ፡ ግብጽ፡ እስከ፡ ዮም፡ ወአዘዘዎሙ፡ ለእልክቱ፡ ሰብእ፡ እለ፡ ፈነውዎሙ፡ ወይቤልዎሙ፡ ከመ፡ ዝ፡ በልዎሙ፡ ለኩሉ፡ እስራኤል፡ ቦኑ፡ ኮነ፡ ከመዝ፡ እምአመ፡ ወጽኡ፡ ደቂቀ፡ እስራኤል፡ [ወ]እምነምድረ፡ ግብጽ፡ እስከ፡ ዮም፡ ወረሰዩ፡ ለክሙ፡ ምክረ፡ ወተናገሩ፡ ዘይሄኒ፡ ክፍል፡ ቿ፪ወጽኡ፡ ኩሉ፡ ደቂቀ፡ እስራኤል፡ ወአንገለጉ፡ ተጋቢአሙ፡ ኩሉሙ፡ ማኅበሮሙ፡ ከመ፡ ፩ብእሲ፡ እምነዳን፡ እስከ፡ ቤርሳቤሕ፡ ወገለአድኒ፡ ውስተ፡ መሴፋ፡ ወቆሙ፡ ኩሉ፡ ሕዝብ፡ ወኩሉ፡ ነገደ፡ እስራኤል፡ ውስተ፡ ማኅበረ፡ ኩሉ፡ ሕዝብ፡ ለእግዚአብሔር፡ ፵፪፪፡ አጋር፡ ዘይጸውር፡ ኩናተ፡ ክፍል፡ ፳፫፡ ወሰምዑ፡ ደቂቀ፡ ብንያም፡ ከመ፡ ተጋብኡ፡ ደቂቀ፡ እስራኤል፡ {.}ውስተ፡ መሴፋ፡ ወይቤሉ፡ ደቂቀ፡ እስራኤል፡ አይድዑ፡ በአይቱ፡ ኮነት፡ ዛቲ፡ እኪት፡ ወአውሥአ፡ ወእቱ፡ ብእሲ፡ ሌዋዊ፡ ምታ፡ ለእንታክቲ፡ ብእሲት፡ እንተ፡ ቀተሉ፡

(col. 2) በገባኦን፡ ዘብንያም፡ ወይቤ፡ መጻእኩ፡ አነ፡ ወዕቅብትየ፡ እኅድር፡ ወተንሥኡ፡ ላዕሌየ፡ ሰብአ፡ ገባኦን፤ ወዓገቱ፡ ላዕሌነ፡ ውስተ፡ ቤት፡ ሌሊተ፡ ወኪያየኒ፡ ፈቀዱ፡ ይቅትሉኒ፡ ወለዕቅብትየስ፡ እኅሰርዋ፡ ወተዋነይዋ፡ ወሞተት፡ ወነሣእክዋ፡ ለዕቅብትየ፡ ወመተርኩ፡ በበ፡ መለያልዩሃ፡ ወፈነውኩ፡ ውስተ፡ ደወለ፡ ርስቶሙ፡ ለእስራኤል፡ እስመ፡ ገብሩ፡ ዕበደ፡ በውስተ፡ እስራኤል፡ ወናሁኩልክሙ፡ ደቂቀ፡ እስራኤል፡ ዝየ፡ አቀሙ፡ ለክሙ፡ ምክረ፡ ወቆሙ፡ ኩሉ፡ ሕዝብ፡ ከመ፡ ፩ብእሲ፡ ወይቤሉ፡ ኢንእቱ፡ አብያቲነ፡ ወኢንግበአ፡ በሐውርቲነ፡ ወይእዜኒ፡ ከመዝ፡ ንግበር፡ ላዕለ፡ ገባኦን፡ ንዕርግ፡ ላዕሌሆሙ፡ ወንነሥእ፡ በበ፡ ዓሥሩ፡ እደው፡ ለለምእት፡ በኩሉ፡ ሕዝብ፡ እስራኤል፡ ለ፲፪፡ ወለ፪፡ እለ፡ ይጸውሩ፡ ስንቀ፡ ለሕዝብ፡ ውስተ፡ ፍኖት፡ ለእለ፡ የሐውሩ፡ ይትቃተልዎሙ፡ ለገባኦን፡ ለብንያሚ፡ በበይነ፡ ኩሉ፡ ባዕድ፡ እንተ፡ ገብሩ፡ ደቂቀ፡ እስራኤል፡ ወተጋብኡ፡ ኩሉ፡ እስራኤል፡ እምነ፡ አህጉሪሆሙ፡ ከመ፡ ፩ብእሲ፡ ይባኡ፡ ወበአኩ፡ ሕዝብ፡ እስራኤል፡ ውስተ፡ ኩሉ፡ ነገደ፡ ብንያሚ፡ እንዘ፡ ይብሉ፡ ምንት፡ ኢኮነት፡ እኪተ፡ በውስቲትክሙ፡ ወይእዜኒ፡ አግብኡ፡ እደው፡ እለ፡ አበሱ፡ በገባኦን፡ ደቂቀ፡ ኃጥአነ፡ ወንቅትሎሙ፡

ወናውፅእ፡ እኪት፡ እምነ፡ እስራኤል። ወአበዩ፡ ደቂቀ፡ ብንያሚ፡ ሰሚዖቶሙ፡ ለደቂቀ፡ እስራኤል፡
 ወተጋብኡ፡ ደቂቀ፡ ብንያሚ፡ እምነ፡ አህጉሪሆሙ፡ ገባኦን፡ ከመ፡ ይፃኡ፡ ይትቃተልዎሙ፡
 ለደቂቀ፡ እስራኤል፡ ወተኑለቁ፡ ደቂቀ፡ ብንያም፡ በይእቲዕለት፡ እምነ፡
 አህጉሪሆሙ{.....}(፳፱፻፱)ወ፳፻፡ ብእሲ፡ እለ፡ ይጻውሩ፡ ኩናተ፡ እንበለ፡ እለ፡ ይነብሩ፡ ውስተ፡
 ገባኦን፡ ወእሙንቱኒ፡ ተኖለቁ፡ ፯፻፡ ወራዙት፡ ኅሩያን፡ እለ፡ ክልኤሆን፡ እደዊሆሙ፡ የማኖሙ፡
 ኩሎሙ፡ ወኩሎሙ፡ እለ፡ ይዌጽፉ፡ በሞጸፈ፡ እብን፡ ወየሀይጹ፡ ሥዕርተ፡ ወኢይስሐቱ፡
 ወተኖለቁ፡ ደቂቀ፡ እስራኤል፡ እንበለ፡ ደቂቀ፡ ብንያሚ፡ ፵፱፡ ብእሲ፡ ጸዋሬ፡ ኩናት፡
 ወኩሎሙ፡ እሉ፡ እደው፡ መስተቃትላን፡ ወተንሥኡ፡ ወዓርጉ፡ ውስተ፡ ቤቴል፡ ወተስእሉ፡ ኀበ፡
 እግዚአብሔር፡ ወይቤልዎ፡ ደቂቀ፡ እስራኤል፡ መኑ፡ የዓርግ፡

(col. 3) ለነ፡ መስፍነ፡ ዘይትቃተሎሙ፡ ለነ፡ ለብንያም፡ ወይቤሎሙ፡ እግዚአብሔር፡ ይዕርግ፡
 ይሁዳ፡ ለክሙ፡ መስፍነ፡ ወተንሥኡ፡ ደቂቀ፡ እስራኤል፡ በጽባሕ፡ ወኃደሩ፡ ላዕለ፡ ገባኦን፡
 ወወፅኡ፡ ኩሎሙ፡ እደው፡ እስራኤል፡ ውስተ፡ ቀትል፡ ምስለ፡ ብንያሚ፡ ወተከኃዝዎሙ፡
 በገባኦን፡ ወወፅኡ፡ ደቂቀ፡ ብንያሚ፡ እምነ፡ ገባኦን፡ ወቀተሉ፡ እምነ፡ እስራኤል፡ ፱ወ፳፻፡ ብእሲ፡
 ይእት፡ አሚረ፡ እለ፡ ወድቁ፡ ውስተ፡ ምድር፡ ወተጸንዑ፡ ደቂቀ፡ እስራኤል፡ ወደገሙ፡ ወወፅኡ፡
 ይትቃተሉ፡ ውስተ፡ ዝክቱ፡ መካን፡ ኀበ፡ ይትቃተሉ፡ አመ፡ ተቃተሉ፡ አመ፡ ቀዳሚት፡ ዕለት፡
 ህየ፡ ወዐርጉ፡ ደቂቀ፡ እስራኤል፡ ወበከዩ፡ ቅድመ፡ እግዚአብሔር፡ እስከ፡ ሰርክ፡ ወተስእሉ፡ ኀበ፡
 እግዚአብሔር፡ ወይቤሉ፡ ንድግምኑ፡ ዓዲ፡ ተቃተሎ፡ ምስለ፡ ብንያም፡ እኑነ፡ ወይቤሎሙ፡
 እግዚአብሔርዕርጉ፡ ኀበሆሙ፡ ክፍል፡ ፳፭ወመጽኡ፡ ደቂቀ፡ እስራኤል፡ ኀበ፡ ብንያሚ፡ አመ፡
 ሳኒታ፡ ዕለት፡ ወወፅኡ፡ ብንያሚ፡ ወተቀበልዎሙ፡ እምነ፡ ገባኦን፡ ወቀተሉ፡ እምኔሆሙ፡
 ፱ወስማንያ፡ ፻፡ ብእሲ፡ እለ፡ ወድቁ፡ ውስተ፡ ምድር፡ ወኩሎሙ፡ እለ፡ ይጻውሩ፡ ኩናተ፡
 ወዓርጉ፡ ኩሎሙ፡ ደቂቀ፡ እስራኤል፡ ወኩሉ፡ ሕዝብ፡ ወሐሩ፡ ቤቴል፡ ወነበሩ፡ ወበክዩ፡ ህየ፡
 ቅድመ፡ እግዚአብሔር፡ ወጸሙ፡ ደቂቀ፡ እስራኤል፡ እስከ፡ ሰርክ፡ መዐርጉ፡ መሥዋዕተ፡
 ወዘመድኃኒት፡ ኀበ፡ እግዚአብሔር፡ ወሀለወት፡ ህየ፡ ታቦተ፡ እግዚአብሔር፡ በእማንቱ፡
 መዋዕል፡ ወልደ፡ አልዓዛር፡ ወልደ፡ አሮን፡ ይቀውም፡ ቅድሚሃ፡ በእማንቱ፡ መዋዕል፡
 ወተስእሉ፡ ወይቤሉ፡ ንድግምኑ፡ ዓዲ፡ ወዲአ፡ ውስተ፡ ቀትል፡ ምስለ፡ ደቂቀ፡ ብንያሚ፡ እኑነ፡
 አው፡ ንኅድግ፡ ወይቤሎሙ፡ እግዚአብሔር፡ ዕርጉ፡ እስመ፡ ጌሰመ፡ አገብአሙ፡ ውስተ፡ እዴክሙ፡
 ወአንበሩ፡ ደቂቀ፡ እስራኤል፡ እለ፡ ዓገትዋ፡ ለገባኦን፡ ውስተ፡ ዓውዳ፡ ወከኃዝዎሙ፡ እስራኤል፡
 ለብንያሚ፡ አመ፡ ሣልስት፡ ዕለት፡ ወተቃተልዎሙ፡ በኀበ፡ ገባኦን፡ ከመ፡ ቀዲሙ፡ ወወፅኡ፡
 ደቂቀ፡ ብንያሚ፡ ወተቀበ

F.104v

(col. 1) ልዎሙ፡ ለሕዝብ፡ ወጐዩ፡ እምኀበ፡ ሀገር፡ ወአኀዙ፡ ይትቃተሉ፡ እምነ፡ ሕዝብ፡ ኀበ፡
 ቀዲሙ፡ በፍኖት፡ አሐቲ፡ እንተ፡ ተዓርግ፡ በቤቴል፡ ወአሐቲ፡ እንተ፡ ተዓርግ፡ ለገባኦን፡ በውስተ፡
 ገዳም፡ የአክሉ፡ ፴ብእሴ፡ እስራኤል፡ ይቤሉ፡ ደቂቀብንያሚ፡ ይመውቱ፡ ቅድሚነ፡ ከመ፡ ቀዲሙ፡
 ወይቤሉ፡ ደቂቀ፡ እስራኤል፡ ንጉየይ፡ ወናርኅቆሙ፡ እምነ፡ ሀገር፡ ውስተ፡ ፍናዊ፡
 ወተንሥኡ፡ ኩሎሙ፡ ደቂቀ፡ እስራኤል፡ እምነ፡ መካኖሙወተቃተሉ፡ በበዓለ፡ ተምር፡
 ወማ(ዕገ)ቶሙኒ፡ ለእስራኤል፡ ተበአሱ፡ በመካኖሙ፡ እምነ፡ ዓረቢሃ፡ ለገባኦን፡ ወቦኡ፡ እምነ፡

ቅድሚያ፡ ለገባኦን፡ ቼብእሲ፡ ኅሩያን፡ እምኩሉ፡ እስራኤል፤ ወጸንዓ፡ ጸብእ፡ ላዕሌሆሙ፡
 እሙንቱስ፡ ኢያእመሩ፡ ከመ፡ በጽሐቶሙ፡ እከዮሙ፡ ወአውደቆሙ፡ እግዚአብሔር፡ ለብንያሚ፡
 ቅድመ፡ እስራኤል። ክፍጽጹ፡ ወቀተልዎሙ፡ ደቂቀ፡ እስራኤል፡ ለብንያም፡ ክልኤ፡
 እልፍ፡ ወፃፂ፡ ወፃፂ፡ ወኩሎሙ፡ እለ፡ ይጸውሩ፡ ኩናተ፡ ወርእየ፡ ብንያሚ፡ ከመ፡ ተቀትለ፡
 ወወሀብዎሙ፡ እስራኤል፡ መካነ፡ ለብንያም፡ እስመ፡ ተአመኑ፡ በማዕገቶሙ፡ ዘሢሙ፡
 ለእለ፡ ገባኦን። ወሐሩ፡ እልክቱ፡ እለ፡ ዓገቱ፡ ወቀተልዎ፡ ለሀገር፡ በአፈ፡ ሐፂን፡ ወአዘዝዎሙ፡
 እስራኤል፡ ለእለ፡ የዓግቱ፡ ከመ፡ በሐፂን፡ ይቅትልዎሙ ወያዕርግዋ፡ ለጢስ፡ ሀገር፡ ከመ፡
 ማኅፈድ፡ ወተመይጠ፡ እስራኤል፡ በውስተ፡ ፀብእ፡ ብንያሚ፡ ወብንያምኒ፡ አኃዘ፡ ከመ፡ ይቅትል፡
 ቅቱላነ፡ እምነ፡ እስራኤል፡ የአክሉ፡ ቼብእሲ፡ ወይቤእንበለ፡ ይቅትሉኒ፡ ቀተልክዎሙ፡ በቅድሚያ፡
 ከመ፡ ቀተለ፡ ቀዲሙ፡ ወዝንቱ፡ ጢስ፡ የዓርግ፡ እምነ፡ ሀገር፡ ከመ፡ ዓምድ፡ ወነጸረ፡ ብንያሚ፡
 ድኅሬሁ፡ ወናሁ፡ ዓርገ፡ ጥፍአተ፡ ሀገር፡ ውስተ፡ ሰማይ፡ ወተመይጠ፡ እደወ፡ እስራኤል፡
 ወተወላወሉ፡ እደወ፡ ብንያሚ፡ ወርእዩ፡ ከመ፡ በጽሐቶሙ እከዮሙ፡ ቅድሚያሆሙ፡ ለእስራኤል፡
 ውስተ፡ ፍኖተ፡ ገዳም፡ ወበጽሐሙ፡ ቀትል፡ ወእለሂ፡ እምነ፡ ሀገር፡ ቀተልዎሙ፡ ለብንያም፡
 ወአጥፍእዎሙ፡ ወደምስሰ፡ ደምስሶዎሙ፡ በቅድመ፡ ገባኦን፡ እመንገለ፡ ጽባሒሃ፡ ወወድቁ፡ እምነ፡
 ብንያ

(col. 2) ም፡ ቼወሰማንያ፡ ብእሴ፡ ወኩሎሙ፡ ጽኑዓን፡ እደወ፡ ወነትዑ፡ ወጐዩ፡ ኅበ፡ ኩኩሐ፡
 ሬሞን፡ ወወአረይዎሙ፡ በፍኖት፡ ፃፂብእሴ፡ ወዴገንዎሙ፡ ወተውዎሙ፡ እስከ፡ ጌዴዓም፡
 ወቀተሉ፡ እምኔሆሙ፡ ጽፂ፡ ብእሴ፡ ወኩሎሙ፡ እለ፡ ወድቁ፡ እምነ፡ ብንያም፡ ክልኤ፡
 ቼወፃፂ፡ ብእሴ፡ እለ፡ ይጸውሩ፡ ኩናተ፡ በይእቲ፡ ዕለት፡ ወኩሎሙ፡ እሉ፡ እደወ፡ ጽኑዓን፡
 ወነትዑ፡ ወጐዩ፡ ውስተ፡ ኩኩሐ፡ ሬሞን፡ ፂፂ፡ ብእሴ፡ ወነበሩ፡ ፬፡ አውራኃ፡ ወተመይጥዎሙ፡
 ሰብአ፡ እስራኤል፡ ለደቂቀ፡ ብንያሚ፡ ወቀተልዎሙ፡ በአፈ፡ ሐፂን፡ ወለሀገሮሙኒ፡
 ወለእንስሳሆሙኒ፡ ወለኩሉ፡ ዘረከቡ፡ ውስተ፡ አህጉር፡ ወአህጉሪሆሙ፡ እለ፡ ረከቡ፡ አውዓይዎሙ፡
 በእሳት፤ ወተመሐሉ፡ ሰብአ፡ እስራኤል፡ በመሴፋ፡ ከመ፡ ኢየሀብ፡ ብእሴ፡ እምኔነ፡ ወለቶ፡
 ለብንያሚ፡ ያስተዋስብዋ፡ ወሐሩ፡ ኩሉ፡ ሕዝብ፡ ውስተ፡ ቤቴል፡ ወነበሩ፡ እስከ፡ ሰርክ፡ ቅድመ፡
 እግዚአብሔር፡ ወጸርሑ፡ ወበክዩ፡ ዐቢየ፡ ብካየ፡ ወይቤሉ፡ በምንት፡ እግዚአ፡ ኮነት፡ ዛቲ፡
 በውስተ፡ እስራኤል፡ ከመ፡ ትጻእ፡ ዮም፡ አሐቲ፡ ሕዝብ፡ እምነ፡ እስራኤል፡ ወእምዝበሳኒታ፡
 ጌሱ፡ ሕዝብ፡ ወነደቁ፡ ሕዩ፡ ምሥዋዓወአዕረጉ፡ መሥዋዕተ፡ ወዘመድኃኒት፡ ክፍል፡ ጽፂ፡ ወይቤሉ፡
 ደቂቀ፡ እስራኤል፡ መኑዘኢዓርገ፡ እምነ፡ ማኅበር፡ እምነ፡ ኩሉ፡ ሕዝብ፡ እስራኤል፡ እስመ፡
 መሐላ፡ ዐቢይ፡ ኮነት፡ ለዘ፡ ኢዓርገ፡ ኅበ፡ እግዚአብሔር፡ ውስተ፡ መሴፋ፡ ሞተ፡ ይሙት፡
 ይቤሉ፡ ወተዓረቅዎሙ፡ ደቂቀ፡ እስራኤል፡ ለብንያሚ፡ እኑሆሙ፡ ወይቤሉ፡ ትወፅእኑ፡ ዮም፡
 አሐቲ፡ ሕዝብ፡ እምነ፡ እስራኤል፡ ምንተ፡ እንከ፡ ንሬስዮሙ፡ ለእለ፡ ተርፉ፡ አንስት፡ ናሁ፡
 መሐልነ፡ ንሕነ፡ በእግዚአብሔር፡ ኢነሀብሙ፡ እምነ፡ አዋልዲነ፡ ያውስቡ። ወይቤሉ፡ መኑእምነ፡
 አሐቲ፡ ሕዝብ፡ እስራኤል፡ ወኢዓርገ፡ ኅበ፡ እግዚአብሔር፡ ውስተ፡ መሴፋ፡ ወናሁ፡ ፩ብእሴ፡
 ኢመጽአ፡ እምነ፡ ኢያቢስ፡ ዘገላአድ፡ ውስተ፡ ማኅበሮሙ፡ ወተፋቀዱ፡ ሕዝብ፡ ወናሁ፡
 ፩ብእሴእምነ፡ ኢያቢስ፡ ዘገላአድ፡ ኢሀለወ፡ ወለአኩ፡ ህየማኅበሮሙ፡ ቼወፃፂ፡ ብእሴ፡ እምነ፡
 ደቂቀ፡ ኃይል፡ ወአዘዝዎሙ፡ እንዘ፡ ይብሉ፡ ሐሩ፡ ወቅትሉ፡ ኩ

(col. 3) ሎ፡ እለ፡ ይነብሩ፡ ውስተ፡ ኢያቢስ፡ ዘገላአድ፡ በአፈ፡ ሐዲን፡ ወአንስቶሙኒ፡
 ወሕዝበሙኒ፡ ከመዝገብሩ፡ ኩሎሙ፡ ተባዕተ፡ ወኩሎን፡ አንስተ፡ እለ፡ የአምራ፡ ብእሴ፡ ቀተሎ።
 ወረከቡ፡ እለ፡ ኢየአምራ፡ ብእሴ፡ ፬፻፡ ወአምጽእዎን፡ ውስተ፡ ትዕይንት፡ ውስተ፡ ሴሎም፡
 ውስተ፡ ምድረ፡ ከናአን። ክፍል፡ ፰፡ ወለኩሉ፡ ማኅበሮሙ፡ ፈነው፡ ኅብብንያሚ፡ እለ፡ ውስተ፡
 ኩኩሐ፡ ሬሞን። ወጸውዎሙ፡ በሰላም፡ ወገብኡ፡ ብንያሚ፡ ኅብ፡ ደቂቀ፡ እስራኤል፡ በእማንቱ፡
 መዋዕል። ወወሀብዎሙ፡ አንስተ፡ እለ፡ አሕየው፡ እምነ፡ አንስተ፡ ኢያቢስ፡ ዘገላአድ፡
 ወኢአካሎሙ፡ ወሰምሩ፡ በዝንቱ፡ ሕዝብኒ፡ ተኳነንዎሙ፡ ለብንያሚ፡ እስመ፡ ገብረ፡
 እግዚአብሔር፡ ቀትለ፡ በውስተ፡ ሕዝበ፡ እስራኤል፡ ወይቤሉ፡ ሊቃነ፡ ማሕበር፡ ምንተ፡ ንግበር፡
 በእንተ፡ እለ፡ ተርፉ፡ በበይነ፡ አንስት። እስመ፡ ጠፍአ፡ አንስት፡ እምነ፡ ብንያሚ፡ ወኢይደመሰስ፡
 ሕዝብ፡ እምነእስራኤል፡ ወንነኒ፡ ኢንከል፡ ውሂባቶሙ፡ አንስተ፡ እምነ፡ አዋልዲነ፡ እስመ፡
 መሐልነ፡ ኩልነ፡ ደቂቀ፡ እስራኤል፡ እንዘ፡ ንብል፡ ርጉም፡ ውእቱ፡ ዘይሁብ፡ ብእሲተ፡
 ለብንያሚ፡ ወይቤሉ፡ በዐለ፡ እግዚአብሔር፡ በሴሎም፡ እምነ፡ መዋዕል፡ በመዋዕሊሁ፡ ውእቱ፡
 ወእመንገለ፡ መሥዕ፡ ዘቤቴል፡ ወጽባሒሃ፡ ለፍኖት፡ እንተ፡ ተዓርግ፡ እምነ፡ ቤቴልለስቂማ፡
 እመንገለ፡ አዜብ፡ ለሌባና፡ ወአዘዘዎሙ፡ ለደቂቀ፡ ብንያሚ፤ ወይቤልዎሙ፡ ሖሩ፡ ወዕግቱ፡ ውስተ፡
 አዕፃዳተ፡ ወይን፡ ወተዓቀቡ፡ አሕቃላቲሆሙ፡ ለእለ፡ ይነብሩ፡ ውስተ፡ ሴሎም፡ እንዘ፡ ይትዋነያ፡
 በመሰንቆ፡ ወይወጽኡ፡ እምነ፡ አእፃዳተ፡ ወይን፡ ወምሥጡ፡ ለክሙ፡ አንስተ፡ እምነ፡ ሴሎም፡
 ወአተዉ፡ ውስተ፡ ብንያሚ፡ ወለእመመጽኡ፡ አበዊሆን፡ ወአኃዊሆን፡ ይሳነኩሙ፡ ንብሎሙ፡
 መሐርዎሙ፡ እስመ፡ ኢያውፅኡ፡ አንስቲያሆሙ፡ እምነ፡ ቀትል፡ እስመ፡ አኮ፡
 አንትሙ፡ ዘወሀብክምዎሙ፡ በእማንቱ፡ መዋዕል፡ ተአብሎወገብሩ፡ ከማሁ፡ ደቂቀ፡ ብንያሚ፡
 ወነሥኡ፡ አንስተ፡ በኅልቆሙ፡ እምእለ፡ ይትዋነያ፡ ተማስጥዎን፡ ወአተዉ፡ ወገብኡ፡ ውስተ፡
 ርስቶሙ፡ ወነደቁ፡ ሎሙ፡ አህጉረ፡ ወነበሩ፡ ውስቴቶን። ወአተዉ፡ እምህየ፡ ደቂቀ፡ እስራኤል፡
 ብእሲ፡ ብእሲ፡ ውስተ፡ ሕ

F.105r

(col. 1) ዝቡ፡ ወውስተ፡ ነገዱ። ወአተዉ፡ እምህየ፡ ብእሲ፡ ውስተ፡ ርስቱ። ወበእማንቱ፡
 መዋዕል፡ አልቦሙ፡ ንጉሠ፡ ለእስራኤል፡ ብእሲ፡ ብእሲ፡ ዘአደሞ፡ ቅድመ፡ አዕይንቲሁ፡
 ይገብር፡ ተፈጸመ፡ አሪት፡ ዘመሳፍንት፡ በረከተ፡ አምላኮሙ፡ ተሀሉ፡ ወትረ፡ ምስለ፡ ንግሥትነ፡
 ማርያም፡ ሥና፡ ለዓለመ፡ ዓለም፡ አሜን። ወክፍላቲሁ፡ ፳፻፲፱ ወቃሉ፡ ፯፻፱፻፱